

تحقیقی مجلہ

# کھوج

لاہور

چھپیمانہی

مسلل شماره نمبر 61

مدیر

پروفیسر ڈاکٹر عصمت اللہ زاہد



شعبہ پنجابی یونیورسٹی اوری اینٹل کلج لاہور

# كھوج

شماره نمبر 1

جولائی - دسمبر 2008ء

جلد 31

مسلسل شماره نمبر 61



شعبه پنجابی، پنجاب یونیورسٹی اور یو اینٹل کالج، لاہور

## مقالہ نگار حضرات لئی

- 1- تحقیقی مجلہ کھوج وچ اجیے تحقیقی مقالے چھاپے جانداں نیں جیہڑے پنجابی زبان، ادب تے ثقافت دی ترقی واسبب بن سکے۔ ایس لئی ضروری اے کہ مقالہ نگار حضرات کھوج دے تحقیقی مزاج نوں سامنے رکھن۔
- 2- کسے وی مقالے وچ پیش کیتی جان والی رائے مقالہ نگار دی ذاتی رائے سمجھی جائے گی۔ ادارے دا اوہدے نال متفق ہونا ضروری نہیں۔
- 3- مقالہ نگار حضرات جیہڑی لکھت کھوج وچ چھپن لئی بھجوان، اوہ کسے ہور رسالے یا اخبار نوں نہ گھلن۔
- 4- کھوج وچ چھاپن توں پہلے ہر مقالے بارے گھٹو گھٹ دو ماہراں دی تحریری رائے (Blind Review) لئی جاندی اے تے ایسے رائے دی روشنی وچ مقالے کھوج وچ شامل کیتے جانداں نیں۔
- 5- مقالہ نگار حضرات مقالہ کمپوز کر کے پوری احتیاط نال پروف ریڈنگ کرن توں بعد سی ڈی سمیت بھجوان۔
- 6- مقالہ مناسب خط وچ کمپوز کیتا جاوے تے اصلاح/کانٹ چھانٹ لئی آسے پاسے تے فٹ نوٹ وچ مناسب جگہ چھڈی جائے۔
- 7- مقالہ مسلسل تحریر کیتا جاوے تے سارے حوالے آخر اُتے دتے جان۔
- 8- حوالے تحقیق دے معیاری طریقیاں مطابق دتے جان۔ مثلاً:  
لکھاری داناں: کتاب داناں؛ مقام اشاعت، سن اشاعت، صفحہ نمبر
- 9- ہر قسم دی خط کتابت تھلے دتے ہوئے پتے اُتے کیتی جاوے۔

بِسْمِ اللَّهِ الرَّحْمَنِ الرَّحِيمِ

## نعت

واہ کریم اُمت دا والیؑ ، مہر شفاعت کردا  
جبرائیلؑ جیسے جس چاکر ، نبیاں دا سر کردہ  
اوہ محبوب حبیبؑ ربانا ، حامی روز حشر دا  
آپؑ یتیم یتیمان تائیں ، ہتھ سرے پر دھردا

(میاں محمد بخشؒ)

## فہرست

7	مدیر	☆ اداریہ
9	پروفیسر ڈاکٹر سید اختر جعفری	☆ میاں محمد بخش دی شاعری اُتے فارسی اثرات
43	ڈاکٹر ناہید شاہد	☆ منیر نیازی دی شاعری وچ چتر کاری
53	ڈاکٹر محمد سلطان شاہ	☆ راجا رشید محمودی شاعری وچ قرآن تے حدیث دے حوالے
67	عباد نبیل شاد	☆ تمہای ”انکھ“ لنگن پور وچ چھپیاں لکھتاں دی ہیلو گرافی
85	شاہین کرامت	☆ شائستہ حبیب..... حیاتی تے فن
99	زبیر احمد قاضی	☆ مولانا محمد اشرف اصغر
119	پروفیسر ڈاکٹر عصمت اللہ زاہد	☆ کشف الحُجُوب دا پنجابی ترجمہ
		شریف صابر د علمی ادبی کارنامہ
129	ڈاکٹر نوید شہزاد	☆ پنجابی گیتاں وچ قومی / ملی جذبہ



## اداریہ

پنجابی زبان دی گنتری دنیا دیاں قدیم ترین زباناں وچ ہوندی اے۔ یقیناً ایہدا ادب وی اونا ای قدیم اے، پر ایس ورثے دی سانجھ سمھال دا آہر کسے سہ وی اوس طرح نہیں کیتا گیا جیویں ہونا چاہی داسی۔ تحقیقی مجلہ ”کھوج“ ایسے شناخت نوں سمھالن تے قائم دائم رکھن دا جتن اے۔ ایس شمارے دا پہلا مقالہ پروفیسر ڈاکٹر اختر جعفری دا ”میاں محمد بخش دی شاعری اُتے فارسی اثرات“ اے۔ جیہدے وچ پنجاب وچ فارسی دی ہوند تے میاں صاحب دی شاعری اُتے فارسی اثرات دا مثالاں راہیں جائزہ لیا گیا اے۔ ڈاکٹر ناہید شاہد دے مقالے ”منیر نیازی دی شاعری وچ چتر کاری“ وچ جدید پنجابی شاعری دے معتبر تخلیق کار منیر نیازی دے فن اُتے اوہدیاں لفظی تصویراں راہیں گل کیتی گئی اے۔ راجا رشید محمود نعت رسول ﷺ دے حوالے نال وڈاناں اے۔ ڈاکٹر محمد سلطان شاہ نے راجا رشید محمود دی نعتیہ شاعری وچ قرآن تے حدیث دے حوالیاں نوں سامنے لیاند اے تے نال نال قرآنی آیتاں تے حدیثاں دا متن وی دتا اے۔ کدی کنگن پور، قصورتوں تمہاں ”انکھ“ نکلد اہوند اسی، فیر بند ہو گیا۔ عبادنبیل شاد نے ”کھوج“ لئی خاص طور تے ایس رسالے دی بلیو گرافی مرتب کیتی اے، جیہڑی تمہاں دے تعارف سنے ”کھوج“ دا حصہ بنائی گئی اے۔ شائستہ حبیب اردو دے نال نال پنجابی دی وی چنگی لکھاری سی۔ اوہناں دی حیاتی تے فن دے حوالے نال مقالہ نگار شاہین کرامت نے واہوا معلومات کٹھیاں کیتیاں تے کئی اک نویں



انگ وی سامنے لیاندے نیں۔ مولانا محمد اشرف اصغر دی حیاتی تے فن دے حوالے نال قاضی زبیر دا بھرواں مقالہ اے۔ جیہدے وچ مولانا دے سسے دی حیاتی تے آل دوال دے جھلکارے وی وسدے نیں۔ ”کشف المحجوب“ تصوف دی اک اہم کتاب اے۔ شریف صابر نے ایس دا پنجابی ترجمہ کیتا۔ راقم نے اپنے مقالے وچ ایس ترجمے دا تحقیقی تنقیدی جائزہ لیا اے۔ جدوں کہ شمارے دا آخری مقالہ ”پنجابی گیتاں وچ قومی تے ملی جذبہ“ ڈاکٹر نوید شہزاد دا کھوج لیکھ اے۔ جیہدے وچ قوم دی تعریف متھن توں وکھ قومی شاعری دی جیون وچ اہمیت تے ضرورت بارے شعری مثالیں راہیں گل کیتی اے۔ ایس طرح مختلف موضوعات پٹھاں لکھے گئے ایہہ تحقیقی مقالے اوس گلڈستے دی حیثیت رکھدے نیں جیہدے وچ ہر طرح دی من بھاونی خوشبو سَنگھی جاسکدی اے۔ آس اے تہانوں ایہہ سارے کھوج لیکھ پسند آؤن گے۔

— مدیر



Khoj  
Research Journal Deptt. of Punjabi  
Language & Literature  
Vol:31, Jul-Dec. 2008, pp 9-42

کھوج  
تحقیقی مجلہ شعبہ پنجابی زبان و ادب  
جلد 31، جولائی دسمبر 2008ء شماره نمبر 1

## میاں محمد بخش دی شاعری اُتے فارسی اثرات

☆ پروفیسر ڈاکٹر سید اختر جعفری

### Abstract

This informative essay is written by Dr. Syed Akhtar Jafri. In the beginning of the essay, the writer has discussed the Punjab-Iran relationship with the reference of Persian literature. Then, the development of Persian language and literature in the British and Sikh regime is also being discussed and has been concluded that Persian was the ruling as the official language even in the Sikh regime. And finally, Persian effects on the Punjabi poetry are discussed in detail, with considerable examples from the Punjabi poetry.

### پنجاب تے ایران دے تعلقات تے فارسی ادب

برصغیر پاکستان ہند تے ایران وچکار ہزاراں ورھے پرانا سمبندھ اے۔ ایس سمبندھ بارے ہن تیکر کافی کھوج ہو چکی اے تے جیویں جیویں کھدائی کا کم اگانہہ ودھ رہیا اے۔ ایہناں دوہاں ملکاں وچکار سمبندھ دیاں کئی نویاں پرتاں ساڈے سامنے آرہیاں نیں۔ تاریخ دسدی اے

☆ 201۔ جی ماڈل ٹاؤن، لاہور

پہلی ایران دے مشہور ہخامنشی خاندان دا سب توں وڈا بادشاہ داریوش اعظم (522 تا 486 ق م) جدوں تخت اُتے بیٹھتے اوس نے 518 ق م وچ پنجاب تے سندھ دا علاقہ فتح کر کے ایرانی سلطنت وچ شامل کر لیا۔ ایس بارے ڈاکٹر باقر ہوراں دا خیال اے:

“Yet this remains an established fact that the Historical connection between Iranian and the people of the sub-continent began from the times of the great Achaemenian King Darius”<sup>(1)</sup>

ایہناں دوہاں مکاں وچکار سمبندھ دا ثبوت پارسیاں دی مقدس کتاب اوستا (AVESTA) وچوں لکھدا اے۔ خاص طور تے پنجاب دے علاقے دا ذکر ونیداد (1.19-VENIDAD) وچ موجود اے۔ اوہدے وچ آہو رمزدا دا بیان انج درج اے پئی ”سولائ بہترین تھاواں وچوں پنڈرھویں بہترین تھاں ہپت ہندو (HAPTA HINDU) اے“<sup>(2)</sup> جیہڑی مشرق توں مغرب ول پھیلی ہوئی اے۔ ہپت ہندو توں مراد ستاں دریاواں<sup>(3)</sup> دی سر زمین اے تے ایہہ اوستا وچ پنجاب تے سندھ دی سر زمین داناں اے۔

تیوگرگھ دی کھدائی نال پُرانی تہذیب دے جیہڑے آثار لیکھے نیں اوہناں توں ہخامنشی دور دے پنجاب تے ایران دی سانجھ ثقافت دا ثبوت ملدا اے کیوں جے اوس دور دے متش بھانڈے، قبریں دے نمونے تے آتشدان دوہاں مکاں وچ اکو جیسے نیں۔ ایہناں دوہاں مکاں وچکار ایہہ سیاسی تے سماجی سمبندھ دو جی صدی عیسوی تک قائم رہیا تے اوس دور وچ ایران دی زبان فارسی یا دری نہیں سی۔ سگول دری دی مڈھلی شکل سی۔ جس نوں بقول ریوبن لیوی<sup>(4)</sup> (Reuben Levy) پہلوی یا پارتھوی آکھیا جانداسی۔ پہلی تے دو جی صدی عیسوی وچ پنجاب تے سندھ دے علاقے اُتے کشان قبیلے دا قبضہ سی۔ ایس قبیلے نے (ایہہ یوچی قوم کا اک قبیلہ سی) وسط ایشیا توں اُٹھ کے 25ء وچ پنجاب اُتے قبضہ کر لیا سی۔ کشان قبیلے دا مشہور سردار کنشک سی جیہڑا 781ء وچ تخت اُتے بیٹھتے اوس نے پرش پور (پشاور) نوں اپنی راج دہانی بنایا۔<sup>(5)</sup> اوس نے کشمیر، ختن، کاشغر تے ایران دے مشرقی علاقے فتح کر کے اپنی سلطنت وچ شامل کر لئے۔ ایران تے پنجاب دے آپوں وچ سمبندھ پاروں اتھے فارسی زبان دا کجھ عرصہ تک رواج ہويا۔ فیر ایسے دور وچ مانی نے

اپنے مذہب دی تبلیغ شروع کیتی تے ایسے سلسلے وچ (215/216ء-276ء) اوہ ہندوستان آیا۔ اوس نے چین تے تبت دے علاقے وچ وی اپنے مذہب دی تبلیغ کیتی پر جدوں اوہ ایران پر تیا تے ساسانی خاندان دے بادشاہ بہرام (273ء-276ء) نے اوس نوں قید کر کے قتل کر دتا<sup>(6)</sup> پر اوس دے دورے نال اتھے فارسی زبان و دھن پھلن دا موقع ضرور ملیا۔ آوا جائی دے سلسلے وچ ترقی ہون نال دوہاں ملکاں وچکار زبان و ٹاندر اوی ہويا۔ دوہاں زبانوں نے اک دوجے نوں متاثر کیتا۔ ایس توں اڈ ویلے کویلے مسلمان صوفی، شیخ تے اسلام دے مبلغ وی تبلیغ دی خاطر ہندوستان آوندے رہے۔ سنسکرت دیاں کئی کتاباں دے فارسی تے عربی وچ ترجمے ہوئے۔

اک دفعہ خلیفہ ہارون الرشید سخت بیمار ہو گیا۔ عرب دے سارے حکیم اوسدا علاج کردیاں تھک ہار گئے۔ کسے مشورہ دتا پئی ہندوستان دے منکا (مانک) ویدنوں سدیا جاوے۔ خلیفہ نے اوس نوں بھاڑا دے کے سد گھلیا۔ اوہدے علاج نال خلیفہ تندرست ہو گیا۔ خلیفہ نے خوش ہو کے اوس نوں انعام دتا تے دارالترجمہ وچ سنسکرت دیاں کتاباں دا ترجمہ کرن اُتے لا دتا۔<sup>(7)</sup> منکا نے بغداد وچ اسلام قبول کر لیا سی۔ جیہدے بارے الحافظ ”کتاب الحیوان“ وچ لکھدا اے:

“This Manaka al Hindi was a good Mulsim. He Embraced Islam after discussion through investigation and careful consideration.”<sup>(8)</sup>

خلفاء عباسیہ دے دور وچ کئی سنسکرتی کتاباں دے ترجمے عربی تے فارسی وچ ہوئے۔ اوہناں وچوں چندر گپت (322، 298 ق م) دے وزیر چانکیہ دی کتاب دا ترجمہ منکا (مانک) دی نگرانی وچ ہويا۔ ایس توں اڈ سشرت تے چرک دیاں کئی کتاباں دے ترجمے ایسے دور یعنی خلیفہ ہارون الرشید (786ء-809ء) دے عہد وچ ہوئے۔ ”فیر کلیمہ دمند تے پنچ تنتر“ دا ترجمہ ساسانیاں دے عہد حکومت وچ فارسی وچ ہويا<sup>(9)</sup>۔ جیہدے نال دوہاں ملکاں دے وسنیکاں نوں اک دوجے دے علوم فنون تے زبان سمجھن دا موقع ملیا۔ مکران دا علاقہ ایران توں نیڑے سی۔ ایس لئی اوہوں دے وسنیکاں اُتے ایران دا ثقافتی، لسانی تے ادبی اثر ساناواں پیا۔ دسویں صدی عیسوی وچ مکران دے وسنیک مکرانی دے نال نال فارسی وی بولدے سن ایس گل دا ثبوت

سانوں الا صخری توں لکھدا اے۔ اوہ لکھدا اے:

”و كذلك زى اهل الملتان لباسهم الازر و المياز و لسان  
اهل المنصورة و الملتان و نواحيها العربية و السنديّة و لسان  
اهل مكران الفارسية و المكريّة۔“<sup>(10)</sup>  
(ملتان تے منصورہ دے وسنیک پاجامہ تے چونہ پہندے نیں۔ ملتان تے  
اودے آلے دوالے دے علاقیاں وچ عربی تے سندھی بولی جاندی اے۔  
مکران دے وسنیک فارسی تے مکرانی بولدے نیں)

ایس طرح ہولی ہولی ایرانی تہذیب تے زبان دے اثرات پنجاب اُتے پیندے  
رہے۔ فیروزی (997ء-1030ء) نے جدوں ہندوستان اتے حملہ شروع کیتے تے  
اودے نال بہت سارے عالم تے مبلغ ہندوستان آئے، جیہناں نے نہ صرف برصغیر وچ اسلام دی  
اشاعت کیتی سگوں فارسی زبان دی مقبولیت دا سبب وی بنے۔ محمود غزنوی دے دربار وچ فردوسی،  
عنصری، عسجدی تے فرخی مشہور شاعر سن۔ عسجدی سومنات دی مہم وچ سلطان محمود دے لشکر وچ  
شریک سی۔<sup>(11)</sup> ایہناں شاعراں دا کلام برصغیر ہندوستان وچ بہت مقبول ہويا۔ سلطان محمود غزنوی  
دے پتر سلطان مسعود دے لشکر نال لاہور وچ حضرت داتا گنج بخش جھویری (1009ء-1072ء)  
تشریف لیائے، جیہناں نے اپنی مشہور زمانہ کتاب کشف المحجوب فارسی وچ لکھی۔ ابراہیم غزنوی  
دے زمانہ حکومت (1059 تا 1098ء) وچ لاہور علمی سرگرمیاں تے فارسی زبان دا گڑھ بن چکا  
سی۔ ”ابراہیم دا اک وزیر ابونصر فارسی جیہڑا ادبی دلچسپیاں پاروں ادیب مشہور سی اوس نے لاہور  
وچ اک خانقاہ قائم کیتی جیہڑی عالماں دی درس گاہ سی۔ ہولی ہولی لاہور، بلخ بخارا تے دوجے  
مکاں دے علماء دا مرکز بن گیا۔<sup>(12)</sup> اوس زمانے وچ لاہور وچ فارسی دی مقبولیت دا گویا ایہتھوں  
لایا جاسکدا اے پئی ایہتھوں دا وسنیک مسعود سعد سلمان<sup>(13)</sup> فارسی دا صاحب دیوان شاعر ہويا۔  
جیہڑا لاہور نوں اپنا وطن قرار دیندیاں لکھدا اے:

مولدم لاہور و از لاہور دُور

وینک اے لاہور بے توکے سرور

مسعود سعد سلمان ایک شعلہ نوا شاعر توں اڈ بہادر سپاہی وی سی۔ اوس نوں جدوں سلطان

ابراہیم بن مسعود نے قلعہ نائے (دجیرستان) وچ قید کر دتا تے اوس نے لاہور نوں ایس طرح یاد  
کیتا:

اے لاہور دیتھک بے من چگونہ  
بے آفتاب روشن ، روشن چگونہ  
تو مرغزار بودی و من شیر مرغزار  
بامن چگونہ بودی بے من چگونہ

سلطان ابراہیم غزنوی دے دربار دا اک شاعر ابوالفرج رونی (وفات 1091ء) سی۔  
جیہڑا کجھ تذکرہ نویساں دے بیان دے مطابق لاہور دے آلے دوالے دارہن والا سی۔ اوہ قصیدہ  
نگاری وچ بے مثال سی۔ ایہتوں تیک پئی فارسی دا مشہور قصیدہ گو انوری وی اوس نوں اُستاد من دا  
اے۔<sup>(14)</sup> غزنوی دَور وچ ای مشہور سیاح تے لکھاری البیرونی برصغیر آیا تے ایہتوں دے  
حالات بارے اپنی مشہور لکھت کتاب الہند فارسی وچ لکھی۔ اوس دَور وچ فارسی زبان تے ادب  
برصغیر پاکستان تے ہند وچ چنگی مقبولیت حاصل کر چکا سی۔ اوس دَور دیاں علمی تے ادبی سرگرمیاں  
بارے شیخ اکرام لکھدے نیں:

”لاہور اُس زمانے میں صحیح معنوں میں ”غزنین خورد“ تھا اور شہر کی ادبی، علمی  
روحانی زندگی شباب پر تھی۔ عوفی نے مختلف ممالک کے فارسی شعراء کے  
حالات لکھے ہیں۔ ان میں لاہور کا ذکر مختصر سا ہے۔ تذکرہ نگار اس برصغیر  
میں اس وقت پہنچا جب لاہور کے چمن میں خزاں آچکی تھی۔ لیکن اسکی کتاب  
کو بغور دیکھنے سے اندازہ ہوتا ہے کہ لاہور میں علم و ادب کا بڑا چرچا تھا۔  
بلکہ لاہور کے علماء فضلا کی ممالک اسلامی میں بڑی قدر تھی۔“<sup>(15)</sup>

عوفی نے اپنے تذکرہ وچ جمال الدین علی لاہوری، ابن احمد الہوری، خطیر الدین جیسے  
شاعراں تے عالماں دا ذکر کیتا اے۔ اوہناں توں اڈ مسعود رازی (ابوالفرج رونی دے والد)  
عطا بن یعقوب تے ابو جعفر عمر بن اسحاق، ابوالبرکات منیر لاہوری (1609 تا 1645ء)۔ چندر  
بھان برہمن لاہوری (وفات 1662ء) تے غنیمت کنجاہی (وفات 1695ء) پنجاب وچ فارسی  
دے اُچے شاعر تے عالم ہوئے نیں۔

ابن لئی غزنوی خاندان مگروں جدوں شہاب الدین غوری نے 1193ء وچ ہندوستان وچ مضبوط تے پکی پیڈی اسلامی حکومت دی نینہہ رکھی ایتھوں دے وسینک چنگی بھلی فارسی جاندے سن۔ پھیر خاندان غلاماں دے دور وچ کئی مدرسے قائم ہوئے جیہناں وچ فارسی دی تعلیم دتی جاندی سی۔ اتمش دے عہد وچ دو اچے مدرسیاں معزیہ تے ناصر یہ دے ناں مشہور سن اوہناں دا انتظام قاضی منہاج سراج مصنف طبقات ناصری دے سپرد سی۔“ (16)

مشہور زمانہ کتاب طبقات ناصری وی فارسی زبان وچ لکھی گئی۔ اوس دور دا اک شاعر بہاء الدین اوشی سلطان قطب الدین ایبک دی سخاوت بارے لکھدا اے:

اے بخشش لک تو در جہاں آوردہ      کاں راکف تو کار بجاں آوردہ  
از رشک کف تو خون گرفتہ دل کان      وز لعل بہانہ در میاں آوردہ (17)

ایسے زمانے وچ فخر مدبر نے اپنی کتاب جنگی فنون بارے آداب الحرب دے ناں نال فارسی وچ لکھی۔ سعید الدین محمد عوفی دا فارسی شاعراں دا تذکرہ وی ایسے دور دی یادگار اے۔ امام غزالی دی احیاء العلوم دا فارسی ترجمہ موید جرجانی نے ایسے زمانے وچ کیتا تے امام رازی دی ستر مکتوم دا فارسی ترجمہ وی ہویا۔ ایس دور دے فارسی شاعراں وچوں تاج الدین سنگریزہ، امیر روحانی تے ناصری اچھے ذکر دے قابل نیں۔ ایہناں شاعراں دے کلام تے فارسی کتاباں دے تراجم نے علمی تے ادبی پدھر اُتے پنجاب دے وسینکاں نوں چنگا متاثر کیتا۔ خاندان غلاماں مگروں ہندوستان دی حکومت خلجی خاندان دے ہتھ آئی۔ خلجی حکومت دا موڈھی جلال الدین خلجی آپوں فارسی دا شاعری۔ تاریخ دیاں کتاباں وچ کدھرے کدھرے اوہدے شعر درج نیں مثلاً:

آن زلف پریشانت ژولیدہ نمی خواہم      وان روی چو گلنارت تفسیدہ نمی خواہم  
پیرہنت خواہم یک شب بکنار آئی      ہان بانگ بلند است این پوشیدہ نمی خواہم (18)

ابن دور دا سب توں وڈا فارسی شاعر ابوالحسن بکین الدین امیر خسرو سی جیہدیاں لکھتاں

دی گنتی 99 دی جاندی اے۔

امیر خسرو توں اڈ ایس زمانے وچ امیر حسن، ضیاء الدین برنی، صدر الدین عالی، فخر الدین قورش، مولانا عارف، شہاب انصاری تے کبیر الدین بڑے وڈے عالم تے فاضل سن۔ 1321ء وچ غیاث الدین تغلق نے تھانیر دے مقام اُتے خسرو نوں بھانج دتی تے دلی اُتے تغلق

خاندان دا قبضہ ہو گیا۔ اوس نے ہندوستان وچ اسلام تے فارسی زبان و ادب دا نویں سروں چرچا کیتا۔ ایس دور وچ فارسی ادب نے چنگی بھلی ترقی کیتی۔ سلطان محمد تغلق آپوں فارسی دا نغز گو شاعر سی۔ ایس عہد دے شاعراں وچوں بدر چاچ۔ مُطہر (1316ء تا 1388ء) مشہور نیں۔ علماء وچوں ضیا بخش، معین الدین عمرانی تے عصامی دے ناں ذکر دے قابل نیں۔

1526ء وچ ظہیر الدین بابر نے ابراہیم لودھی توں ہندوستان دی حکومت حاصل کر کے ہندوستان وچ مغلیہ سلطنت دی بنیہ رکھی۔ ہند تے پنجاب وچ ایہہ دور فارسی زبان تے ادب دا سنہری دور ثابت ہو یا۔ بابر فارسی ادب تے زبان دا عاشق سی۔ اوہ آپ وی شاعر سی۔ 1545ء وچ ہمایوں شیر شاہ سوری توں شکست کھا کے ایران بھج گیا۔ 1555ء وچ جدوں شاہ طہماسپ صفوی دی مدد نال ہندوستان اُتے دوبارہ قابض ہو یا تے اوہ دے نال ان گنت ایرانی سپاہی امراء تے علماء سن۔ اوس سے ایران تے ہندوستان نال زیادہ قریبی تعلقات دا مڈھ بچا۔ جیہدی وجہ نال ہندوستان دی اسلامی تہذیب وچ ایرانی اثرات تورانی تے عرب اثرات نالوں زیادہ اگھڑویں ہو گئے،<sup>(19)</sup> ایس توں پہلاں وی ہندوستانی مسلماناں دی ادبی تے درباری زبان فارسی سی تے ایران توں قابل علماء شعرا تے شیوخ استھ آندے رہے سن پر ہمایوں دے سے ایہہ سلسلہ بہت وسیع ہو گیا۔ ایران دے وڈے وڈے شاعر مثلاً عرفی، نظیری، مشہور مصور خواجہ عبدالصمد، میر علی فرخ تے قابل مدبر علی مردان تے آصف خان وغیرہ ہمایوں دے جانشیناں دے عہد وچ ہندوستان آئے۔<sup>(20)</sup> ایہناں مشہور بندیاں دے آون نال لوکائی وچ فارسی ادب تے زبان نوں ودھن پھلن دا بڑا موقع ملیا۔ مغل بادشاہ وی ایس زبان دی سرپرستی کردے اوس سے مدرسیاں وچ فارسی دی تعلیم عام سی۔ دفتری تے درباری زبان وی فارسی ای سی۔ پڑھے لکھے ان پڑھ عزیزاں تے بیلیاں نال مقامی بولیاں وچ گل کتھ کر دے سن اوہناں دی گفتگو وچ بدو بدی فارسی لفظ آجاندے سن تے ان پڑھ بندے اوہناں نوں یاد کر لیندے سن تے پھیر ہولی ہولی اوہ وی روزمرہ دی گل کتھ وچ فارسی لفظ ورتن لگ پیندے سن۔ ایس لئی ان پڑھ بندیاں نوں وی فارسی دے سینکڑیاں شعر زبانی یاد ہو جاندے سن۔ ہمایوں نے دلی وچ یونیورسٹی دی پڑھرا تے اک مدرسہ تعمیر کیتا۔ ایس مدرسے وچ دوروں دوروں طلبا تعلیم حاصل کرن لئی آندے سن۔<sup>(21)</sup> مغل عہد وچ تعلیم دامت انتظام سی تے طالب علماں نوں وظیفے دتے جاندے سن۔ شاہجہان نے دلی وچ ای اچی پدھرا



مدرسہ قائم کیتا تے اورنگ زیب نے زنانیاں واسطے فنی تعلیم دا بندوبست کیتا، پر ایہہ ساری تعلیم فارسی وچ ای دتی جاندی سی۔ ایسے پاروں ڈاکٹر سید عبداللہ لکھدے نیں:

”پئی فارسی زبان تے ادب نوں جیہڑی ترقی مغلاں دے عہد وچ حاصل ہوئی اوہ کیسے ہور عہد وچ حاصل نہ ہو سکی۔ مغلاں دے عہد وچ فارسی نہ صرف سرکاری زبان سی سگوں حساب کتاب، وقائع نویسی، تاریخ نویسی تے روزنامے وی فارسی زبان وچ لکھے جاندے سن۔ سکھاں تے مرہٹیاں نے ایس زبان نوں ایس لئی اپنایا کہ اوہ اوہناں علاقیاں اُتے قابض ہو گئے سن جیہڑے کسے زمانے وچ علوم تے فنون دے گڑھ سن۔“ (22)

### انگریزی دَوَروچ فارسی ادب

مغلاں مگروں جدوں 1857ء وچ ہندوستان دی حکومت انگریزاں ہتھ آئی اوس سے پنجاب تے بنگال وچ کئی ایسے مدرسے موجود سن جیہناں وچ فارسی زبان تے ادب دی تعلیم دتی جاندی سی۔ بقول پروفیسر آرنلڈ ”ایہناں سکولاں وچ ہندو طالب علم زیادہ ہوندے سن۔ حالان پنجاب وچ مسلماناں دی تعداد زیادہ سی۔“ (23) انگریزاں نے اپنے عہد دے مڈھ وچ کچھ سکول تے کالج قائم کیتے جیہناں وچ فارسی تے عربی دی تعلیم دتی جاندی سی۔ وارن نے 1871ء وچ کلکتہ وچ مدرسہ عالیہ قائم کیتا، جس دا مقصد مسلمان نوجواناں نوں عربی تے فارسی دی تعلیم دینا سی۔ تاں جے اوہ حکومت دے کچھ عہدیاں اُتے کم کر سکن۔ ولیم ڈکن نے 1791ء وچ بنارس وچ ہندو سنسکرت کالج قائم کیتا جیہدے وچ سنسکرت توں اڈ فارسی دی وی تعلیم دتی جاندی سی۔ 1784ء وچ سر ولیم جونز نے ایشیاٹک سوسائٹی بنگال دی ینہہ رکھی جس دا مقصد مشرقی علوم وچ تحقیق تے لوکائی وچ علم داشوق پیدا کرنا سی۔

”1800ء میں لارڈ ولزلی نے کلکتہ میں فورٹ ولیم کالج قائم کیا جس کا مقصد کمپنی کے ملازمین کو عربی، فارسی اور سنسکرت کی تعلیم دینا تھا۔ اس کالج کے مشہور اساتذہ ڈاکٹر جان گلکراسٹ، جان بیللی، ولیم کرک پیٹرک، فرانس گلیڈون، ولیم ایڈمانسٹن تھے۔ ہر ایک عالم فاضل اور قابل اُستاد تھا۔“ (24)

1814ء توں 1835ء تک ہر دا زمانہ ہندوستان وچ فارسی زبان تے ادب دی ترقی دا زمانہ سی۔ فارسی پڑھن والے طالب علماں دی حوصلہ افزائی کیتی جاندی سی۔ فارسی کتاباں دی اشاعت وسیع پیمانے اُتے ہوندی سی۔ 1822ء وچ پنڈت گنگا دھر دے عطیے نال آگرہ وچ اک کالج قائم کیتا گیا۔ جیہدے وچ ہور زباناں دے نال نال فارسی وی پڑھائی جاندی سی۔ ایسے طرح 1827ء وچ دہلی کالج قائم ہويا اوہدے وچ وی فارسی پڑھائی جاندی سی۔ ایس مگروں فارسی زبان تے ادب دا ہندوستان وچ زوال شروع ہو گیا انگریزاں نے اپنی حکمت عملی نال اک اچھی جماعت پیدا کر لئی جیہڑی فارسی دی تھاں انگریزی رائج کرن دے حق وچ سی۔ ایس جماعت دے وڈے لیڈر راجہ موہن رائے سن۔ اخیر 1829ء وچ ایہہ فیصلہ ہويا پئی فارسی دی تھاں انگریزی نوں دفتری زبان قرار دتا جائے تے عدالتاں وچ انگریزی رائج کیتی جائے، پراس فیصلے اُتے عمل نہ ہو سکيا۔ پھیر 1844ء وچ فارسی نوں ختم کر کے انگریزی نوں دفتری زبان بنا دتا گیا۔<sup>(25)</sup>

### سکھئی دور وچ فارسی

پنجاب وچ سکھئی دور وچ فارسی نوں سرکاری زبان دا درجہ حاصل سی۔ روزنامے، واقعات دیاں مسلاں فارسی وچ تیار کیتیاں جاندیاں سن تے ایسے زبان وچ انگریزاں نال خط و کتاب ہوندی سی تے معاہدے لکھے جاندے سن۔ مہاراجہ رنجیت سنگھ (2 نومبر 1780ء توں 1839ء)<sup>(26)</sup> دا دربار ہندواں تے مسلماناں دا مرکز سی۔ حکیم عزیز الدین انصاری، فقیر نور الدین، منشی سبحان رائے، مصریلی رام، دیوان امر ناتھ اکبری، دیوان دینا ناتھ تے دیوان گنگا رام منے پر مئے فارسی دے عالم سن۔ ایسے دور وچ فارسی نامہ یاں فرہنگ خوش رنگ لکھی گئی۔ ایہہ کتاب مولانا عبدالرحمن غلدی<sup>(27)</sup> نے پنجاب دے وسنیکاں نوں فارسی زبان سکھاؤن لئی ترتیب دتی سی۔ ایسے لئی فارسی مصادر لکھ کے اوہناں دا پنجابی وچ ترجمہ لکھیا گیا اے۔<sup>(28)</sup>

ایس دے باوجود سکھاں دے دور وچ فارسی نے کوئی خاص ترقی نہ کیتی۔ 1849ء وچ جدوں پنجاب اُتے وی انگریزاں دا قبضہ ہو گیا تے اوہناں نے پنجاب وچ وی انگریزی طرز دے سکول کھولے، دفتری تے سرکاری زبان انگریزی نوں قرار دتا۔ ایہناں حالات وچ وی پنجاب

وچ فارسی دے دو اگھے شاعر ہوئے جیہناں نے فارسی دا جھنڈا چکی رکھیا تے فارسی علم تے ادب دی ڈھیندی ہوئی کندھ نوں سہارا دتا۔ اوہ سن گرامی جالندھری (وفات 1927ء) تے علامہ اقبال (1877ء توں 1938ء)۔ گرامی جالندھری تے نظام حیدر آباد دکن دے دربار وچ ملازم ہو گئے پر علامہ اقبال نے آزاد فضا وچ رہ کے اپنے خیالاں نوں فارسی دے سچے وچ ڈھالیا۔ شیخ اکرام دا خیال اے:

”اقبال غالب کا مداح تھا اور بیدل کا عقیدت مند۔ وہ ہماری فارسی ادبی روایات سے پوری طرح بہرہ ور تھا لیکن اس کا نقطہ نظر وسیع اور نگاہ بلند تھی۔ اس نے مقامی روایات پر اکتفا نہیں کی بلکہ باہر کے بہترین فارسی شعراء سے استفادہ کیا۔ اُس کے ہاں حافظ کا تغزل اور رومی کی گہرائی ہے اور بعض نظمیں قاآنی کی یاد دلاتی ہیں،“ (29)

علامہ اقبال مگروں پنجاب دے فارسی شاعراں وچوں آغا صادق، صوفی تبسم، عابد علی عابد دے ناں ذکر دے قابل نیں۔

### پنجابی شاعری اُتے فارسی اثرات

ایہہ مٹی پر مٹی حقیقت اے پئی جدوں وی کوئی قوم دوجی قوم اُتے غالب آئی اے تے مغلوب قوم نے ہمیشہ غالب قوم دی زبان تے روہ ریت توں اثر لیا اے۔ اُنج وی لسانیات دا ایہہ اصول اے پئی جدوں دو قوماں آپوں وچ لین دین کردیاں نیں تے اوہناں دیاں زبانان اکدو جے توں ضرور اثر قبولدیاں نیں۔

جس طرح اسپس پچھے بیان کیتا اے پئی ایران تے پنجاب دے نہ صرف کاروباری رابطے رہے نیں سگوں ایران تے افغانستان دے بادشاہاں نے پنجاب نوں کئی واری فتح کر کے اپنی سلطنت وچ شامل کیتا۔ اوہناں دی زبان فارسی سی تے فاتح دی زبان توں اثر قبولنا اک فطری گل اے۔ ایس لئی پنجاب وچ ہر دور وچ فارسی دا چرچا رہیا۔

مڈھلے دور وچ پنجابی کوئی علمی تے ادبی زبان نہیں سی اوس نوں صرف خاص علاقے دی بولی دی حیثیت حاصل سی۔ ایس لئی پنجاب وچ جدوں مسیتاں وچ یاں مسیتاں توں اڈ مدرسے

قائم کیے گئے۔ تدریس دا سلسلہ شروع ہو یا تے فارسی عربی کتاباں پڑھائیاں گئیاں۔ عربی زبان دی تدریس مذہب دے حوالے نال ہوئی۔ ایس لئی قرآن مجید، احادیث، تفاسیر تے فقہ ایہناں مدرسیاں وچ پڑھایا گیا۔ فارسی دی تعلیم زبان تے ادب دے حوالے نال دتی گئی۔ ایس لئی پنجاب دے اکثر مدرسیاں وچ سعدی دی کریمیا، گلستان، بوستان، عطار دا پندنامہ، کاشفی دی انوار سہیلی، اخلاق محسنی، جامی دی یوسف زلیخا تے لواح، نظامی گنجوی دا اسکندرنامہ، مولانا روم دی مثنوی معنوی، فردوسی دا شاہنامہ، مصدیاں تیکر پڑھائے جان دے رہے۔ ایہناں توں اڈعوام وچ دیوان حافظ تے رباعیات خیام وی چنگے مقبول سن، تے لوکاں نوں حافظ تے سعدی دے ہزاراں شعر زبانی یاد سن۔ ایس لئی کسے لفظ دی بحث وچ فارسی دے شعرتوں سند دیندے سن تے عام گل کتھ وچ فارسی شعراں تے لفظاں دی ورتوں سی۔ جس طرح اجکل پڑھے ہوئے بندے تے ان پڑھ وی اپنی گل کتھ وچ انگریزی دے لفظ عام بولدے نیں تے اوہناں نوں اپنی گل کتھ وچ ایہناں انگریزی لفظاں جیویں ٹکٹ، اسٹیشن، ریڈیو، بائیسکل، ٹیلی ویژن، ٹرین، فلم، سینما، تھیٹر، بس، ویگن، سٹاپ، موٹر، سکوٹر، کار، سگریٹ، ماچس، گلاس، پلیٹ، کپ، سکول، کالج، یونیورسٹی، اسمبلی ہال، میٹنگ، ہائی کورٹ، فوٹو، کیمرا وغیرہ دی اجنبیت تے غیریت دا احساس وی نہیں ہوندا۔ ایسے طرح پنجابی زبان دے دھلے دور وچ فارسی زبان تے ادب دا غلبہ سی تے لوکاں فارسی دی چنگی طرح جانوسی۔

ایہہ حقیقت وی دن دے چانن ہار روشن اے پئی فارسی زبان تے ادب نے عربی توں بہت کچھ لیا۔ عربی دے ملاپ توں پہلاں فارسی زبان علمی تے ادبی موضوعات دے اظہار دی سکت نہیں رکھدی سی۔ ایسے لئی تے عرب دے لوک ایرانیوں نوں عجم (گونگے) آکھدے ہوندے سن، عربی زبان دے ملاپ نال فارسی وچ جان پیدا ہو گئی۔ تے اوہ اک اعلیٰ زبان دا درجہ اختیار کر گئی۔ جدوں پنجابی اُتے فارسی اثر انداز ہوئی تے عربی دے وی بہت سارے لفظ، علوم تے فنون فارسی راہیں پنجابی وچ داخل ہوئے۔ ایس طرح پنجابی نے عربی توں گھٹ تے فارسی توں زیادہ اثر قبول کیتا۔ جے گوہ نال ویکھیا جاوے تاں معلوم ہوندا اے پئی فارسی لسانی تے ادبی دو طرح نال پنجابی اُتے اثر انداز ہوئی۔ لسانی اعتبار نال ایس طرح پئی ارج پنجابی وچ سینکڑاں لفظ فارسی دے ورتے جان دے نیں اوہ لفظ ساڈی زبان وچ ایس طرح رچ مچ گئے نیں پئی اسانوں

اوہناں دی غیریت دا اکا ای احساس نہیں ہوندا سگوں انج لگدا اے جیویں اوہ ساڈی ای زبان پنجابی دے لفظ نین تے اسان اوہناں لفظاں نوں آسانی نال سیہان وی نہیں سکدے۔

فارسی دے جیہڑے لفظ ساڈی زبان پنجابی وچ داخل ہوئے اوہناں دیاں چار سورتاں نین جیہناں دا ویرا پٹھاں کیتا جاندا اے۔

1- پہلی صورت فارسی دے اوہناں لفظاں دی اے جیہڑے اپنی اصل شکل صورت وچ پنجابی وچ موجود نین تے اوہناں دے معنے وی اوہو نین جیہڑے فارسی وچ رائج نین: اچیے لفظاں وچوں قول، اقرار، رنج، خوشی، زندگی، موت، صبح، شام، زمین، آسمان، چرخہ، جام، بلبل، قبول، نرگس، ضعف، برباد، ہوشیار، روشن، تازہ، خوش، پاک، چُست، چالاک، بیزار، آباد، بازی گر، دامن، دیگ، پرواہ، آتش بازی، گناہ، تیر، آبرو، رمز، عیب، سخن، وغیرہ وغیرہ۔

2- دوجے فارسی دے اوہ لفظ نین پئی پنجاب دی آب و ہوا، سطح مرتفع، زمین، لوکائی دے خاص نخرے تے گلے پاروں اوہناں دی اصل شکل وگڑ گئی اے پر اوہناں دے معنے نہیں بدلے۔ معنے اوہو رہے نین جیہڑے فارسی وچ رائج نین۔ جیویں سادہ توں سادی بن گیا اے پر معنے اوہو ای نین ایسے طرح مطرقہ بمعنی ہتھوڑا اے۔ پنجابی وچ ایہہ مُطہیر بن گیا اے۔

مہتالی نوں متابی، دیوانہ توں دیوانہ، الم توں الماں، تسبیح توں تسبی، مغرور توں مغروری، قبول توں قبولنا، نہ کارا توں نگارا، عرض داشت توں اُرداس، دائم توں دائما، منزل بہ منزل توں منزلو منزلی، جاروب توں جھاڑو، رومال توں رمال یا رامالی۔

3- تریجی قسم دے اوہ لفظ نین جیہناں دی اصل فارسی اے پر پنجابیاں نے اپنے مزاج دے مطابق اوہناں دائمہ مہاندرا ای بدل دتا اے تے اوہناں دے معنے وی بدل گئے نین۔ جیویں منہی عربی لفظ اے جیہدے معنی برائیاں منع کیتا ہو یا اے۔ اسان ایس لفظ نوں و گاڑ کے مناہی بنا لیا اے۔

صوفی تبسم اپنے اک مضمون وچ ایسے لفظاں دی مثال دیندے ہوئے لکھدے نین:  
”تریجہ پنجابی میں اُس پھل کو کہتے ہیں جو پک کر خود بخود شاخ سے نیچے گر

جاتا ہے اور بچے اٹھا کر کھا جاتے ہیں۔ یہ تریچہ فارسی کے لفظ ”تہ ریزہ“ سے  
 بگڑا ہے حرف، ’ز‘ نے ’ج‘ کی شکل اختیار کر لی اور ’ہ‘ کی مختصر اور مدہم آواز  
 غائب ہو گئی تہ ریزہ سے تریچہ ہو گیا۔<sup>(30)</sup> ایسے طرح فارسی دا لفظ سنسان  
 پنجابی وچ آ کے سمن سان یا سنج مسان بن گیا۔

4- چوتھی قسم اوہناں لفظاں دی اے جیہڑے شکل صورت وچ اوہور ہے نہیں پر اوہناں دے  
 معنی بدل گئے نیں۔ جیویں ہنوار، چینا (دانہ)، چیک (چڑیاں دی آواز)، چیللاں  
 (عقاب)، جلاب (گلاب دا شربت) تقویم (سیدھا کرنا)  
 فارسی دے ایہہ لفظ پنجابی وچ عام ورتے بولے جاندے نیں۔ جے اسیں پنجابی  
 شاعری دا ویروا کرینے تے ساڈی گل دی تصدیق ہو جاندی اے۔

ڈاکٹر موہن سنگھ دیوانہ، ہیرا سنگھ دردتے عبدالغفور قریشی پنجابی ادب نوں اٹھویں ناویں  
 صدی عیسوی توں شروع کر دے نیں۔ ایس دور وچ ناتھ جوگیاں دا کلام ملدا اے جیہڑا اپ  
 بھرنش وٹا اے۔ ناتھ جوگیاں دے ایس کلام دی کوئی پکی پیڈی شہادت وی نہیں لہدی پر بارہویں  
 صدی عیسوی دے چھیکڑے اڈھ وچ پنجابی شاعری دے موڈھی بابا فرید الدین مسعود گنج شکر  
 (1188ء تا 1265ء) ہوئے نیں۔ جیہناں دا تاریخی ثبوت تے کلام ملدا اے۔ تاریخی اعتبار ناں  
 ایہہ خلجیاں دا دور سی۔ ایس دور وچ فارسی کس حد تک پنجابی نوں متاثر کر چکی سی، ایس دا پتہ بابا  
 فرید دے شلوکاں توں لگدا اے آپ فرماندے نیں:

اٹھ فریدا وضو ساز صبح نماز گزار جو سرسائیں نہ نیویں سومر کپ اتار<sup>(31)</sup>

ایس اک شعر دے پہلے مصرعے وچ وضو، ساز، صبح، نماز، گزار، فارسی دے لفظ ورتے  
 گئے نیں۔ ایسے طرح گرونانک جی (1469ء تا 1539ء) دا کلام بھادویں ہندی وئی پنجابی وچ  
 اے پراوس وچ وی فارسی دے لفظاں دی بہت ورتوں اے۔ جیویں اوہناں دا شلوک اے:

اللہ اکھ اگم قادر کرن ہار کریم

سب دُنیا آون جانی مقام ایک رحیم<sup>(32)</sup>

ایس شلوک وچ اللہ، قادر، کریم، دُنیا، مقام، رحیم فارسی تے عربی دے لفظ نیں۔

پنجابی دے دو بے اگے شاعر شاہ حسین لاہوری نیں (1539ء تا 1599ء) ایہہ مغل

عہد اکبر دے سے دے شاعر نہیں۔ ایہہ پنجابی کافی دے پہلے باقاعدہ شاعر نہیں۔ پنجابی وچ ایہناں دیاں کافیاں بہت مشہور نہیں۔ اک کافی دے گجھ شعر ویکھو:

ایہہ نس وں رہی دل میرے، صورت یار پیارے دی  
 باغ تیرا، باغچہ تیرا میں بلبل باغ تہارے دی  
 اپنے شوہ نوں آپ رتجھاواں صاحب نہیں پیارے دی  
 کہے حسین فقیر نمانا، تھیواں خاک دوارے دی (33)

ایس نئی جیہی کافی وچ دل، صورت، یار، باغ، باغچہ، بلبل، حاجت، خاک وغیرہ سارے فارسی لفظ نہیں۔ ایہتوں ایہہ گل نتر دی اے پئی اکبر دے عہد وچ فارسی زبان کافی حد تک پنجابی اُتے اثر انداز ہو چکی سی۔ ایس گروں پنجابی شاعری وچ حافظ برخوردار (1620ء) قد آور شاعر وکھالی دیندا اے۔ جیہدیاں بہت ساریاں لکھتاں دسیاں جان دیاں نہیں، پر اوس دے قصہ یوسف زلیخا تے مرزا صاحبان نوں بہت شہرت حاصل ہوئی۔ وگی دے طور تے مرزا صاحبان وچوں گجھ شعر ویکھو تے گوڑ لاؤ پئی اوس سے فارسی زبان دا پنجابی وچ کتا کو عمل دخل سی:

جس دن مرزا جمیاں اوہ دن نور و نور  
 اودھی زیارت کرن فرشتے جھولی پاکھڈایا حور  
 والشمس والضحیٰ ہو یا نور ظہور  
 قالوبلی کر جانناں کیتا رب مشہور  
 اودھیاں حاصل ہو یاں نیکیاں بدیاں ہو یاں دُور  
 جاں ملی مبارکاں عاشقاں جاں گئے معراج حضور  
 آخری عاشق اوس نوں کیتا رب غفور (34)

مُغلیہ دور دے پنجابی دے مشہور صوفی شاعر حضرت سلطان باہو (1629ء تا 1691ء) شور کوٹ ضلع جھنگ دے وسنیک سن۔ اک روایت اے پئی آپ نے عربی فارسی وچ گل 140 کتاباں لکھیاں نہیں (35) پر اوہناں وچوں 26 کتاباں لیسدیاں نہیں۔ پنجابی وچ آپ دی اک سی حرفی لیسدی اے جیہڑی آپ دی شہرت عام تے بقائے دوام دا سبب اے۔ آپ فارسی دے بہت وڈے عالم سن۔ ایس لئی آپ دے کلام وچ فارسی لفظ، فارسی تراکیب، فارسی تلمیحاں تے

تشبیہاں موجود نہیں۔ آپ دا اک بیت اے:

پ پڑھیا علم تے ودھی مغروری عقل بھی گیا تلوہاں ہو  
 بُھلا راہ ہدایت والا نفع نہ کیتا دوہاں ہو  
 سر دتیاں جے سر ہتھ آوے سودا ہار نہ توہاں ہو  
 وڑیں بزار محبت والے باہو کوئی رہبر لے کے سوہاں ہو<sup>(36)</sup>

ایس بیت وچ علم، مغرور، عقل، راہ، ہدایت، نفع، شر، محبت، رہبر وغیرہ فارسی دے لفظ ایس طرح ورتے گئے ہیں پئی اوہناں وچ اوپرے پن یاں غیر زبان دے لفظ ہون دا احساس تک نہیں ہوندا۔ سگوں پنجابی دے ای لفظ جا پدے نہیں۔

بابا بلھے شاہ (1692ء تا 1758ء) مغلیہ دور دے چھیکڑ لے حصے وچ پنجابی دے ندھڑک شاعر ہوئے ہیں۔ اوہناں نے کافیاں، دوہڑے، باراں ماہے تے سی حرفیاں بڑیاں سوہنیاں تے من موہنیاں لکھیاں ہیں تے اوہناں دے کلام اُتے فارسی چھاپ گوہڑی اے۔ اک نئے وچ گل مکدی اے:

پھوڑ نکتہ چھوڑ حساباں نوں      کر دور کفر دیاں باباں نوں  
 لاه دوزخ گور عذاباں نوں      کر صاف دے دیاں خواہاں نوں  
 گل ایسے گھر وچ ڈھکدی اے<sup>(37)</sup>

کافی دے ایس ایک بند وچ نکتہ، حساب، کفر، باب، دوزخ، گور، عذاب، صاف، دل، خواب دے لفظ ورتے گئے ہیں، جیہڑے سارے دے سارے فارسی دے لفظ نہیں۔ ایسے دور وچ پنجابی دا مان تران شاعر سید وارث شاہ (1722ء تا 1798ء) اے جس دی ہیر پنجابی وچ شاہکار مٹی جاندی اے۔ وارث شاہ نے اپنی ہیر وچ نہ صرف فارسی دے لفظ ورتے ہیں سگوں فارسی تشبیہاں، تلمیحاں تے استعاریاں توں وی چوکھا لاجھ لیا اے۔ ہیر وچوں ایک بند پیش کیتا جاندا اے:

قلوب المؤمنین عرش اللہ تعالیٰ قاضی عرش خدائے دا ڈھانہ نہیں  
 جتھے رانجھے دے عشق مقام کیتا اوتھے کھیڑیاں دی کوئی واہ نہیں  
 ایہہ چڑھی گولیر میں عشق والی جتھے ہور کوئی چاڑھ لاه نہیں



جس جیونے کاج ایمان و پچاں ایہا کون جو انت فناہ نہیں  
 جیہا رنگھڑاں وچ نہ پیر کوئی اتے لدھراں وچ بادشاہ نہیں  
 وارث شاہ میاں قاضی شرع دے نوں نال اہل طریقتاں واہ نہیں<sup>(38)</sup>

قلوب المؤمنین، عرش، اللہ تعالیٰ، قاضی، خدا، عشق، مقام، واہ، ایمان، فناہ، بادشاہ،  
 شرع، اہل طریقت وغیرہ عربی فارسی دے لفظ نیں۔ وارث شاہ نے اپنی ہیر وچ سرنانویں وی  
 فارسی وچ لکھے نیں۔ جیویں آمدن رانجھا در مسجد، تعریف مسجد واسائے کتب عربی، پرسیدن مرداں  
 از رانجھا۔ پندادن پیران بزرگان وغیرہ وغیرہ۔ وارث شاہ توں پہلاں وی کجھ شاعران شاہجہان  
 مقبل وغیرہ نے فارسی وچ سرنانویں لکھے پر وارث شاہ مکروں تے ایہہ ریت ای بن گئی۔ پھیر ہر  
 قصہ نگار نے اپنے قصے وچ سرنانویں فارسی وچ ای لکھے۔

سکھئی دور وچ پنجابی دے اگھے شاعر سید ہاشم شاہ (1752ء تا 1821ء) ہوئے  
 جیہناں نے سستی پنوں تے سوئی مہینوال دے قصیاں توں اڈ دوہڑے تے ڈیوڑھے وی لکھے  
 نیں۔ آپ قصہ سوئی مہینوال وچ فرماندے نیں:

پیرو پیر عشق نے جیوں جیوں چال سوئی ول پائی  
 سمجھی ساک عشق دا برہوں راہر ہو سمجھائی  
 غلبہ شوق وچ ہڈ ہڈ لوں لوں پریت رچائی  
 ہاشم پیڑ ہووے جس تائیں سمجھے پیڑ پرائی<sup>(39)</sup>

المیں بند وچ زیادہ لفظ فارسی دے ہیں۔

پنجابی شاعران نے نہ صرف فارسی لفظ، تشبیہاں، تلمیحاں تے استعارے اپنی شاعری  
 وچ ورتے سگوں فارسی شاعری دے اوزان تے بحر توں وی پورا پورا فائدہ لیا۔ جیویں حضرت  
 میاں محمد بخش صاحب<sup>(1830ء تا 1907ء)</sup> تے خواجہ غلام فرید صاحب<sup>(1830ء تا 1907ء)</sup> دے کلام وچ فارسی  
 بحر دی بہت زیادہ ورتوں اے۔ میاں محمد بخش صاحب<sup>(1830ء تا 1907ء)</sup> مثنوی نیرنگ عشق وچ لکھدے نیں:

ہرن نوں تک پئے مجنوں دی ول چند کہ ہے لیلیٰ جو ہے لیلیٰ دی مانند<sup>(40)</sup>

حضرت خواجہ غلام فرید<sup>(1846ء تا 1901ء)</sup> دیاں کافیاں وچوں اک شعر دیکھو تے

فارسی لفظ تے بحر دا گویڑلاؤ:

گئی ظلمت نورِ صُبحی      کیتیاں جسمِ عجب پر بھاتاں  
سر انہدِ طبلِ شہانہ      خوشِ مطرب تانِ ترانہ<sup>(41)</sup>

پنجابی شاعراں نے جتنے فارسی اوزان تے بجاں توں فائدہ لیا اوتھے فارسی شاعری دے موضوعات تے اصناف توں وی چنگا لالہ لیا۔ مرثیہ، جنگ نامہ، مثنوی، قصیدہ، ڈیوڑھ (مستزاد) رباعی تے غزل جہیاں شاعری دیاں صنفیاں فارسی توں پنجابی وچ داخل ہوئیاں پیر فضل گجراتی (1896ء تا 1907ء) تے ڈاکٹر فقیر محمد فقیر نے اپنیاں غزلاں تے نظماں وچ فارسی لفظاں، فارسی تشبیہاں، فارسی تلمیحاں، فارسی استعاریاں، فارسی اوزان تے بجاں دے نال نال فارسی مضمون تے اصناف توں وی چوکھا کم لیا اے۔ پیر فضل گجراتی دی غزل دے دو شعر ویکھو:

مفت پی لے زاہد تے پھٹ ایتھوں خواجہ خضر دی کھاندی اے شرم ساناں  
سبز پگ اُتوں خرابلتیاں نیں اج تیک نہیں کدی اوہار دتا<sup>(42)</sup>

محبوباں دی سوچ سجاوٹِ حُسنِ جمالِ غزلِ دا  
عشوے ناز اشارے غمزے رُعبِ جلالِ غزلِ دا<sup>(43)</sup>

ڈاکٹر فقیر محمد فقیر فارسی توں کئے گوتے متاثر نیں، اوہناں دے شعر پڑھن توں مگروں اندازہ ہوندا اے:

زمانے دی کرئیے کویں کار سازی      نہ میں آں مجاہد نہ تُوں مردِ غازی  
وطنِ مَنہ ایں ویہندا تیری دوستی دا      غرض دی اے دشمن تیری بے نیازی<sup>(44)</sup>

منطقِ اڑی رہی نطقِ وچ ناطقاں دی بھلا علمِ معانی معانیاں نوں  
تیرے فلسفے نے پریشان کیتا سمھناں فلسفے دانِ یونانیاں نوں<sup>(45)</sup>

پنجابی دے نویں دور دے شاعر وی فارسی توں بہت متاثر نیں۔ اوہناں نے اپنا کلام فارسی تشبیہاں تے تلمیحاں نال سجایا اے تے شاعری وچ سُنبل، ریحان، بلبل، نرگس، دشنہ، خنجر، بادہ، جام، ساغر چمن تے وطن دے لفظ عام ورتے نیں۔

ایس مختصر ویروے توں بخوبی گویا لایا جاسکدا اے پئی پنجابی شاعری فارسی شاعری توں

کس حد تک متاثر ہوئی ہے۔

حضرت میاں محمد دے سے فارسی علم تے ادب تے اوہد میاں محمد اُتے اثر

حضرت میاں محمد بخشؒ (ولادت 1830ء) نے جس ویلے ہوش سنبھالیا اوہ سکھوں دے زوال دا زمانہ سی۔ جون 1839ء وچ مہاراجہ رنجیت سنگھ چلانا کر گیا۔ اوہدے مکروں اوہدے جانشین پنجاب دی وسیج حکومت نوں سنبھالنے دے قابل نہیں سن۔ ایس لئی ملک وچ انفراتفری پیدا ہو گئی۔ سکھ شاہی تے برچھا گردی شروع ہو گئی۔ اوس سسے کسے دی جند تے آبرو محفوظ نہیں سی۔ ماروڈھ تے قتل غارت عام سی۔ دربار دیاں اندرونی سازشاں پاروں حکومت ڈانواں ڈول سی۔ ایس موقع توں فائدہ لے کے انگریزاں نے سکھوں نال جنگ چھیڑ دی۔ انگریزاں تے سکھوں وچکار چار جنگاں ہوئیاں جیہناں وچ سکھوں نوں شکست ہوئی جیہدے نتیجے وچ 1849ء نوں انگریزاں نے پنجاب دی حکومت دی باگ دوڑ اپنے ہتھ لے لی۔

اوس سسے پنجاب وچ کئی مدرسے قائم سن۔ جیہناں وچ فارسی دی تعلیم دتی جاندی سی۔ سکھوں نے پنجاب دی حکومت مسلمانوں کولوں لئی سی۔ ایس لئی اوہ پنجاب دی صدیاں دی روہ ریت نوں نہ توڑ سکے۔ اوہناں دے اپنے کول وی کوئی ادبی سرمایہ یا نصاب اجیہا نہیں سی، جس نوں اوہ فارسی دی تھیں مدرسیاں وچ رائج کر سکدے۔ ایس لئی پنجاب وچ تعلیمی نظام اوہور ہیا جیہڑا مغلیہ دور ویلے رائج سی۔ پنجاب دے وسنیک فارسی دا اُچا ذوق رکھدے سن۔ پڑھے لکھے لوکاں توں وکھ ان پڑھ وی فارسی نال بلا تمیز مذہب بڑی محبت رکھدے سن تے اوہناں نوں فارسی دے چنگے چنگے شعر زبانی یاد ہوندے سن پنجاب وچ فارسی ادب دی اک روایت سی۔ ایس لئی ایس دھرتی نے فارسی دے کئی مسلمان، ہندو تے سکھ لکھاری تے شاعر پیدا کیئے سن۔ جیویں مسعود سعد سلمان، ابوالفرج رونی، جمال الدین علی لاہوری، احمد لاہوری، فضل ملتان، غنیمت کنجاہی، منیر لاہوری، برہمن لاہوری، نورالعین واقف، گرامی جالندھری تے علامہ اقبال پنجاب دی دھرتی دے اوہ سپوت سن جیہناں اتے فارسی ادب نوں سدما مان رہوے گا۔ ڈاکٹر سید عبداللہ ہوراں نے سکھاں دے دور دے فارسی ادب دا ویرا کردے ہوئیاں کجھ ہور لکھاریاں دے ناں دسے نیں:

”پنجاب میں سکھوں کی حکومت مغلّیہ کی ویران بُیا دوں پرکھڑی کی

گئی تھی۔ اس لیے مہاراجہ رنجیت سنگھ نے گذشتہ روایت کو بہت حد تک برقرار رکھا۔ مہاراجہ کا دربار ہندو مسلمان اہل علم کا مرجع تھا اور اس سلسلے میں مہاراجہ کی فیاضی کے بہت سے واقعات نقل کئے جاتے ہیں۔ حکیم عزیز الدین انصاری، فقیر نور الدین، مصر بلی رام، دیوان امر ناتھ اکبری، دیوان دینا ناتھ، دیوان گنگا رام وغیرہ اُس دربار کے اکابر علماء میں سے ہیں۔“ (46)

ایہناں توں اڈمنشی سوہن لال مصنف عہدۃ التوارخ، پنڈت کاجر مصنف مجمع التوارخ، منشی دیارام درتے کرنل مہان سنگھ اوس دور دے مشہور قلم کار سن۔ فیر ایران دے مشہور شاعران وچوں عُربی (1591ء) نظیری نیشاپوری (وفات 1612ء) نورالدین ظہوری (وفات 1615ء) طالب آملی (وفات 1626ء) قدسی مشہدی (وفات 1646ء) تے سرمد (وفات 1660ء) نے پنجاب دی دھرتی اُتے پیر پائے تے اتھے کجھ عرصہ قیام کیتا۔ امیر خسرو دہلوی (1254ء توں 1324ء) تے حسن دہلوی (1257ء توں 1336ء) نے اپنی حیاتی دا کجھ حصہ پنجاب دے مشہور تاریخی شہر ملتان وچ لنگھایا۔

فارسی دے ایہناں شاعران تے عالماں پاروں پنجاب وچ فارسی علم تے ادب دی اک خاص فضاء پیدا ہو گئی سی۔ لوکائی وچ فارسی علم تے ادب دا اُچا ذوق تے شوق پیدا ہو گیا سی۔ دینی تے غیر دینی مدرسیاں وچ فارسی دی تعلیم لازمی سی۔ پنجاب اُتے انگریزاں دا قبضہ ہون مگروں کافی چراں تیک علم، ادب تے تدریس دی ایہو فضا قائم رہی۔ اوس سسے مدرسیاں وچ درس نظامی دا بہتتا زور سی۔ عام طور تے نصاب وچ گلستان، بوستان، دیوان حافظ، چہار مقالہ، قران السعید، اخلاق جلالی، اخلاق محسنی، پندنامہ، انوار سہیلی، یوسف زلیخا جامی، خمسه نظامی، مثنوی مولانا روم، شاہنامہ فردوسی تے منطق الطیر پڑھائیاں جاندیاں سن۔ ایہناں کتاباں دے پڑھن نال طالب علم وچ نہ صرف شاعری دا اُچا ذوق پیدا ہوندا سی سگوں اخلاقی تعلیم تے تصوف نال واقفی وی حاصل ہوندی سی۔

حضرت میاں محمد بخش چک ٹھاکرہ علاقہ کھڑی ضلع میرپور دے وستیک سن تے اوس زمانے وچ کھڑی دے علاقے وچ مشہور درسگاہ سمواں شریف سی۔ ایس درسگاہ دی ینہہ حافظ محمد مقیم ہوراں نے رکھی سی جیہڑے اوس دور دے جید عالم سن۔ اوہناں دے پتر حافظ محمود سن

جیہناں نے اپنے والد دے پیشہ درس و تدریس نوں جاری رکھیا۔ حافظ محمود ہوراں دے اگوں چار پتر حافظ محمد علی، حافظ غلام حسین، حافظ ناصر تے حافظ نور حسین سن۔ جیہناں توں حضرت میاں محمد بخش صاحب نے علمی تے ادبی فیض حاصل کیتا۔ ایہہ چاروں بھرا فارسی زبان تے ادب دے عالم، فقہ، حدیث تفسیر تے قرآن دے حافظ سن۔

چک ٹھا کرہ توں سوال شریف چڑھدے پاسے صرف دو میل اے۔ حضرت میاں محمد بخش ہوراں نے ایسے درسگاہ توں علمی فیض حاصل کیتا۔ آپ نے حدیث، فقہ، تفسیر تے منطق<sup>(47)</sup> توں اڈ عربی فارسی نظم تے نثر وچ وی مہارت حاصل کیتی۔ طالب علمی دے زمانے وچ ملا عبدالرحمن جامی دی یوسف زلیخا آپ دے مطالعے وچ اکثر رہندی سی۔ سگوں آپ اپنے وڈے بھرا میاں بہاول بخش نال مل کے یوسف زلیخا گاؤندے ہوندے سن۔ آپ خوش الحان سن۔ ایسے لئی حافظ محمد علی دے مجذوب بھرا حافظ ناصر علی نے آپ اگے یوسف زلیخا سناؤن دی فرمائش کیتی سی۔ مولوی محبوب عالم ایس واقعہ بارے لکھدے نیں:

”ہر دو بزرگواروں نے نظم زلیخا سنائی، حضرت حافظ ناصر صاحب روتے رہے۔ پھر کچھ دنوں کے بعد ارشاد ہوا کہ میاں صاحبزادو کچھ سناؤ۔ اس پر حضرت مصنف نے عرض کی۔ حضرت ایک شرط پر سنائیں گے۔ انہوں نے فرمایا وہ شرط بتاؤ۔ آپ نے عرض کی حضرت دُعا فرماؤ کہ کتب ہائے خواندہ ناخواندہ ہمیں ازبر ہو جائیں۔ چونکہ حافظ صاحب قبلہ کی دلی تمنا اور زبان تاثیر عشق سے متاثر تھی۔ فوراً ارشاد فرمایا کہ جاؤ میاں صاحبزادو ناخواندہ و خواندہ کتب ہائے ہر علم تم پر منکشف کر دی گئیں۔“<sup>(48)</sup>

ایتھوں ظاہر ہوندا اے پئی حضرت میاں صاحب نوں طالب علمی دے زمانے وچ ای فارسی علم تے ادب نال پیاری۔ یوسف زلیخا توں اڈ فارسی دیاں ہور کتاباں وی آپ دے مطالعے وچ رہندیاں سن۔ جیہناں دا ذکر آپ نے اپنے قصیاں وچ کیتا اے۔ جیویں سیف الملوک وچ زبدۃ الجواب تے مجمع الحکایات دا ذکر آوندا اے:

مجمع الحکایات آہی ہک کتاب وڈیری  
ہک دن سیراوسے دا کردے رغبت نال گھنیری

ایسے طرح غنیمت گنجا ہی دی مثنوی نیرنگ عشق نہ صرف آپ نوں پسند سی سگول اوہدا  
 پنجابی شعراں وچ ترجمہ وی کیتا تے بحر وی ایہورکھی جیہڑی غنیمت گنجا ہی نے اپنی مثنوی وچ ورتی  
 اے۔ اک زبان توں دوجی زبان وچ ترجمہ کرنا ای اوکھا کم اے فیر شعراں توں شعراں وچ ترجمہ  
 کرنا اوس توں وی مشکل کم اے۔ حضرت میاں محمد بخشؒ ہوراں نے نہ صرف ترجمہ کیتا سگول ترجمہ  
 کردے ہوئے غنیمت دے شعراں دا مفہوم وی غتر بود نہیں ہون دتا۔ ایس ترجمے وچ حضرت  
 میاں صاحب نے تھاں تھاں مولانا عبدالرحمن جامی دے شعراں دے حوالے دتے نیں۔ جیویں:

چہ آسائش دراں گلزار ماند      کزو گل رخت بند خار ماند  
 چہ مشکل زان بتر بر عاشق زار      کہ بے دلدار بیند جائے دلدار (49)

ایتھوں معلوم ہوندا اے پئی حضرت میاں صاحبؒ نوں مولانا جامی دے بہت سارے  
 شعر زبانی یاد سن تے اوہناں نوں موقع محل دے موجب اپنیاں لکھتاں وچ ورتدے رہندے سن۔  
 آپ نے مولانا جامی دی مثنوی خسرو شیریں نوں وی پنجابی شعراں وچ ڈھا لیا تے اوہدا ناں  
 شیریں فرہادرکھیا۔ ایس ترجمے وچ حضرت میاں صاحبؒ نے اپنی طبیعت موجب وادھا گھاٹا وی  
 کیتا اے۔ ایس توں اڈ آپ نے فارسی دی کتاب ”مناقب غوثیہ“ دا وی پنجابی شعراں وچ ترجمہ  
 کیتا اے تے اوہدا ناں ”تحفہ میراں“ رکھیا اے۔ ایہناں تراجم توں اندازہ ہوندا اے پئی حضرت  
 میاں صاحبؒ دا فارسی ادب دا کتنا ڈوہنگا مطالعہ سی تے آپ نوں فارسی علم تے ادب نال کتنا پیار  
 سی۔ ایس پیار تے وسیع مطالعے نے لازمی طور تے آپ دے تخلیقی شعور اُتے اثر پایا۔

### حضرت میاں صاحبؒ دی شاعری اُتے فارسی اثرات

حضرت میاں محمد بخشؒ نوں فارسی علم تے ادب نال بہت پیاری۔ آپ نہ صرف فارسی  
 ادب دا ڈوہنگا مطالعہ رکھدے سن سگول آپ فارسی دے بہت وڈے عالم وی سن۔ (50) آپ  
 فارسی وچ کدی کدی شعروں آکھدے ہوندے سن۔ اک واری آپ موضع جانی چک گجرات  
 تشریف لے گئے اوتھے آپ دے مرید سید باقر علی شاہ دا خط ملیا پئی اللہ نے میرے گھر پتر دتا  
 اے۔ آپ کوئی چنگا جیہا ناں تجویز فرماؤن۔ حضرت میاں صاحب نے اوسے ویلے فارسی وچ  
 منظوم خط لکھیا:

مراثیس دین ہست چوں تاب بخش      عجب نیست گریافت ماہتاب بخش  
ہماں نامہ دیرینہ ہم رنگ عود      کہ بندہ ز پنجن فرستادہ بود  
تجسس نموده مطالعہ کنید      کہ از راز و از نام آگہ شوید

ہماں نام شایاں با بجد بود  
کہ مولود ہم رنگ اب جد بود (51)

اک مولوی صاحب آپ دے ہم سبق سن اوہ علم حاصل کرن لئی ہندوستان چلے گئے۔  
اوہناں دی ملاقات ایک پنجابی نال ہوئی پنجابی نے دسیا پئی اوہ کھڑی شریف دا وسنیک اے۔  
مولوی صاحب نے حضرت میاں صاحب دی خیر خیریت کچھی تے فیراوس پنجابی نوں حضرت  
میاں صاحب دے ناں ایک رقعہ دتا جیہدے وچ لکھیا کہ میں صرف زبانی یاد کر لئی اے تے ہُن  
نحو پڑھ رہیا ہاں۔ حضرت میاں صاحب نے رقعہ پڑھ کے اوسے ویلے فارسی وچ جواب لکھیا:  
در صرف کردی عمر عزیز یارا      در نحو نحو گشتی نشناختی خدا را  
فرع و اصول منطق خوش خواندہ و لیکن      حرفے کی خواندنی بود بر تو نہ ہد شکارا  
در نظم عزم داری در فقہ میل وافر      غیر از حبیب کم خواں گن یاد آشارا  
قطع منازل ایدل از بہر صبح کم گن      در تو مہر پنگر چہ عاشق ہدے مہارا  
تسبیح خرقدہ در باز در بادہ جام بادہ      چنداں بمانی آخر مشتاق ایں بلارا

گویند محمدت پند در یاب وقت در یاب  
خواں دفتر عشق کہ روزے گنی لقارا (52)

فارسی نثر وچ آپ نے اک ضخیم کتاب ”تذکرہ مقیمی“ لکھی اے۔ جیہدے دو حصے نیں  
اک تذکرہ مقیمی دوجا تذکرہ قلندری۔ ایہدے پہلے حصے دا اردو ترجمہ ملک محمد جہلمی نے کیتا اے  
تے اوہاناں بوستان قلندری رکھیا اے۔

حضرت میاں صاحب نوں فارسی نظم تے نثر اُتے اینا ای عبور حاصل سی جنناں اوہ پنجابی  
نظم تے نثر اُتے عبور رکھدے سن۔ فارسی دے ایس وسیع علم دا اوہناں دے پنجابی کلام اُتے اثر  
پینا اک فطری گل سی۔ ایس لئی اوہناں دے کلام وچ فارسی لفظاں، ترکیباں، تشبہاں، تلمیحاں تے  
استعاریاں دی عام ورتوں لہدی اے۔ ایہناں توں اڈ فارسی بحراں، اوزان تے موضوعات وی

آپ دے کلام داحصہ نیں۔ جیہناں دا ویروا کیتا جاندا اے۔

(الف) حضرت میاں محمد بخشؒ ہوراں نے پنجابی قصہ گو شاعراں طرح اپنے قصیاں دے سرناویں وی فارسی وچ لکھے نیں قصہ پنجابی وچ اے پر سرناویں فارسی وچ نیں۔ جیویں سیف الملوک دے کجھ سرناویں ایس طرح نیں۔ درنامہ نوشتن شاہ فغفور چین جانب شہزادہ مصرکہ آمدہ یو، درجواب شاہزادہ کہ بہ فغفور چین فرستادہ یو۔ رسیدن شاہزادہ برقلعہ دیواں کہ اسفندباش نام داشت و فتح کردن آں را و خبر یافتن از مقصود و خلاص کردن ملکہ خاتون را از بند دیو و ہلاک کردن دیورا و ازاں جا آوردن ملکہ را، داستاں رواں شدن شاہزادہ بمع ملکہ ازاں قلعہ دردریا، گشتن نہنگ ہوشربارا و بہرار رنج بردر گنج مراد رسا نیدن ملکہ را و بہ سرانندیپ آمدن بمشقت بسیار۔ ایسے طرح قصہ شیخ صنعان دے کجھ سرناویں ویکھو: در بیان افشائے شدن راز عشق شیخ صنعان با دختر ترسایاں، در بیان رفتن آن شیخ زود سر نہادن پیش میراں سجود، جواب معشوق و آزمائش کردن محبت عاشق را۔

قصہ مرزا صاحبان وچ وی سارے سرناویں فارسی وچ ای لکھے ہوئے نیں۔ جیویں در بیان ظاہر ہندن راز ایشاں و بند ہندن صاحبان نجانہ خود و حیراں شدن مرزا۔ پر سیدن خالہ حالہ آں باہ و نالہ و حوالہ کردن مرزا راز خود بدو۔ سوال جواب عاشق و معشوق با یکدیگر۔ قصہ سوہنی مہینوال دے کجھ سرناویں پیش نیں: غلطاں ہندن مرزا عزت بیگ در عشق سوہنی و سکونت گرفتن شہر گجرات۔ فغاں کردن مہینوال در جستجوی وصال سوہنی۔ طغیانی آمدن دردریا چنہاں و رواں ہندن سوہنی بطرف مہینوال۔

(ب) جتھوں تیک پنجابی شاعری وچ فارسی لفظاں دی ورتوں دا تعلق اے۔ ایسں پچھے دس آئے ہاں پئی اوس سے تقریباً ہر شاعر نے اپنے کلام وچ فارسی دے ڈھیر سارے لفظ ورتے نیں۔ ایہہ وکھری گل اے پئی کسے شاعر دے کلام وچ فارسی دے لفظ دس فی صد نیں تے کسے دے کلام وچ چالیہہ فی صد نیں۔ جے حضرت میاں محمد بخشؒ ہوراں دے کلام دا جائزہ لیا جاوے تے معلوم ہوندا اے پئی اوہناں نے اپنے کلام وچ فارسی دے لفظ بہت زیادہ ورتے نیں۔ جے ایہناں لفظاں دی فہرست بنائی جاوے تے چوکھی لمبی چوڑی فہرست بن دی اے۔ پھیر وی حضرت میاں صاحب دیاں لکھتاں وچوں کجھ مثالوں دتیاں جان دیاں نیں جیہڑیاں ساڈے موقف دی



تائید کردیاں ہیں:

حافظ عالم فاضل صوفی سالک راہ ہدایت  
دائم مست محبت اندر عارف اہل ولایت  
میں شاگرد نکارے اُتے نظر مہر دی تکتن  
اس نئے دا کرن مطالعہ دیہن صلاح نہ اکن (53)

خدمت گار غلام بیچارے مُنہ سُکا تر دیدے  
رونی رنگ ہو یا متغیر آئے درد رسیدے  
وانگ تیبیاں جا کھلوتے عاصم دی درگا ہے  
بیٹھا شاہ مصلے اتے کردا یاد الاہے (54)

قصہ شریں فرہاد وچ فارسی لفظاں دا استعمال بہت زیادہ اے۔ مثال دے طور تے گجھ

شعر پیش ہیں:

واہ واہ شیر خدائیدے حیدر دے فرزند  
اوہ بہادر توڑ دے رستم تھیں دلیر  
لئی شہادت جان کے منصب بے شمار  
لعل حقانی کان دے زہرا دے دل بند  
کون آہا جھل سکدا اوہناں دی شمشیر  
بخشی دولت رب دی سُنن نہ ہوشیار (55)

تجن دشمن سٹ کے بیٹھا ہو بیزار  
ہر ہر وچ ہنگام دے آیوس جوش ہنجار  
گرمی سچے عشق دی کیتا ساڑ انگار  
اگ دے دی کرگئی وچ مغز دے کار (56)  
قصہ سخی خواص خان وچ فارسی لفظاں دی ورتوں ویکھو:

بہت خدائے دے خوف والا اوہدی ظلم زیادتی خوناہی  
دو کھ بخل تے جھوٹھ تکبری جی لوہب موہ دی اوسنوں لوناہی  
تیز فہم وہم نہ خیال من دے خوش طبع مٹھی ترش روناہی  
جیہڑی گل نہ رب نوں بھانندی ہے اوس وچہ محمد سوناہی (57)

مثنوی نیرنگ عشق وچوں گجھ اجیے شعر پیش ہیں جیہناں وچ فارسی لفظاں دی ورتوں اے:

عجب بیمار زگس خون خوراں      بجن دے مارنے نوں دو کٹاراں  
 دو ابرو طاق جیوں جا پے کماناں      کرن دل تیر پکاں دا نشاناں  
 متھا خورشید تے رخسار مہتاب      نہیں پاس اُس دے چہرے لعل دے آب  
 زُباں اسرار پوشیدہ تھیں کہے حرف      بہ خشانی گہر یا لب ہے شنگرف (58)

ایسے طرح حضرت میاں محمد بخشؒ ہوراں دی ہر لکھت وچ فارسی دے ان گنت لفظاں دا استعمال ملدا اے پر حضرت میاں صاحبؒ دا کمال ایہہ وے پئی اوہ فارسی دے لفظ نوں ایسے سوہنے ڈھنگ نال پنجابی شعر وچ کھپاؤندے نیں پئی اوہدا اوپرا پن مک جاندا اے تے اوہدے نال مانوسیت دا احساس ہندا اے۔ اُنج تے اوہناں دے قصیاں وچ فارسی دے ان گنت لفظ موجود نیں پر جے ذرا گوہ نال دیکھینے تے کجھ ایسے لفظ نظریں پیندے نیں جیہڑے اوہناں دے کلام وچ بار بار استعمال ہوئے نیں۔ اوہناں توں اک تے حضرت میاں صاحبؒ دے من بھاؤنے لفظاں دا پتہ لگدا اے دو جے حضرت میاں صاحبؒ دے سبھا دا تھوہ ملدا اے ترتبے اوہناں دے خاص شعری لفظاں دے بھنڈار (ڈکشن) بارے واقفی حاصل ہوندی اے۔ ایسے فارسی لفظاں دی نکی جیہی فہرست دتی جاندی اے:

در۔ عوض۔ آتش۔ چمن۔ حُسن۔ چرخ۔ رنجور۔ تونگر۔ جبین۔  
 خاک۔ حشمت۔ معطر۔ صنعت۔ مطلوب۔ ارم۔ بوستان۔ طالع۔ فراق۔  
 بُت پرستی۔ فرزند۔ شمشیر۔ صابر۔ شاکر۔ خار۔ اُفتاد۔ قہر۔ غضب۔ دستور۔  
 دام۔ انعام۔ خلل۔ عظیم۔ شفا۔ غمزہ۔ قوت۔ ہنجا۔ جمال۔ پند۔ غنیم۔  
 کسب۔ انبار۔ دائم۔ بسیار۔ رقم۔ خمار۔ تابع۔ بجل۔ گنج۔ حرم۔ تیغ۔ ظلم۔  
 حرص۔ رمز۔ سرپوش۔ قدیم۔ سیاہ۔ رومال۔ جام۔ تخم۔ اصیل۔ وصل۔  
 ساعت۔ عتاب۔ تلخ۔ تقصیر۔ دلگیر۔ محال۔ عاقل۔ حجاب۔ قدم۔ بلخ۔  
 قلب۔ طبع۔ شکم۔ مُشک۔ درس۔ ابرو۔ غیب۔ سلب۔ عاصی۔ فیض۔ کامل۔  
 زُلف۔ زال۔ شب۔ تحل۔ دلبر۔ نذر۔ روشن۔ شتاب۔ تعظیم۔ افضل۔  
 صدقہ۔ خوشحال۔ باطن۔ تدبیر۔ برباد۔ باک۔ مدح۔ منصب۔ انبوہ۔  
 نادر۔ مشتری۔ زر۔ آفرین۔ بیخ۔ رند۔ سنگ۔ معجزہ۔ شبنم۔ خرقة۔ نعمت۔

نفر۔ غلام۔ ربانی۔ حقانی۔ تصرف۔ اجازت۔ محافظ وغیرہ  
 (ج) حضرت میاں محمد بخشؒ ہوراں نے اپنے کلام وچ فارسی ترکیباں توں وی ڈاڈا سوہنا کم  
 لیا اے تے اوہناں نوں پنجابی شعراں وچ ایس طرح ورتیا اے پئی اوہ فارسی دی تھاں پنجابی  
 دیاں ترکیباں جا پدیاں نیں جیویں ایہہ شعر اے:

کیہا شاہد نوں اُس نے ہو غضبناک  
 جے جلدی چل اے بے شرم بیباک (59)

ایس شعر وچ غضبناک تے بیباک دونوں فارسی تراکیب نیں۔ ایسے طرح دیاں گجھ  
 ہور تراکیب دیکھو:

ہوندا ہے شوق دا جس دل خزانناں      دی ظاہر اوہ تن خستہ نماں  
 نہ طاقت دل جھلاں تند خو دا      محمد نوں ہے دھڑکا عیب گودا (60)  
 عاصم دی سُن صبر توکل ہمت آس شہزادے  
 دلبر بھال محمد بخشا سہ سہ دکھ زیادے (61)

حضرت میاں صاحبؒ دے کلام وچ جیہڑیاں تراکیب ملدیاں نیں اوہناں وچوں ونگی  
 دے طور تے گجھ پیش کیتیاں جا رہیاں نیں:

خوشحال۔ آنگینہ۔ فی الفور۔ فتنہ انگیز۔ تندخو۔ خورسند۔ ہمد۔ مرغ بلبل۔  
 خوں ریز۔ سیم بر۔ ماہرو۔ گل اندام۔ خم خانہ۔ ابر نیساں۔ نیرنگ بازی۔  
 منور خانہ۔ دہ چند۔ مشک بو۔ روبرو۔ لبالب۔ لیل ونہار۔ خمار۔ ماہتاب۔  
 پائمال۔ دلبر۔ کبوتر۔ درکار۔ رومال وغیرہ

(د) حضرت میاں محمد بخشؒ ہوراں نے اپنی شاعری وچ فارسی تشبیہاں تے استعارے وی  
 ورتے نیں تے اوہناں نوں اپنے شعراں وچ نگینے ہار جڑیا اے۔ کیوں جے حضرت میاں صاحب  
 اوہناں دے مفہوم تے صحیح استعمال دے چنگی طرح جانوں سن۔ ایس لئی اوہناں نے ایہناں فارسی  
 تشبیہاں تے استعاریاں دی ورتوں نال اپنے کلام وچ فصاحت تے بلاغت پیدا کیتی اے:

ابرو وانگ کمان دے یا اوہ عید ہلال      یا اوہ طاق بہشت دے عجب مبارک فال  
 یا محراب مسیت دا دیکھو ہو نہال      دوہاں وچ محمد سوہے کالا خال (62)

یاں پھیر:

حُسنِ بلعِ جمالِ پری دا وانگ بہار چمن دی  
سُنبلِ والِ مہینِ زنجیری ہر مینڈی ون ون دی (63)

جادوگرِ دونین لُٹیرے دل نوں مارن والے  
لعلِ لبابِ پھر آبِ حیاتوں بھر بھر دین پیالے (64)

زگسِ مستِ محبتِ کینا شاہِ پری دیاں نیناں  
عرضِ کرے سر کڈھ شگوفہ میں بھی درشن لیناں (65)

میرے لال دا کس طرح حال ہوسی لکھے جل جلال دے بھاء تیرے  
ہوواں جنتِ خاتونِ دی میں گولی بچا آپ امام دے ہو چیرے  
ش شیرِ جوانِ دلیرِ میرا جیہڑا کٹک نوں گھیر کے ماردا سی  
لاڑا جج دا داڑا گنج دا سی رنج والیاں رنج اداواردا سی (66)

ایہناں شعراں وچ خاتونِ جنت تے شیر دے استعارے ورتے نیں جیہڑے فارسی

ادب وچ عام ورتے جاندے نیں۔

(۵) حضرت میاں صاحب دے کلام وچ پنجابی نالوں فارسی دیاں زیادہ تلمیحاں موجود نیں۔

آپ نے ایہہ تلمیحاں بڑے سچے ڈھنگ نال اپنے کلام وچ ورتیاں نیں۔ جیویں سیف الملوک  
وچ لکھدے نیں:

شاہِ یمن دے تحفہ کر کے آندی سیفِ بھلیری  
جو جمشیدِ آہالک بھدا عیدِ خوشی دے ویری (67)

ہو اسوارِ پیادہ قواعد کر دا ہر ہتھیاروں  
رستمِ بہمنِ اسفندِ یاروں دھنی ہو یا تلوا روں (68)

مانی تے ارژنگِ سیانے جے دیکھن اک والے  
کارگیریاں والے بھٹن سارے ہوش سنبھالے (69)

سرسامے دی ہوش نہ رہندی جیوں سرسامے والے  
 زال زوال ہزیمت کولوں دھولے کردا کالے<sup>(70)</sup>  
 حضرت میاں صاحب دے ہوراں قصیاں وچ گجھ تلمیحاں ویکھو جیہڑیاں فارسی ادب  
 وچ عام لہجہ دیاں نیں:

عقل مجنوں ہے اس کے فکر میں  
 کہو لیلیاں کیونکر کچھ خبر میں<sup>(71)</sup>

پیالہ اپنے شوقوں جا پیالے  
 تینوں منصور والے سر ویکھالے<sup>(72)</sup>

ادہ تیرک نعمت ساری لئی منگ خضر تھیں  
 نال سلام ہوئے بھی فائز جدا شرف دے در تھیں<sup>(73)</sup>

شیریں پائی لبان تھیں شیریں بے انتہا  
 کھڑیوس دل پرویز دا جاں فرہاد کہا<sup>(74)</sup>

ج۔ جگ اندر منظور ہوندا جیہڑا پیر اگے منظور ہے جی  
 جتھے جاوندا پاوندا اشرف عزت سُر مہ اکھیا نندا کوہ طور ہے جی<sup>(75)</sup>

سولی شاہ منصور قبول کیلتی شمس کھل لہائی کے چلیا سی  
 سرمد نے سیس کٹا دتا دُنی چند ولوں کس ٹھلیا سی<sup>(76)</sup>

تک نہ سکن فتنیوں خضر الیاس ڈرے  
 ہوئے سکندر بتلا ویکھ نہ مول جرے<sup>(77)</sup>

(و) حضرت میاں محمد بخشؒ ہوراں نے اپنے کئی قصے فارسی بحر ایں وچ لکھے تے ایہہ بحر ایں  
 ایہناں بحر ایں دی ورتوں نال پنجابی شاعری وچ وادھا ہویا تے شاعر ایں نوں اپنے خیالاں تے

جذبیوں بیان کرن لئی کئی ہور میدان ہتھ آئے۔ حضرت میاں صاحب نے غنیمت کنجاہی دی  
مثنوی نیرنگ عشق نوں پنجابی نظم وچ ڈھا لیا تے، بحر وی اوہور کھی جیہڑی غنیمت کنجاہی نے ورتی

اے:

مبادا پیچ دل بے عشق بازی اگر باشد حقیقی یا مجازی (غنیمت کنجاہی)  
ہو یا ہر اک روانہ پکڑ رستہ شکستہ دل شکستہ دل شکستہ (میاں محمد)

ایس بحر نوں بحر ہنرج آکھیا جاندا اے تے ایہدا وزن اے۔

مفاعیلن، مفاعیلن، مفاعیلن مفاعیلن، مفاعیلن، مفاعیلن

مولانا عبدالرحمن جامی دی مثنوی خسرو شیریں دی ایسے بحر وچ لکھی گئی اے۔

کہ بے جام مئے صورت کشیدن

نیاری جرمه معنی چشیدن (جامی)

حضرت میاں محمد نے اپنی مثنوی شیریں فرہادوی فارسی، بحر وچ لکھی اے۔ لکھدے نیں:

وانگن کلی گلاب دی سندر لوا بدن

بانکا قد محمد جیونکر سرو چمن

علم عروض وچ ایس بحر دے ارکان نیں:

فعلن، فعلن، فاعلن، فعلن، فعلن، فعلن، فعلن

فعلن، فعلن، فاعلن، فعلن، فعلن، فعلن، فعلن

ایسے طرح قصہ شیخ صنعال دی بحر وی فارسی توں مانگت لگدی اے۔ ایس قصے دی بحر

ویکھو:

لڑیا کالا ناگ پر دم دا لوں لوں بس سہانی

بیدل دا بیدلبرجانی بیدن بید نہ جانی

ایہدا وزن اے:

فعلن فعلن فعلن فعلن فعلن فعلن فعلن

قصہ سوئی مہینوال دی بحر ویکھو:

اڈل گن سخن تھیں کیتی رب کلام

تاں فیکون محمدا لوح قلم تمام

اوزان اے:

فعلن فعلن فاعلن فعلن فعلن فع  
فعلن فعلن فاعلن فعلن فعلن فع

قصہ سیف الملوک دی بحر:

مردا ہمت ہار نہ مولے مت کوئی کہے نمردا  
ہمت نال لگے جس لوڑے پائے باجھ نہ مردا

ایہداوزن انج اے:

فعلن فعلن فعلن فعلن فعلن فعلن فعلن  
فعلن فعلن فعلن فعلن فعلن فعلن فعلن



حواشی:

- 1- Oriental College Magazine, August 1967  
(The Earliest Progress, Development and Influence of Persian in the Pakistan Hind Sub-Continent,  
by Dr. Muhammad Baqir
- 2- پانزدہمین جاہا اوستاہا کہ من آہورمزدا بہترین بیافریدم ہمت ہندواست (پدہ ہندو) در آنجا اھرمن  
پرگزند، بسیزہ دشتاں ناگاہ وگرمای ناہنگام پدید آورد۔“ (اناصیتا: پورداؤدوس 119 تا 120)
- 3- ست دریا ایہہ نیں۔ جہلم، چناب، راوی، بیاس، ستلج، سندھ، کابل
- 4- Persian Literature Levy P-11 Britain 1948.
- 5- عبدالغفور قریشی، پنجابی ادب دی کہانی، ص 22
- 6- نغاب الی لھند والین التبت ودعا ہناک ثم رجع فحسیند بہرام وقتلہ لانہ، نفض الشر بیطہ وابع الدم“

- (کتاب آثار الباقیہ من القرون الخالیہ، لیزک 1876ء ص 209)
- 7- شیخ محمد اکرام: آب کوثر: ادارہ ثقافت اسلامیہ لاہور 1975ء ص 32-33
- 8- Al-Jahiz, Kitab-al-Hyawan, Vol. VII P-65
- 9- شیخ محمد اکرام: آب کوثر ص 33
- 10- الممالک والممالک، قاہرہ، 1961ء ص 105
- 11- شیخ محمد اکرام: آب کوثر ص 61
- 12- ایضاً ص 64
- 13- مسعود سعد سلمان 438ھ بمطابق 1046ء لاہور میں پیدا ہوا۔ 1121ء میں وفات پائی۔  
(مضمون - مسعود سعد سلمان، ڈاکٹر ناظر حسین زیدی، اوری اینٹل کالج میگزین مئی 1967ء  
ص 166)
- 14- شیخ محمد اکرام: آب کوثر ص 66
- عونی اوس برے لباب الالباب وچ لکھدا اے: مولد و منشائے او خطہ لاہور بود و ایں خطہ بفضل  
لامتناہی او برسائر بلاد مفاخر و مباحی۔ در دولت سلطان رضی ابراہیم دولہا دید و قصائد او اکثر  
در مدح اوست و انوری پیوستہ تتبع سخن او کردے و دیوان او ہموارہ در نظر داشتے (ارمغان  
پاک، شیخ اکرام، کراچی 1959ء ص 20)
- 15- شیخ محمد اکرام: آب کوثر ص 115
- 16- ایضاً
- 17- ایضاً
- 18- شیخ محمد اکرام: رود کوثر ص 33
- 19- عہد علانی کے دوسرے یکتا شعراء میں امیر حسن سنبری تھے۔ نظم و نثر دونوں میں انکی بہت سی  
تالیفات ہیں۔ (تاریخ فیروز شاہی؛ ضیا الدین برنی، ترجمہ اردو ڈاکٹر سید معین الحق لاہور  
1969ء ص 522)
- 20- شیخ محمد اکرام: رود کوثر ص 33
- 21- صلاح الدین ناسک: دور مغلیہ؛ لاہور 1973ء ص 555



- 22 اورینٹل کالج میگزین اگست، 1931ء ص 72
- 23- Arnold - Report on the Education of the Punjab (Educational Record - ii - P.290)
- 24 ہندوؤں کا فارسی لٹریچر، سید عبداللہ، اورینٹل کالج میگزین، فروری 1931ء ص 52
- 25 ایضاً ص 54
- 26- The Court and camp of Rungeet Sing, W.G. OSBORNE - P - 22, Karachi - 1973
- 27 خلدی کا زمانہ تیرہویں صدی کا پہلا نصف تصور کرنا چاہیے۔ اگرچہ کلام میں قدامت کی جھلک ہے۔ (محمود شیرانی: پنجاب میں اردو؛ اشاعت دوم لاہور 1949ء ص 394)
- 28 آزمودن۔ ازمانا، پریدن۔ اڈنا، پڑمردن۔ کرمانا، چسپیدن۔ چمبرونا (اورینٹل کالج میگزین، نومبر 1967ء ص 5)
- 29 شیخ محمد اکرام: ارمغان پاک ص 88
- 30 صوفی تبسم: پنجابی پر فارسی کا اثر؛ کتاب پاکستان کی علاقائی زبانوں پر فارسی کا اثر، کراچی س۔ن ص 27-28
- 31 بول فریدی، مرتبہ فقیر محمد فقیر ص 116
- 32 عبدالغفور قریشی: پنجابی ادب دی کہانی ص 210
- 33 کافیاں شاہ حسین، مجلس شاہ حسین لاہور 1976ء ص 57
- 34 حافظ برخوردار: مرزا صاحبان؛ پنجابی ادبی اکیڈمی لاہور 1965ء ص 6
- 35 ابیات سلطان باہو، مرتبہ سلطان الطاف علی، ص 39
- 36 ایضاً ص 175
- 37 کلیات بلھے شاہ، مرتبہ فقیر محمد فقیر، ص 22
- 38 ہیر وارث شاہ، مرتبہ عبدالعزیز ایڈوکیٹ، ص 113
- 39 کارے، ہاشم شاہ مرتبہ فقیر محمد فقیر ص 54
- 40 میاں محمد بخش: مثنوی نیرنگ عشق؛ ص 13

- 41 دیوان فرید ص 113
- 42 پیر فضل گجراتی: ڈونگھے پینڈے: لاہور فروری 1965ء ص 31
- 43 پیر فضل گجراتی: نگوراں؛ گجرات مارچ 1970ء ص 21
- 44 ڈاکٹر فقیر محمد فقیر: مواتے؛ لاہور 1969ء ص 72
- 45 ڈاکٹر فقیر محمد فقیر: صدائے فقیر؛ لاہور مئی 1954ء ص 39
- 46 ڈاکٹر سید عبداللہ، ادبیات فارسی میں ہندوؤں کا حصہ، مجلس ترقی ادب لاہور 1967ء طبع دوم ص 187
- 47 میاں محمد بخش: سیف الملوک، سوانح عمری، مولوی محبوب عالم مطبوعہ آزاد کشمیر 1978ء ص 507
- 48 ایضاً
- 49 میاں محمد بخش: مثنوی نیرنگ عشق ص 10
- 50 مولوی محبوب عالم لکھدے نیں۔ ”نظم فارسی، اُردو، پنجابی میں بے تکلف اشعار تحریر فرماتے، عربی نظم، نثر میں بھی حضور کو ید طولیٰ حاصل تھا۔ (دیباچہ سیف الملوک ص 518)
- 51 دیباچہ سیف الملوک ص 533
- 52 ایضاً ص 538
- 53 سیف الملوک ص 28
- 54 ایضاً ص 60
- 55 میاں محمد بخش: شیریں فرہاد؛ (قلمی نسخہ) ص 2
- 56 ایضاً ص 39
- 57 میاں محمد بخش: قصہ سخی خواص خان ص 6
- 58 میاں محمد بخش: مثنوی نیرنگ عشق ص 19
- 59 ایضاً ص 29
- 60 ایضاً ص 33
- 61 سیف الملوک ص 43
- 62 قصہ شیریں فرہاد (قلمی نسخہ) ص 14

- 63 سیف الملوک ص 232
- 64 ایضاً ص 250
- 65 ایضاً ص 254
- 66 قصہ سخی خواض خان؛ مطبع سراج جہلم ص 28
- 67 سیف الملوک ص 50
- 68 ایضاً ص 55
- 69 ایضاً ص 57
- 70 سیف الملوک ص 119
- 71 مثنوی نیرنگ عشق ص 63
- 72 ایضاً ص 10
- 73 تحفہ میراں ص 37
- 74 قصہ سوتلی مہینول ص 11
- 75 قصہ سخی خواض خاں ص 6
- 76 مرزا صاحبان ص 98
- 77 شیریں فرہاد (قلمی نسخہ) ص 15

Khoj

Research Journal Deptt. of Punjabi  
Language & Literature  
Vol:32, Jul.-Dec. 2008, pp 43-52

کھوج

تحقیقی مجلہ شعبہ پنجابی زبان و ادب  
جلد 32، جولائی دسمبر 2008ء شماره نمبر 1

## منیر نیازی دی شاعری وچ چتر کاری

☆ ڈاکٹر ناہید شاہد

### Abstract

The present essay is written by Dr. Naheed Shahid, in which he has analysed Munir Niazi's 'chitarkari' through examples from his poetic works. He has discussed the novelty and freshness in his poetry in a new style. The essayist has also discussed that how the internal complications, achievements and failures, and experiences become a part of the poetry of any poet.

ساڈے زمانے دی پنجابی شاعری دے آسمان تے جے سچ پچھو تے منیر نیازی دی ست رنگی پینٹھ بچی ہوئی اے۔ جیہدے جلوے ساڈے ماضی دیاں چیتھاں وچوں ساڈے حال تاں منیر آوندی بھلک تک پھیلے ہوئے نیں۔ منیر دا شمار اوہناں لکھاریاں وچ ہوندا اے جیہدے نویں رستے بھال دے نویاں طرزاں اختیار کردے تے تازگی تے تازہ کاری نوں رواج دیندیاں پرانے منظر نامے نوں بدلن دا چارہ کردے نیں۔ منیر توں پہلاں پنجابی شاعری دے تک نقشے نوں بدلن والیاں وچ شریف کجھائی، احمد راہی تے باقی صدیقی نے دی بھرواں حصہ پایا سی۔ ادبی اصطلاح وچ ایناں نوں Avant Garde دا درجہ حاصل اے۔ منیر نے جس ادبی ماحول وچ اکھ کھولی اوہدے وچ راشد، میراجی تے فیض واراں سی تے اے توڑی اختر شیرانی دی رومانی شاعری دا

طلمس قائم سی۔ اوہدی حیاتی دے ابتدائی سفر نے وی اوہنوں تجربے تے مشاہدے دے کجھ نویں رستے سمجھائے تے بعض نفسیاتی الجھناں تے داخلی وارداتاں اوہدی شخصیت نوں نکھیریا ضرور پر ہولی ہولی ہر شے اپنی ترتیب وچ آؤندی چلی گئی۔

منیر نے اپنے دے چالو ویہاراں توں ہٹ کے اپنے لئی علیحدہ تے وکھرا رستہ اختیار کیتا۔ اوہنے شیواں نوں نوں انداز نال ویکھیا، روایتی لکھن ڈھنگ توں منہ موڑیا تے اپنے لئی نوواں رستہ چنیا۔ ایس زمانے وچ ای شاعری دے نوں تے پرانے ہون دیاں جھٹاں ہو رہیاں سن۔ روایت تے جدت دی گل ہو رہی سی تے غیر نفسیاتی حوالیاں نال فرد دے اندر جھانک کے اوہدے کرب تے خوشیاں دا تھوہ پتہ لان دا چارہ ہو رہیا سی۔ پاکستان بنن مگروں اک نوں شہر دی تعمیر تے ترقی دے خواب وی ویکھے جا رہے سن۔ بھاویں گزرے ویلے دیاں یاداں ہو کے بن کے سامنے وی آکھلوئیاں سن۔ عزم تے آس دے سہارے حیاتی دا سفر اگانہہ ول رواں دواں سی۔ ایس سارے پس منظر وچ پرانیاں قدراں بدل کے نوں روپ دھار رہیاں سن تے اک نوواں نگر آباد ہو رہیا سی۔ J.A. Cuddon دے مطابق:

“Modernism reveals a breaking away from established rules, traditions and conventions, fresh ways of looking at man's position and function in the universe and many (in some cases remarkable) experiments in form and style.” (1)

Cuddon دے ایہناں وچاراں نوں مکھ رکھدیاں منیر نیازی دی شاعری نوں جدیدیت (Modernism) دے مفہوم وچ سمجھیا جاسکدا اے۔ عام طور تے جدید نوں قدیم دے الٹ سمجھیا جاندا اے۔ زمانے دے بدلن نال کئی طرح دیاں تبدیلیاں آؤندیاں نیں کجھ چیزاں اپنا روپ وٹالیندیاں نیں تے کجھ اکا ای ختم ہو جاندیاں نیں۔ انسان اپنے ویلے دے مطابق جیون گزارن دا چارہ کردا اے۔ بازاراں تے دوکاناں وچ وکن والیاں جنساں دی قیمت بدل جاندی اے، انج ای ویلے دے ویہن وچ لنگھدیاں انسان دے کار و بہار وچ تبدیلی آندی اے۔ ایس کر کے جدیدیاں نوں وی اصطلاح پوری طرح اپنا ابلاغ نہیں کردی۔ اک زمانے دی ریت رسم تے رواج دے خلاف وجود وچ آن والی ریت رسم یاں رواج توں اک خاص عہدیاں

زمانے تک جدید (Modren) یاں نواں (New) آکھیا جاسکدا اے پر کجھ عرصے مگروں ایہو جدید یاں نواں پن اک ہور ریت رسم یاں رواج بن کے اپنی اہمیت کھوسکدا اے۔ جیویں:

”انیسویں صدی کے ابتدائی پندرہ بیس برسوں میں جدیدیت کی اصطلاح اُن سب تحریکوں پر محیط تھی جو ثقافت، فنون لطیفہ اور ادب کے میدان میں مدتوں سے استوار معیاروں اور روشوں کو پایہ استناد سے گرانہ چاہتی تھی۔ جو ادب جدیدیت کا علم برادر تھا وہ انیسویں صدی کے توانا رواہیم (Conventions) سے رشتہ توڑنے کے درپے تھا۔“<sup>(2)</sup>

دیسویں صدی دے پہلے دو دھاکیاں وچ جدیدیت دا رولا رہیا پر چھیتی جدیدیت، نو جدیدیت تے فیر مابعد جدیدیت دے ناواں نال ایہدے بنیادی مباحث وچ وا دھے گھائے ہوندے رہے جیہدہ مطلب صاف اے کہ تبدیلی دا عمل ویلے دے نال نال بڑا تیز ہوندا رہندا اے تے کجھ سالاں دے وقفے نال نظریے تے Ism نویں یا پرانے ہو جان دے نیں۔ بچپن توں بڑھاپے تا کہیں فردی حیاتی وچ کئی مرحلے آؤندے نیں جیہڑے بالکل نویں تے تازہ ہوندے نیں پر اکھ دے جھیکن نال ای ایہ نویں تے تازہ تجربے یا مشاہدے ماضی دا حصہ بن جان دے نیں۔

ادب تے شعر نال وی انج ای واپردی اے تے وقت دے گزرن نال اوہدے معیار وی تبدیل ہو جان دے نیں۔ چنگا تخلیق کار اوہو ہوندا اے جیہڑا کہے ریت رسم یاں رواج نوں ساری حیاتی چھٹھا نہیں ماری رکھدا سگوں اوہ ہر بدلدی رت وچوں اپنے اپنی نویں امکان لہہ کے اپنا سفر جاری رکھدا اے تے انج تصور تے تخیل اک عہد توں دوسرے عہد تے اک فرد توں دوسرے تک اپڑدے رہندے نیں۔ لفظ معنی بدل دے نیں روایتاں روپ و ناوندیاں تیں تے سماں نویں کپڑے پا کے لہہ بہ لہہ اگانہ دودھیاں رہندیاں نیں۔ انج نہ ہووے تے ہینکاں، خیال، لفظ، معنی، روایتاں تے رواج نہ صرف بوسیدہ ہو جان دیاں نیں سگوں ہمک وی دین لگ چیندیاں نیں تے بوسیدہ تے ہمکیاں شیواں نوں کئی دیر تے کئی دور تک نال لے کے کُریا جاسکدا اے۔ ایس فطری عمل نوں ادبی حوالے نال دیکھنے تے گل صحیح ہوندی اے جے فکری آزادی تازہ کاری ول ٹوران دا کارن بن دی اے۔

منیر اپنی اچھی فکری آزادی باعث ای تازہ کاری تے (Freshness) دیاں منزلان

نوں چھوہندا اے۔ اوہ خالص شاعر اے، خیال تے خواب دنیا دا واسی۔ اوہدی شاعری دا مطالعہ اچھیاں کھڑکیاں کھول دا اے جیہناں وچوں خوبصورتی نظر آؤندی اے جمال دا جلال و سدا اے تے جلال دے جمال دے نین نقش اُبھردے نیں۔ منیر حسن پرست وی اے تے حسن پسند وی اے۔ اوہنے سماجی کوہجاں دا بھرواں بیان کیتا اے پر ایس طرح جے ایہہ کوچ تے بد صورتی اپنے اصل دی بجائے حسن دا تسلسل بن کے اُبھردے نیں۔ سیانے آکھدے نیں خوبصورت نوں تے خوبصورت سارے ای آکھ دیندے نیں پر بد صورتی تے بدشکلی وچوں حُسن تلاش کرنا سکھا انہیں ہوندا۔ تخلیق کار ایہہ عمل شعوری سطح تے نہیں کردا تے نہ ای تخلیق دے وجود وچ آن لئی کے مخصوص شعوری عمل دی لوڑ ہوندی اے۔ سگوں فن کار دی شخصی تعمیر تے نشوونما جس ماحول تے علاقے وچ ہوئی ہوندی اے اوہدے سوچ ڈھنگ وی اوہ سے رُخ مرتب ہو جاندا ہے۔ اک انٹرویو وچ جدوں منیر نیازی توں شاعری دے مقصد اں بارے پچھیا گیا تاں اوں آکھیا:

”کسی بھی مقصد کا تعین شاعر کو قید کرنے کے مترادف ہے۔ خیال کی نہ تو کوئی حدیں ہوتی ہیں اور نہ شکلیں، یہ شکلیں خود بخود بنتی چلی جاتی ہیں۔ میرا خیال ہے کہ سوشلزم اور تحلیل نفسی کے نظریات بھی کسی شاعر کی شاعری کے ذریعے ہی مارکس، ہیگل اور فرائیڈ تک پہنچے ہوں گے۔ شاعر تو خالق ہوتا ہے مقلد نہیں۔ کئی بار شاعر کو قید توڑنے کے لیے اپنی شاعری کا خود ہی نقاد بننا پڑتا ہے جیسے کولرج اور ایلینٹ (Eliot) نے کیا۔“ (3)

شاعر دی فکری آزادی اوہدا نڈھلا حق ہوندا اے تے اوہنوں کے طرح دی ایس گل دا پابند نہیں بنایا جاسکدا جے اوہ انج دی شاعری کرے تے انج دی نہ کرے۔ شاعری سچے تے کھرے جذبیاں، احساساں تے وارداتاں نوں بیان کردی اے تے جے ایس نوں مخصوص فکری حوالے دے تابع کردتا جاوے تاں اوہدے وچ مصنوعی پن پیدا ہونا لازمی امر اے۔ ڈاکٹر خواجہ محمد زکریا لکھدے نیں:

”شاعری میں تو شاعر کو اپنے سچے محسوسات اور واردات کا اظہار کرنا ہوتا ہے۔ اگر ایک شخص حیات اور کائنات کو بے سمت اور بے مقصد سمجھتا ہے تو ہم اس سے اختلاف کر سکتے ہیں مگر اسے اس طرح محسوس کرنے سے روک

نہیں سکتے۔ دوسرا شخص اشتراکی فلسفے کو دنیا کے مسائل کا حل سمجھتا ہے اور عام آدمی کو مایوس نہ کرنے کا نقطہ نظر رکھتا ہے تو اس سے متفق ہونا نہ ہونا دوسری بات ہے۔ ایسے اظہار رائے کی پوری آزادی ہونی چاہیے۔ اگر شاعر کے ذہن پر ہم پہلے سے طے شدہ نظریات مسلط کریں گے تو مصنوعی اور بے اثر شاعری پیدا ہوگی۔“ (4)

ایس پس منظر نوں سامنے رکھ دیاں جے ایہہ آکھیا جاوے کہ منیر نیازی دا نظریہ صرف تخلیقیت (Creativity) سی تے غلط نہیں ہووے گا۔ اوہ نہ کہجے تے نہ ای سچے بازو دا حمایتی سی اوہ صرف اک شاعر تے تخلیق کاری تے اوہدا سارا زور اوہدی شخصیت دے ایس اظہار وچ ظاہر ہوندا سی:

سورج تے بدل دی لڑائی بڑی سویرتوں جاری اے  
 بدل نے وی فوج اپنی اوہناں مہتیاں ول اُتاری اے  
 جیہناں دے پٹھان رنگ برنگے کپڑیاں دی الماری اے (5)  
 (دو دشمنان دی جنگ)

منیر حرف شناسی دے سفر دا مسافر سی اوہ حروف دے پردیاں نوں اتارنا چاہوندا سی اوہ حرفاں وچ جیوندا سی تے بلھے وانگ اوس نوں وی ”اکوالف درکاری“ جیہدی بھال وچ اوہ آخری ساہ توڑی لگا رہیا:

حرف اک دو جے حرف دا واہہ میتھوں قیاس نہ ہويا  
 ساری حیاتی حرف لکھے پر حرف شناس نہ ہويا (6)

منیر نیازی دا پہلا مجموعہ ”سفر دی رات“ پہلی وار 1961ء وچ چھپیا سی۔ اوہدے دوسرے مجموعے داتاں ”چار چپ چیزاں“ تے تیسرا مجموعہ ”رستہ دکن والے تارے“ دے سرناویں پینھ چھپیا۔ 1988ء وچ منیر دے پنجابی کلیات ”کل کلام“ دے ناں نال ماورا پبلشرز لاہور نے چھاپیا۔ ایہدے وچ تن چھپے شعری پراگیاں توں علاوہ کجھ تازہ کلام وی شامل سی۔ جدوں کہ کل کلام نوں دو جی وار فضل حق پرنٹرز لاہور ولوں 1992ء وچ چھاپیا گیا، بعد وچ کل کلام خزینہ علم و ادب لاہور نے 2002ء وچ چھاپیا۔ ایس وچ منیر دی اک ہور تازہ غزل آخرتے شامل اے۔



ایس غزل دا مطلع تے مقطع ویکھو:

مکھ لال ہو یا کسے سوچ ہتھوں اکھاں نیویاں کسے ملال دے نال  
ہٹھل گئی سی کماں بچ رب جیہڑی اوہدے خواب دے کسے خیال دے نال

لے چوڑے مدان توں ہور پرے گجڈے بدل منیر نے جنگلاں تے  
ہٹھل کھڑ دے پنے نیں بجلیاں دے میند و رہن توں پہلاں دے حال دے نال<sup>(7)</sup>

2002ء وچ جھپے کل کلام دی فہرست وچ منیر دے دو ڈرامے ”قصہ دو بھراواں دا“ تے  
”کلے آدمی دے سفر دا“ دا ذکر اے، پر ایہہ ایس پرانگے وچ شامل نہیں جدوں کہ ایس توں پہلاں  
ایہہ ڈرامے کل کلام (1988ء) تے 1992ء والے ایڈیشن وچ موجود نیں۔

منیر نیازی دی پنجابی شاعری کئی وجہاں نال گوہ گوچری اے۔ اک تاں ایہہ کہ اوں  
جس انداز نوں رواج دین دا چارہ کہتا اوہدی کئی پیڈھی مثال پنجابی وچ موجود نہیں سی۔ منیر نے  
اسوہی پدھرتے وی تے موضوعی اعتبار نال وی شاعری دا نوواں باغ لایا۔ اوہتے زبان دے ٹرے  
آؤندے سچیاں نوں توڑن دا آہرو کیتا تے شعری ڈھانچے نوں وی بدلیا۔ کیوں جے ایس توں  
پہلاں ورتی جان والی زبان مخصوص معنویت رکھدی سی اوہ معنی جیہڑے روایت مطابق ٹرے  
آؤندے سن پر منیر نے اپنی پنجابی شاعری وچ لفظاں نوں انج ورتیا جے لفظ جنس تے اوہدیاں  
صفتاں دا روپ دھار گئے۔ یعنی منیر نیازی نے لفظاں نوں معنی توں بوہتا خیال تے تصورات دی  
شکل دین لئی ورتیا۔ دو جے لفظاں وچ اوہنے لفظاں راہیں علم یاں اطلاع دین دا کم نہیں کہتا سگوں  
جذبائی تے احساساتی رویاں نوں رلا کے متھے مفہوم وچ وسعت تے ہمہ گیری پیدا کیتی۔ ایہہ  
آسان کم نہیں سی۔ خورے کئے داغلی تے خارجی تجربیاں دے ملن نال کسے اک لمحے ایہہ کیفیت  
پیدا ہوندی اے۔ منیر نے شعری کیفیات تے وارداتاں دی اک سطح نوں کئی جہتاں دین دی کوشش  
کیتی۔ انج نہ صرف اوہدی زبان موکھی ہوئی سگوں اوہدے اظہار وچ وی وسعت آئی۔ ایہو کارن  
اے جے منیر دی شاعری دا مطالعہ قاری نوں خیال، خواب، حقیقت تے غیر حقیقت دے کئی  
جزیریاں دی سیر کرواندا اے۔ اوہدی لفظالی متھی متھی معنویت نہیں رکھدی تے نہ ای اوہ اکہرے  
تصور تک اپڑاندی اے۔ سگوں اک متحرک تصور تصویر بن کے سامنے آکھلوتا اے جیویں کسے ماہر  
مصور دی پینٹنگز ہووے۔ گل بھاویں بڑی سدھی سادی ہوندی اے پر انکشاف بن کے ظاہر

ہوندی ہے:

انہاں دا اک اُچا مپہ بند مکاناں ورگا  
 کہتے کہتے کوئی دیوا بلدا گورستاناں ورگا (8)  
 (رستے وچ اک شہر)

منیر دی اک نظم اے ”سفر دی رات“ ایہہ نظم معنوی اعتبار نال جو کجھ وی ہودے پر  
 اوہدی مصورانہ مہارت دا بھرواں ثبوت دیندی ہے۔ اوہ اک ماہر پینٹر وانگ لفظاں نوں مختلف  
 رنگاں دے شیڈ دے کے اک لینڈ سکیپ بناوندا ہے:

ورھدے مینہ وچ ٹریا جاواں رات سی بہت ہی کالی  
 اپنے ای پرچھاویں کولوں دل نوں ڈراون والی  
 شاں شاں کردے زکھ پچل دے انھیاں کردیاں واواں  
 اوس رات تے بوہتے لوکی بھل گئے گھر دیاں راہواں (9)

منیر دی پنجابی شاعری دی ایہہ صفت اوہنوں دوہے شاعراں توں اُکا وکھرا کردی ہے  
 تے نویں شاعری دا اوہ تصور جو سٹھ دی دہائی وچ اگھڑیا سی پنجابی وچ اوہدا سب توں پہلا تے موثر  
 نمائندہ منیر نیازی ای اکھواندا ہے۔

”دوہہ“ وچ صرف چار مصرعیاں نال منیر نیازی سراپا نگاری کردا ہے تے مزاں  
 بھرے اکھراں اوہنے اک کڑی دی تصویر ایسی طرح بناوندا ہے:

مٹھرا پھل گلاب دا  
 تے چائنہ ورگی اکھ  
 بدل چیت دساکھ دا  
 اوس کڑی دا لک (10)

سراپا نگاری دی اک ہور مثال ”وحشی عورت“ تے کجھ ہور نظماں وچ وی موجودا ہے پر ایہہ  
 اوہ تصویراں نیں جیہڑیاں بزیاں واضح طور تے نظر آؤندیاں نیں جدوں کہ منیر نیازی کجھ تصویراں  
 نوں تجریدی (Abstraction) انداز وچ وی تخلیق کیتا ہے۔ اوہدی نظم ویکھو ’فراق دی رات‘:

لمی رات فراق دی

## جیویں ٹھنڈی سل

چڑھیا چن اسمان تے

کننن لگا دل (11)

گھٹ مصرعیاں دیاں ایہناں نظماں وچ سوچ فکر تے تخیل دے کئی رنگ نظری  
 آؤندے نیں۔ منیر ایہناں نظماں راہیں استعاریاں وچ گلاں کردا اے۔ جنگل، جادو، طلسم،  
 چڑیل تے قبرستان جے اوہدے کسے داخلی یاں خارجی خوف ول اشارہ کردے نیں تے شیر، چیتے،  
 مور، ہرن، سورتے سہ طاقت، چالاکی کسن مصومیت تے جنسی روپاں ول سینتاں ماروے نیں۔  
 سورج، چن، تارے، دھرتی، رکھ، ہوا، بدل، مینہ، دریا، دن رات، شام تے ہنیرے اونہوں  
 روحانی تے جسمانی حوالیاں نال کائنات نال جوڑن دا آہر کردے نیں۔ اوہ لال کالے بسنتی تے  
 چتے رنگاں نال کجھ اجیہیاں تصویراں بناؤندا اے جیہڑیاں پنجابی شاعری وچ ایس توں پہلاں نظر  
 نہیں آؤندیاں۔ اوہ حرفاں نوں انج جوڑدا اے جیویں نقطیاں دا سفر کدے خط مستقیم، خط منحنی،  
 دائرہ چوکور، مستطیل، بیضوی تے خوری ہو کر کبھڑی کبھڑی شکل اختیار کردا اے۔ منیر خیال وچ ساہ  
 لیندا اے حرفاں وچ جیوئدا اے تے رنگاں وچ تحلیل ہو کے اندر لے، باہر لے موسماں نوں تھہ  
 لاؤندا کسن دی پراسراریت تک اپڑن دا آہر کردا اے۔ ہو سکدا اے اوہ ڈریا ہو یا بندہ ہووے، ہو  
 سکدا اے اوہدے ڈرتے خوف دی اصل اوہدے ماضی دے کسے ڈٹھے، ان ڈٹھے تجربہ نال جڑی  
 ہوئے، ہو سکدا اے اوہ کسے نوں ٹٹ کے چاہن دا خواہش مند ہووے تے ایہہ وی ہو سکدا اے  
 جے اوہ خود چاہے جان دے فریب وچ مبتلا ہووے۔ ایہناں ساریاں نفسیاتی الجھناں دا کھرا  
 اوہدے ماضی تک اپڑدا اے:

اگے وی کجھ نظر نہیں آؤندا

یاد وی کجھ نہیں رہندا

(اک پل قیامت دا)

منیر دی شخصیت دی تعمیر وچ بچپن توں بڑھاپے تک دے پچھلے عرصے دے اکاپے نوں  
 ایچ حاصل اے۔ نفسیاتی طور تے منیر نے کئی عمرے ماں دی محبت تے مامتا وچ اشتراک نوں کسے  
 طرح وی قبول نہیں کیتا۔ بھائی ایس بارے اوس نے کدے کھل کے اظہار نہیں کیتا پر جتوں

تیک ماں دی دوجی اولاد دا تعلق اے منیر نے اوہنوں کدے Own وی نہیں کہیتا تے نہ کدے اوہناں دا ذکر کسے اگے کہیتا۔ عرمانہ مشتاق مانی دی مرتب کتاب ”اُس شکل کو میں نے بھلا یا نہیں“ وچ منیر نیازی دا انٹرویو ”آخری انٹرویو“ دی سرناویں نال شامل اے۔ ایہہ انٹرویو خالد منہاس جوائنٹ ایڈیٹر روزنامہ اوصاف نے لیا۔ ایس انٹرویو وچ منیر نیازی نے دیا اے جے اوہناں دے والداناں فتح محمد خاں نیازی سی تے اوہ محکمہ نہرو وچ ملازم سن۔ اک درخت دے تھلے آکے فوت ہوئے۔ اوس ویلے منیر دی عمر صرف اک سال سی۔ ایسے انٹرویو وچ جدوں اوہناں توں ایہہ پچھیا گیا کہ اوہ کہنے بہن بھائی نیں؟ تے ایہدے جواب وچ اوہناں آکھیا:

”میرا کوئی بہن بھائی نہیں کیونکہ جب میں ایک سال کا تھا تو میرے والد کا انتقال ہو گیا تھا۔ میری والدہ کی دوسری شادی میرے چچا سے کر دی گئی۔ اُس میں سے بہن بھائی ہیں، مگر میں انہیں own نہیں کرتا کیونکہ انہوں نے میرے ساتھ بہت زیادتیاں کیں۔ سب سے بڑی زیادتی جس بات کا گلہ مجھے ہمیشہ رہا کہ میری والدہ کا پیار مجھ سے چھین لیا۔“ (12)

باپ دی موت اوہدی اک وڈی محرومی سی:

”والد کے بغیر ایک ہلکی سی بے آسری اور عدم تحفظ کا احساس رہتا تھا۔“

انج ای اولاد دی محرومی وی اوہدے شعور دے کسے تہہ خانے وچ موجود سی۔ انج لگدا اے جیوں منیر دی حیاتی دے ایہہ داخلی تجربے تے مشابہے اوہدی اردو تے پنجابی شاعری وچ رچے بے گداز دا باعث نیں۔ منیر دا اک اردو شعر اے:

میری ساری زندگی کو بے ثمر اس نے کیا

عمر میری تھی مگر اُس کو بسر اُس نے کیا

شاید ایہہ اوہدیاں جماندرو محرومیاں دا سٹہ ہووے جدوں زندگی نوں فرد نہیں گزاردا

سگوں زندگی فرد نوں گزاردی اے تے فیر اوہ کلا رہ جاندا اے:

آدی کلا رہ جاندا اے (14)

(وقت توں اگے نکلن دی سزا)

منیر دی شعری کائنات اردو تے پنجابی زبان دے اظہاری سانچیاں وچ ہون دے

باوجود اک ای سوے توں مہنٹی دسدی اے تے ایہہ سومہ اوہو اے جیہدے وچ اوہدی کجھی تے بے کجھی دے زمانے لنگھے۔ خان پور (ہوشیار پور) توں ساہیوال، بہاولپور تے لاہور دیاں فضاواں مل کے اوہدی شاعری داکینوس بناوندیاں نیں۔ اوہ شوالک دیاں پہاڑیاں ہون یا اوہناں پہاڑیاں توں نکلن والیاں ندیاں تے جھٹھے، ہوشیار پور شہر دی برکھا زرت داحسن ہووے یا پاکستان بن ویلے دی مارگٹ، ایہہ سب کجھ اوہ خام مواد اے جیہدے ملن نال اوہدی شاعری وی خارجی بو طبقا مرتب ہوندی اے۔ منیر دیاں داخلی الجھتاں دکھ، محرومیاں، آساں، مراداں، کامیابیاں، ناکامیاں، ہزل لال کالے خاکی تے بستنی رنگ وچ ظاہر ہو کے اک اجیتی شاعری مرتب کردیاں نیں جیہنوں حیرت تے طلسم دے نال نال کشف وی آکھیا جاسکدا اے۔



## حوالے

- 1- J.A. Cuddon: A Dictionary of Literary Terms; Penguin Book, 1991
- 2- سہیل احمد خاں، محمد سلیم الرحمان: منتخب ادبی اصطلاحات؛ جی سی یونیورسٹی لاہور 2007ء ص 135
- 3- ایوب ندیم: ہوئے ہم کلام؛ گوہر پبلی کیشنز، لاہور 2009ء ص 188
- 4- ڈاکٹر خواجہ محمد زکریا: انتخاب زریں اردو نظم؛ سنگت پبلشرز لاہور 2007ء ص 20
- 5- منیر نیازی: گل کلام؛ فضل حق اینڈ سنز لاہور 1992ء ص 108
- 6- ایضاً ص 179
- 7- ایضاً ص 98
- 8- ایضاً ص 32
- 9- ایضاً ص 43
- 10- ایضاً ص 30
- 11- ایضاً ص 88
- 12- عمرانہ مشتاق مانی: اُس شکل کو میں نے بھلا یا نہیں؛ مقبول اکیڈمی لاہور 2007ء ص 97
- 13- تنویر ظہور: دلچسپ ملاقاتیں؛ الحمد پبلی کیشنز لاہور 1992ء ص 34
- 14- منیر نیازی: گل کلام؛ ص 92

Khoj

Research Journal Deptt. of Punjabi  
Language & Literature  
Vol:31, Jul.-Dec. 2008, pp 53-66

کھوج

تحقیقی مجلہ شعبہ پنجابی زبان و ادب  
جلد 31، جولائی دسمبر 2008ء شماره نمبر 1

## راجا رشید محمود دی شاعری و بیچ قرآن تے حدیث دے حوالے

☆ ڈاکٹر محمد سلطان شاہ

### Abstract

In this essay, the essayist has discussed the references of the Holy Quran and the Hadith Mubarak in Raja Rasheed Mahmood's Naat. In the beginning of the essay, the essayist has presented the definition and brief history of Naat. Then, only those verses of Raja Rasheed are being discussed which have some references from the Holy Quran and the Hadith Mubarak. Dr. Sultan has also quoted the Holy Quran and the Hadith Mubarak with such verses, which has not only facilitated in understanding his views but also given authenticity to them.

نعت حضور پاک ﷺ دی تعریف داناں اے۔ ایہہ سچ اے پئی آپ حضور ﷺ دے ایس دنیا تے تشریف لیاون توں پہلاں وی نعت کہی گئی۔ پہلیاں نبیاں نے وی آپ دی بشارت دیندیاں ہونیاں ایہہ پاک ذکر کیتا۔ حضرت عیسیٰ علیہ السلام دا ذکر تے قرآن مجید وچ وی ہے تے جس ویلے عیسیٰ بن مریم نے کہیا کہ اے بنی اسرائیل! میں تہاڈے ول اللہ دا گھلیا ہویا آیاں۔

☆ صدر شعبہ علوم اسلامیہ، جی۔ سی یونیورسٹی، لاہور

تورات جیہڑی میرے توں پہلی کتاب سی، اوہدی تصدیق کرداتے اوس رسول دی خوشخبری دیندا، جو میرے توں بعد تشریف لیاون گے تے اوہناں داناں احمد اے (صلی اللہ تعالیٰ علیہ وآلہ وسلم)۔<sup>(1)</sup>

یکن دے بادشاہ تیج حمیری دے تے حضور پُر نور ﷺ دے وڈکیاں وچوں کعب بن لوی دے نعتیہ شعر وی مددے نیں۔ آپ سرکار ﷺ دے اعلان نبوت توں پہلاں وی حضرت عبدالمطلب، حضرت ابوطالب تے سیدہ آمنہ ہوراں دے شعر کتاباں وچ محفوظ نیں۔ پر جد اللہ پاک نے اپنا کلام (قرآن شریف) نازل کرنا شروع کیتا، حضور نبی کریم ﷺ دی تعریف دی اہمیت وی ظاہر ہوئی، نالے صحابہ کرام (رضی اللہ تعالیٰ عنہم) نوں نویں مضمون لہھے۔ حضور ﷺ دی من موعی صورت تے پاک سیرت نے مدح دے رنگ برنگے پھل کھڑاون دیاں راہواں نکھاریاں۔

اللہ کریم نوں پہلا نعت گو تے قرآن کریم نوں نعت دا پہلا مجموعہ کہیا جاندا اے۔ پروفیسر حفیظ تائب لکھدے نیں: رسول پاک ﷺ دی منظوم مدح (جنہوں اسیں نعت آکھنے آں) نے آپ دی مبارک حیاتی وچ ای باقاعدہ فن دی حیثیت اختیار کر لئی سی۔ ایہہ فن حضور پاک ﷺ دے اشارے تے ہوند وچ آیا تے ایہدے معیار آپ دے سامنے مقرر ہوئے۔<sup>(2)</sup>

میں سمجھناں کہ نعت گو واسطے قرآن تے احادیث دا علم ہونا ضروری اے۔ ایہہ کوئی غزل تے ہے نہیں کہ خیال دی اڈاری لئی روک ٹوک ای کوئی نہ ہووے، جدھر چاہوڑے پھرو، جو چاہو کہہ دیو۔ توحید تے رسالت دیاں حداں نال نال نیں۔ حضور پاک ﷺ رب کریم دی مخلوق نیں، پر محبوب وی نیں، ایس لئی ضروری اے کہ نہ رسالت دی مدح نوں توحید تیکر اڑایا جائے تے نہ کوئی ایسا مضمون کوئی ایسا فقرہ یا لفظ استعمال ہووے جیہڑا سرکار ﷺ دے مقام توں گھٹ ہووے کہ ”أَنْ تُحَبِّطَ أَعْمَالَكُمْ“ (3) تہاڈی کیتی کرتی کھو پے جاوے گی۔

نعت دے موضوع تے دنیا وچ سب توں زیادہ کم کرن والا شاعر، محقق تے ادیب راجا رشید محمود اے جہدے اردو زبان وچ نعتاں دے چھیالی (46) مجموعے اج تیکر چھپ چکے نیں، 47 واں زیر ترتیب اے۔ ایہدے توں اڈتھق، تنقید تے تدوین دے حوالے نال کوئی چارویہاں کتاباں چھاپے چڑھ چکیاں نیں۔ مہینا وار ”نعت“ دی باقاعدہ اشاعت دے 21 سال پورے ہو گئے نیں۔ جنوری 2009ء دار سالہ 22 ویں سال دا پہلا پرچہ ہووے گا۔ سیرت النبی (صلی اللہ تعالیٰ علیہ وآلہ وسلم) سیرت صحابہ، سیرت اولیاء اللہ، تصوف تے حدیثاں دی تشریح دے

موضوعات اُتے ایہدیاں کتاباں ایہناں توں اڈنیں۔

راجا رشید محمود کول ایم اے (اردو) دے نال نال درس نظامی دی سند وی ہے۔ ایہہ نہ وی ہندی، تاں وی ایہدا قرآن، حدیث، حضور پاک ﷺ دی سیرت اُتے اسلامیات دا نگھاتے محققانہ مطالعہ ایہد امد دگا رے۔ ایس لئی ایہدی نعت ہر طرح معیاری اے۔

ڈاکٹر سید اختر جعفری مدینے دے ایس پانڈھی دی پنجابی نعتیہ شاعری تے لکھے گئے اپنے مضمون وچ لکھدے نیں۔ ”نعت گو شاعر لئی ات ضروری اے پئی اوہ قرآن، تفسیر، فقہ، حدیث، سیرت تے تاریخ اُتے ڈوگھی نظر رکھدا ہووے، تاریخی واقعات دی صحت دا چنگا جانو ہووے تے فیر اوہناں نوں شعراں راہیں بیان کرن دی پوری صلاحیت رکھدا ہووے۔ ”نعتاں دی اٹی“ (نعتاں دا مجموعہ) دے مطالعے نال معلوم ہوندا اے پئی ایہہ ساریاں صفتاں راجا رشید محمود وچ کمال صفت نال موجود نیں<sup>(4)</sup>۔

پروفیسر ڈاکٹر عصمت اللہ زاہد دا مضمون ”راجا رشید محمود دی نعتیہ شاعری“ شام و سحر لاہور دے اٹھارہ صفحیاں تے پھیلایا ہویا اے۔ اوہدے وچ اے: ”نعتیہ ادب بارے راجا رشید محمود دا“ نہ صرف اردو پنجابی وچ مطالعہ اے، سگوں فارسی تے عربی نعت اُتے وی اوہناں دی گہری نظر رہی اے،<sup>(5)</sup>

قرآن، حدیث، سیرت تے عربی فارسی اردو تے پنجابی دے نعتیہ ادب تے گہری نظر دے نال نال شاعری دیاں خوبیاں وی ایہدی نعت دی خصوصیت اے۔ پروفیسر ڈاکٹر عصمت اللہ زاہد لکھدے نیں: فنی حوالے نال ویکھیے تے راجا رشید محمود دی نعت وچ بہت ساریاں خوبیاں نظر آوندیاں نیں۔ خوبصورت اصطلاحواں، من کچھویاں تشبیہاں، قافیے دی ٹھکویں بندش، آزاد قافیے دا استعمال، تلمیح دی ورتوں، خیال دی نزاکت، بحراں دی روانی تے بھرویں تاثر ورگیاں خوبیاں نے اوہناں دے کلام نوں ہر من پیارا بنا دتا اے،<sup>(6)</sup>

ڈاکٹر آفتاب احمد نقوی شہید نے اپنے مضمون وچ لکھیا: نعت، محمود دی فکری تے فنی کاوشاں دا اک اچھا نمونہ اے جس تے اوہ جناوی فخر کرے گھٹ اے،<sup>(7)</sup>

اس مضمون دی دوجی قسط 8 مئی دے اخبار وچ چھپی جہدے آخر وچ اوہناں کہیا: ہو سکدا اے، لوکی ایہناں دی اردو نعت دے مقابلے وچ پنجابی نعت ہور وی زیادہ فکر دے حوالے نال اگانہہ ودھی ہوئی محسوس کرن،<sup>(8)</sup>



عصمت اللہ زاہد ہوراں اپنے تحقیقی مقالے ”پنجابی نعت دے جدید رجحانات“ وچ کئی جگہ راجا صاحب دے شعر حوالے دے طور تے پیش کیتے،<sup>(9)</sup>

راجا رشید محمود دے ہن تیکر تن پنجابی نعتیہ مجموعے چھپے نیں: نعتاں دی اٹی۔ ساڈے آقا سائیں علیہ حق دی تائید۔ انہاں دے پنجابی شعراں وچ قرآن تے حدیث دے کئی حوالے ملدے نیں۔

اللہ تعالیٰ جل جلالہ نے سارے نبیاں دیاں روحاں کولوں ایہہ وعدہ لیا کہ جے تہاڈے ہندیاں حضور پاک علیہ آگئے تے تئیں اوہناں تے ایمان لیانا، نالے اوہناں دی مدد کرنا:

لَتُؤْمِنَنَّ بِهِ وَلَنَنْصُرَنَّهُ<sup>(10)</sup>

محمود دی نعت وچ ایہدا حوالہ ایس طرح ملدا اے:

ہوئی بیثاق دے دن روحاں دے اقرار دی بارش<sup>(11)</sup>

سورۃ الاحزاب وچ فرمان اے:

لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ<sup>(12)</sup>

”حضور پاک علیہ دی پاک زندگی مومناں لئی نمونہ اے۔“

راجا صاحب کہندے نیں کہ اسوۃ حسنہ تے نہ چلن پاروں کردار خراب ہو چکے ہیں:

نہیں جو چلدے آقا پاک دے اسوے اُتے لوکی

پاٹے نیں کردار دے لیڑے، ہوئے لیر و لیر<sup>(13)</sup>

حضور پاک علیہ نول ساڈے وچ گھل کے رب کریم نے مومناں تے احسان کیتا تے

ایہہ احسان جتایا وی:

لَقَدْ مَنَّ اللَّهُ عَلَى الْمُؤْمِنِينَ إِذْ بَعَثَ فِيهِمْ رَسُولًا<sup>(14)</sup>

”بے شک اللہ دے مومناں تے احسان اے کہ اوہنے اوہناں وچ رسول گھلایا۔“

ساڈے آقا سائیں (صلی اللہ علیہ وآلہ وسلم) وچ اک شعراے:

رب نے گھل کے اوہناں توں، احسان اساں تے کیتا

کوئی ساڈی سار نہ لیندا، جے سرکار نہ ہندے<sup>(15)</sup>

وَمَا أَرْسَلْنَاكَ إِلَّا رَحْمَةً لِّلْعَالَمِينَ

”اساں تسانوں ساریاں جہاناں لئی رحمت بنا کے گھلایا۔“<sup>(16)</sup>

وَبِالْمُؤْمِنِينَ رَءُوفٌ رَّحِيمٌ

”نالے مومنناں لئی روف تے رحیم“<sup>(17)</sup> دا اثر انج نظر آوندا اے:

رحمت جے نہ بنوندا حضور تائیں  
لارا لاوندا رب کیوں جتناں دا<sup>(18)</sup>

اک ایہہ گل سہارا دیندی تور قیامت تیکر  
رحمت دی بکل نے ساڈے سارے عیب چھپونے<sup>(19)</sup>

سورۃ الحجرات وچ اللہ تبارک و تعالیٰ نے حکم دتا کہ ایمان والیو! اپنیاں اوازاں نبی (علیہ السلام) دی آواز توں اُچی نہ کرو تے نہ اوہناں دی بارگا ہے! چیک کے بولو، جیکن آپو وچ اک دو جے نال چیکدے او۔ انج نہ ہووے جے تہاڈے چنگے عمل لگے جان تے تہانوں پتا وی نہ لگے<sup>(20)</sup>۔  
راجا رشید محمود نے ایہہ گل انج پچائی:

آقا دی درگاہوں ردیاں جاناں جے  
اُچی نیویں گل جے نکلی مونهاں چوں<sup>(21)</sup>

بدر دی لڑائی وچ آقا حضور (علیہ السلام) نے روڑیاں دی مٹھ کافراں دے لشکر ول سٹی تے ہار اوہناں دا مقدر بن گئی۔ خالق مالک جل و علاء نے فرمایا:  
وَمَا رَمَيْتَ إِذْ رَمَيْتَ وَلَكِنَّ اللَّهَ رَمَى<sup>(22)</sup>  
”ایہہ مٹھ روڑیاں دی تساں نہیں سٹی، جیہڑی کہ تساں سٹی اے، لیکن ایہہ تے اللہ نے آپوں سٹی اے“۔ رشید محمود نے ایہہ ذکر انج کیتا:

تہاڈے چاہن پاروں بدر وچ کثرت نوں ہار آئی  
ہے آیت ”مارمیت“ وی مرے آقا تہاڈے لئی<sup>(23)</sup>

خدائی فرمان ہے:

وَمَا يَنْطِقُ عَنِ الْهَوَىٰ ۖ إِنْ هُوَ إِلَّا وَحْيٌ يُوحَىٰ ۖ<sup>(24)</sup>

”ایہہ (رسول علیہ السلام) اپنی مرضی نال تے کجھ کہندے ای نہیں۔ ایہہ تے اوہو ای بولدے نیں جو ایہناں نوں وحی کیتی جاندی اے“۔

محمود دی نعت وچ ایہہ مضمون ایس طرں نبھیا اے:

”ما یَنْطِقُ“ دے سچے وچوں کاڈھ ایہہ رب نے کڈھی

ہر گل آقا دی اے لکو ، سولاں آنے سچی  
گلاں جنیاں نیں میرے حضور علیہ  
”ماہنطق“ موجب خدا دیاں نیں<sup>(25)</sup>

حدیثاں وچ تے ڈکاں مار دا اے سچ دا ہیرا  
تھاڈی بات حکمت وچ پرچی یا رسول اللہ!<sup>(26)</sup>

حکم ہويا: جس ویلے لوکی اپنیاں جاناں تے ظلم کر بیہن تھاڈے کول حاضر ہون۔

وَلَوْ أَنَّهُمْ إِذْ ظَلَمُوا أَنفُسَهُمْ جَاءُوكَ

فیر اللہ کولوں استغفار چاہن تے رسول (علیہ) ایہناں دی سفارش کرن، فیر دیکھن کہ  
رب توبہ کیکن قبول کردا اے تے رحیم کتاں اے۔ راجا رشید محمود او گنہاراں لئی ایس رہنمائی دا ذکر  
ایس طرح کردا اے۔

لکھے ہوون جے ”جاء وک“ دے اکھر دل دی تختی تے  
گناہی جووی اے جاوے گا تاں اوہناں دے بوہے تے<sup>(28)</sup>

ذوالجلال نے فرمایا:

قُلْ إِنْ كُنْتُمْ تُحِبُّونَ اللَّهَ فَاتَّبِعُونِي يُحْبِبْكُمُ اللَّهُ<sup>(29)</sup>

لوکاں نوں فرما دیو کہ جے تسیں اللہ نال محبت رکھدے او تے میری اتباع (پیروی)  
کرو۔ اللہ تھاڈے نال محبت فرمائے گا۔ راجا رشید محمود مسلماناں دی دو جیاں قوموں کولوں ہون  
والی رسوائی دی وجہ ایہو ای دسد اے کہ اسماں حضور پاک علیہ دی اطاعت تے اتباع دی راہ  
چھڈی ہوئی اے:

آقا دے پیراں توں نہیں جو لیندے راہنمائی  
کنڈ لوئی جانے آں سب دشمن قوماں کولوں<sup>(30)</sup>

رب کریم سانوں مغفرت دی سوکھی راہ دکھانا چاہندا سی تے اوہنے پہلوں ایس کم دی

اہمیت دی:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ ☆ يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا

تَسْلِيمًا<sup>(31)</sup>

(بے شک اللہ تے اوبدے فرشتے نبی (علیہ السلام) تے درود گھلدے نیں۔ ایمان والیو! تئیں وی اوہناں تے درود بھیجوتے خوب خوب سلام)۔ شاعر رب دے ایس کرم دا ذکر ایس طرح کردا اے:

سانوں انج درود پڑھن تے رب کریم نے لایا  
جسم دے سارے لوں کنڈے سب ناڑاں ورد کماون<sup>(32)</sup>

سورہ بنی اسرائیل اُتے النجم وچ اللہ پاک نے معراج شریف دا ذکر فرمایا اے<sup>(33)</sup> نبی

پاک علیہ السلام داندح گو کہندا اے:

اللہ تے محبوب اللہ دے دونوں اسراء راتیں سن  
عرشاں تو وی دوراے جیہڑا، او سے محل اُچیرے وچ<sup>(34)</sup>

پتا نہیں چپ چپتے رب نے کئی وار بلایا  
میرے آقا گاہ چھڈیاں نیں اُو اُذنی دیاں راہواں<sup>(35)</sup>

غرض راجا رشید محمود قرآن پاک دی تعلیم دے حوالے نال اپنے آقا پاک علیہ السلام دی مدح وچ قلم چک کے ایہہ دس رہیا اے کہ حضور پاک علیہ السلام دے مقام دا اصل جانوں تے رب تعالیٰ آپ اے جنھے آپ سرکارنوں ایہہ مقام عطا کیتا اے:

غالب ثنائے خواجہ بہ یزداں گزاشتیم  
کاں ذات پاک مرتبہ دان محمد است

ایس یقین نال بندے نوں عاجزی تے انکساری دی دولت نصیب ہو جاندی اے۔ پروفیسر ڈاکٹر عصمت اللہ زاہد کہندے نیں: ”راجا رشید دی نعت گوئی دی سب توں وڈی تے اہم خوبی، جیہڑی اگھڑ کے سامنے آؤندی اے، اوہناں دی کمال درجہ عاجزی تے انکساری اے۔ راقب قصوری دیاں نعتاں توں بعد شاید راجا رشید محمود اوہ دو بے خوش قسمت شاعر نیں جنہاں نوں ایہہ دولت نصیب ہوئی،“<sup>(36)</sup>

قرآن پاک دے نال نال راجا صاحب دی نعت وچ حدیثاں دا وی بڑا گوہڑا اثر دکھالی دیندا اے۔ مشہور الفاظ تے ”لولاک لما خلقت الافلاک“ نیں، پر ایہہ حدیث معنوی طور تے درست اے لفظاً انج کہ لولاک لما خلقت الدنيا، یا لولاک لما اظہرت الربوبیہ دے الفاظ تے ملدے نیں ”افلاک“ دا لفظ نہیں ملدا۔ بہر حال محمود دے کلام وچ ایس حقیقت دا اظہار انج اے:

اڈنیر کانتاتاں دا کھڑا کیتا اے خالق نے  
ایہہ جو کجھ ہے، سب کجھ ای مرے آقا تہاڈے لئی<sup>(37)</sup>

كُنْتُ كَنْزًا مَخْفِيًا مَخْفِيًا ☆ دی تلمیح ایس صورت وچ سامنے آرہی اے:

کنز مخفی ظاہر ہونا چاہندا سی تے تاہیوں سن  
آقا دی تخلیق لئی جذبے بے تاب حقیقت دے<sup>(38)</sup>

حدیث: اَوَّلُ مَا خَلَقَ اللَّهُ نُورِي ☆ دے نال آقا علیہ دی ختم نبوت دا مضمون دیکھو:

پہلی نیں مخلوق تے نبی اخیر لے آقا جیویں  
ابداں والیاں ماڑیاں تائیں ازلاں والے بولے<sup>(39)</sup>

سرکار علیہ دا فرمان اے: مَنْ زَانِي فَقَدْ رَأَى الْحَقَّ ☆

جیسے مینوں دیکھیا اوہنے حق نوں دیکھ لیا۔ راجا رشید محمود کہند اے:

مدد کرے جے ”مَنْ زَانِي“ دا فرمان حضوری  
دیکھن جوگا ہوواں تے میں خالق اکبر دیکھاں<sup>(40)</sup>

آپ حضور علیہ نے فرمایا:

أَصْحَابِي كَالنُّجُومِ فَبَابِهِمْ أَفْتَدِيْتُمْ إِنْ تَدَبَّرْتُمْ ☆<sup>(41)</sup>

میرے صحابہ ستاریاں ورگے نیں۔ جیہدے چکھے ٹرو گے، ہدایت پالو گے۔ راجا رشید

دے کلام وچ صحابہ کرام (رضی اللہ عنہم) دا بہت ذکر ملدا اے:

ہر اک بندہ تارے وانگر راہ دکھاندا دسدا اے  
دل دیاں اکھاں نال تکیا اوہناں دے آسے پاسے نوں  
اوہ کیہ انسان سن تے کیہڑیاں عرشاں دے تارے سن  
جہڑے سن دے رہے ورہیاں نبی سوہنے دیاں گلاں  
اوہناں دے مرتبے دا کیہہ اسیں احساس کر سکے  
دیں راتیں رہی اصحاب تے دیدار دی بارش<sup>(42)</sup>

فکری گل ایہہ ہے کہ راجا رشید محمود دیاں نعتاں اُتے قرآن حدیث وچ موجود سرکار

علیہ دی مدح ثنا دا بہت اثر اے تے سچ ایہو ای اے کہ جیہڑا بندہ قرآن حدیث دا بھرواں علم

نہیں رکھدا اوہ معیاری نعت کہہ ای نہیں سکدا۔

## حوالے

- 1- الصف - 9:61
- 2- لکھاری، لاہور۔ نعت نمبر۔ کتاب لڑی نمبر 28,29۔ ص 106 (حفظ تائب و مضمون ”نویں نعت داسرناواں“)
- 3- الحجرات - 2:49
- 4- لکھاری، نعت نمبر۔ ص: 264 (ڈاکٹر سید اختر جعفری و مضمون ”مدینے دا پاندھی“)
- 5- شام و سحر (ماہنامہ) لاہور۔ نعت نمبر 5 جنوری فروری 1982۔ ص 475
- 6- ایضاً، ص 479
- 7- مغربی پاکستان (روزنامہ) لاہور یکم مئی 1983ء ص 7 (آفتاب احمد نقوی و مضمون ”راجا رشید محمود دی پنجابی نعت“ پہلی قسط)
- 8- مغربی پاکستان - 8 مئی 1983ء۔ ص 7 (آفتاب احمد نقوی دے مضمون دی دوجی قسط)
- 9- عصمت اللہ زاہد (مرتب) جدید پنجابی نعت۔ پاکستان پنجابی ادبی پرہیا، لاہور 1985ء ص 27,28,30,38 (مقدمے دے طور تے مرتب و مقالہ ”پنجابی نعت دے جدید رجحانات“)
- 10- آل عمران - 81:3
- 11- محمود، راجا رشید۔ نعتاں دی اٹی۔ اختر کتاب گھر، لاہور۔ 1987ء۔ ص 62
- 12- الاحزاب - 21:33
- 13- محمود، راجا رشید۔ ساڈے آقا سائیں۔ اختر کتاب گھر، لاہور۔ 2001ء۔ ص 33
- 14- آل عمران: 164:30
- 15- ساڈے آقا سائیں۔ ص 79
- 16- الانبیاء - 107:21
- 17- التوبہ - 128:9
- 18- ساڈے آقا سائیں۔ ص 16
- 19- ایضاً، ص 56
- 20- الحجرات - 2:49
- 21- نعتاں دی اٹی۔ ص 24
- 22- الانفال - 17:8

- 23 نعتاں دی اٹی۔ ص 42
- 24 النجم۔ 4,3:53
- 25 ساڈے آقا سائیں۔ ص 90,87
- 26 نعتاں دی اٹی۔ ص 65
- 27 النساء۔ 64:4
- 28 نعتاں دی اٹی۔ ص 69
- 29 آل عمران 3:31
- 30 ساڈے آقا سائیں۔ ص 97
- 31 الاحزاب۔ 56:33
- 32 ساڈے آقا سائیں۔ ص 93
- 33 بنی اسرائیل۔ 1:17۔ النجم۔ 9:53،.....، 17.....
- 34 نعتاں دی اٹی۔ ص 35
- 35 ساڈے آقا سائیں۔ ص 28
- 36 شام و سحر۔ نعت نمبر 5۔ ص 471 (پروفیسر عصمت اللہ زاہد دا مضمون)
- 37 نعتاں دی اٹی۔ ص 41
- 38 ایضاً۔ ص 57
- 39 ایضاً۔ ص 112
- 40 ایضاً۔ ص 125
- 41 مشکوٰۃ المصابیح۔ کتاب المناقب
- 42 نعتاں دی اٹی۔ ص 61,51,39



Khoj  
Research Journal Deptt. of Punjabi  
Language & Literature  
Vol:31, Jul.-Dec. 2008, pp 67-84

کھوج  
تحقیقی مجلہ شعبہ پنجابی زبان و ادب  
جلد 31، جولائی دسمبر 2008ء شماره نمبر 1

## تماہی ”انکھ“ کنگن پور وچ چھپیاں لکھتاں دی بلیو گرافی

☆ عباد نبیل شاد

### Abstract:

This research article is presented by Abad Nabeel shad. In this article, he has given the bibliography of three monthly "Ankh" published from Kasur district since 1991. The writer has started with the introduction of the journal and then moved to the copy wise details of writings with their writers. In the end the writer has given the index which helps in easy access to any writer and his writings. Thus, the writer has tried to give eternity to this dying journal by saving its record.

کسے وی زبان دی ترقی تے اوہدے ادب دے وادھے لئی اخبار تے رسالے بڑا اہم کردا ادا کردے نیں۔ ہر لکھن والے دی سدھر ہوندی اے جے اوہدیاں لکھتاں فوری طور پڑھن والیاں تیکر اپڑن۔ ایس کم لئی اخبار تے رسالے لکھتاں نوں لوکاں تیک اپڑاندے نیں۔ ساڈے پنجاب وچ پنجابی اخبار تے رسالے بوہت گھٹ چھپدے نیں۔ ایس پاروں جدوں کوئی وی پنجابی رسالہ سامنے آؤندا اے تے اوہدا بھرواں سواگت کیتا جاندا اے۔ رسالیاں

☆ لیکچرار شعبہ پنجابی، گورنمنٹ اسلامیہ کالج، ریلوے روڈ لاہور



وچ چھپن والا ادب بھاریں دیر پانہیں ہوندا پر فیروسی اسیں اوس دور دے ادب دا مہاندر ایہدے راہیں ضرور ویکھ سکدے آں۔ فی بعضے ویلے ودھیاتے پختہ لکھتاں رسالیاں وچ چھپ جانیاں نیں جیہڑیاں حوالہ بن جانیاں نیں۔ رسالیاں وچ کیوں جے سچرا ادب چھپدا اے ایس لئی سانوں ادب دے موجودہ مہاڑتے ٹور داسجے ای پتا لگ جاندا اے۔

”انکھ“ تہا ہی کنگن پور ضلع قصورتوں 1991ء نوں چھپنا شروع ہويا۔ ایہدا باقاعدہ سرکاری ڈیکلریشن صابر علی بمل ہوراں لیا تے ایہہ بمل آرٹ کنسرن کنگن پور دی چھتر چھاویں چھپدا رہیا تے 1994ء وچ بند ہو گیا۔ جیہدی وڈی وجہ صابر علی بمل ہوراں دا دنیا توں ٹر جانا سی۔ ”انکھ“ کجھ عرصہ راقم دی ادارت وچ وی چھپدا رہیا تے اخیر پرچے اکتوبر، دسمبر 1994ء دے ایڈیٹر حمید ناصری ہوری سن۔ جدوں کہ ہتھ پڑتی پوان والیاں وچ ظفر اقبال ظفر، اکرم مشتاق چودھری، امجد علی شاکر، صابر علی بمل، شبیر حسین تے ایم حسین ظفر دے ناں شامل نیں۔

تہا ہی ”انکھ“ دے بھاریں اکاٹھ پرچے ای چھپ سکے پر مواد ولوں ایہدے وچ یاد رہ جان والیاں تے حوالہ جاتی لکھتاں چھپیاں۔ نویں لکھن والیاں دے نال نال منے پر منے شاعراں تے لکھاریاں دیاں لکھتاں انکھ دا حصہ بندیاں رہیاں۔ جیہناں پنجابی زبان و ادب دے ودھالی اہم کم کیتا۔

”انکھ“ دا دفتر اخیر پرچے تائیں راقم دی بیٹھک وچ ای رہیا۔ ایہدا پہلا شمارہ ہتھ دی کتابت نال چھپیا تے مگروں سارے پرچے کمپیوٹر راہیں کمپوز کروا کے لاہور وچ چھپوائے جان دے رہے۔

”انکھ“ وچ نعتاں، نظماں، غزلاں، گیت، چومصرے، کہانیاں، مضمون، انشائیے، انٹرویوز، یاداں اُچھے رنگ پٹھ کسے اک شاعر دیاں لکھتاں، تبصرے، خط پتر تے ادارتی صفحہ چھپدے رہے۔

”انکھ“ وچ چھپیاں لکھتاں دی بیلوگرافی دی ترتیب زمانی اے۔ ہر چھپی لکھت نوں اک مسلسل نمبر لادتا گیا اے۔ مہینے تے سال وار ترتیب نوں سامنے رکھیا گیا اے۔

آخر تے اشاریہ مصنف (Author Index) دے عنوان پٹھ حروف ابجد دی ترتیب نال لکھاریاں دے ناں نال اوہناں دیاں ساریاں لکھتاں دے نمبر دے دتے گئے نیں تاں جے

کسے لکھاری دی لکھت تک اپڑن وچ آسانی ہووے۔ ”انکھ“ تماہی دی بلوگرافی اِنج اے۔

### حصہ نثر

نمبر شمار	مضمون (عنوان)	لکھاری
<u>شمارہ 1۔ جنوری، فروری، مارچ 1991ء</u>		
1-	ترکی داستراط۔ ناظم حکمت	صدیق بابر
2-	لہور شہر دیاں اُچیاں ماڑیاں	مظہر ترمذی
3-	وڑیاں گھيو وچ تلیاں	ڈاکٹر گردیال سنگھ پھل
4-	گل اکھیاں دی	ڈاکٹر مسعود اقبال ساجد
5-	سچا دربار	امجد علی شاکر
6-	رفاقت ویلے دا ممتاز چتر کار	اقبال قیصر
<u>شمارہ 2۔ اپریل، مئی، جون 1991ء</u>		
7-	الف اللہ	محمد آصف خاں
8-	عبدالغفور قریشی دی پڑچول	سبط الحسن ضیغم
9-	لوہار، نائی تے فقیر	شفقت تنویر مرزا
10-	دیوے والا گیت	دیوندر ستھیارتھی
<u>شمارہ 3۔ جولائی، اگست، ستمبر 1991ء</u>		
11-	بلھے شاہ دی ذات کیہ پچھنا ایں	حمید ناصری
12-	اُچا سچا شاعر۔ بلھے شاہ	خلیل آتش
13-	وارث شاہ ہوری سچ کہہ چلے	الیاس گھمن
14-	سکدی روح۔ امین حزیں	محمد ریاض شاہد
15-	گلیلیو	اختر حسین سندھو
<u>شمارہ 4-5۔ اکتوبر 91ء توں مارچ۔ 1992ء</u>		
16-	خواجہ فرید	غلام مصطفیٰ کھوکھر

- 17- واہی بیجی تے عورت  
شمارہ 5- جولائی، اگست، ستمبر 1992ء  
ایم حسین ظفر
- 18- لوکاں دا شاعر۔ منظور نیازی  
امیر حمزہ ورک
- 19- سچ آکھ منا کیوں ڈرنا ایں  
شمارہ 6- اپریل، مئی، جون 1993ء  
امجد علی شاکر
- 20- ہیر وارث شاہ۔ دیوان پنجاب  
شمارہ 7- جنوری، فروری، مارچ 1994ء  
ڈاکٹر عصمت اللہ زاہد
- 21- اکورنگ کہا ہیں دا  
شمارہ 8- اکتوبر، نومبر، دسمبر 1994ء  
امجد علی شاکر
- 22- پڑیاں دا سفر کیہ اے  
اقبال قیصر
- کہانی
- نمبر شمار      عنوان      لکھاری
- شمارہ 1- جنوری، فروری، مارچ 1991ء
- 23- موہرا  
نعمت احمر
- 24- رنڈی  
راول راٹھ
- 25- چُنّی  
احمد شہباز خاور
- 26- گول  
فردوس حیدر
- 27- خورے کیوں؟  
ڈاکٹر شفقت حسین قاضی
- 28- تیکھی چپک  
احسان الہی ناوک
- شمارہ 2- اپریل، مئی، جون 1991ء
- 29- مینا  
بجنت کور
- 30- ندی کنارے پیاسا منکھ  
کلیر سنگھ کانگ

- 31- اڈیک غلام مصطفیٰ اسلم  
شماره 3- جولائی، اگست، ستمبر 1991ء
- 32- کلا کار اقبال ارپن
- 33- تہجی فخر دی اڈیک وچ ناصر رانا
- 34- چھیوں ڈاکٹر شفقت حسین قاضی
- 35- گجھی مرض امجد علی شاکر
- شماره 4-5- اکتوبر 91ء توں مارچ- 1992ء
- 36- جاگدی اکھ داسفنا منشا یاد
- 37- نہیوں لگدا دل میرا منجیت سنگھ رتو
- 38- جونسری احمد شہباز خاور
- 39- کوڑا گھٹ ڈاکٹر شفقت حسین قاضی
- 40- اک مہان بندی وان ظفر جمال
- 41- نکئی جہی گل تبسم ملک
- شماره 5- جولائی، اگست، ستمبر 1992ء
- 42- خالی پوسٹ کارڈ بچت کور
- 43- چکرو مہیپ سنگھ
- 44- دروازے دیدار سنگھ
- 45- بوٹے دی موت ڈاکٹر شفقت حسین قاضی
- 46- پرائز ڈسٹری بیوشن جاوید اقبال قادری
- شماره 6- اپریل، مئی، جون 1993ء
- 47- کسے نوں کیہ؟ فرخندہ لودھی
- 48- پورن دا بھگت کلونگ سنگھ ورک
- 49- قاتل کون؟ غلام شبیر رانا
- 50- مرن توں پہلاں شبیر حسین

شماره 7۔ جنوری، فروری، مارچ 1994ء

- 51- بھوت ڈاکٹر شفقت حسین قاضی
- 52- بھلیکھا بچت کور

شماره 8۔ اکتوبر، نومبر، دسمبر 1994ء

- 53- ادھے پیر دی شربنی الیاس گھمن
- 54- تئیں وی روپے ہسان لکیاں نسرن بھٹی
- 55- کچیان پروفیسر راجیر کور
- 56- کوکدی لاش (سندھی کہانی) لیلیٰ پروین سومرو
- ترجمہ: سعدیہ الیاس

### افسانے

#### لکھاری

#### عنوان

#### نمبر شمار

شماره 1۔ جنوری، فروری، مارچ 1991ء

- 57- مرنا شرط اے زاہد ہما
- 58- بے قدری زاہد ہما
- 59- سونے دیاں مہراں دیوندر منڈ

### انٹرویوز

شماره 2۔ اپریل، مئی، جون 1991ء

- 60- کھٹے ددھوں جی ابا نیل۔ منجیت کورٹوانا اقبال قیصر
- 61- منجیت سنگھ رتو نال گل بات اقبال قیصر، عباد نیل شاد لکھتی روپ: ظفر اقبال ظفر

یاداں

شماره 7- جنوری، فروری، مارچ 1994ء

سبط الحسن ضیغم

-62 بزدل

تبصرے

شماره 1- جنوری، فروری، مارچ 1991ء

نور احمد نور لالیکا  
تبصرہ کار: توقیر چغتائی

-63 راہی تھل دی

شماره 8- اکتوبر، نومبر، دسمبر 1994ء

ڈاکٹر محمد یونس بٹ  
تبصرہ کار: عباد نبیل شاد

-64 تو تو میں میں

خط پتر

شماره 1- جنوری، فروری، مارچ 1991ء

-65 عبدالغفور قریشی

-66 آغا اشرف

-67 فرخندہ لودھی

-68 راشد جاوید احمد

حصہ نظمنعتشاعر داناںپہلا مصرعہنمبر شمار

شماره 2- اپریل، مئی، جون 1991ء

-69 تیری ذات چ صفتاں انج نہیں جیوں اسمان تے تارے نیں ظفر اقبال ظفر

- شماره 3- جولائی، اگست، ستمبر 1991ء
- 70- بلائیں جے مدینے سناواں تینوں حال یا رسول اللہؐ اکرم مشتاق چودھری
- شماره 4-5- اکتوبر 91ء توں مارچ- 1992ء
- 71- اک لکھ تے کئی ہزار وچوں خالق دا خاص پیارا اے محمد افتخار الحسن کوکب
- شماره 5- جولائی، اگست، ستمبر 1992ء
- 72- میرے آقا تیرے ناں اے سب کہانی، ہجواں دی عباد نبیل شاد
- نظم

- شماره 1- جنوری، فروری، مارچ 1991ء
- 73- کافی رفاقت حسین ممتاز
- 74- سچ نی جندے رفاقت حسین ممتاز
- 75- اک نظم رفاقت حسین ممتاز
- 76- بکرا عید عمیر ابو ذری
- 77- فیر میں ویہندا ابوالاعجاز صدیقی
- 78- انھا گستا صابر ظفر
- 79- پردیسی متین جعفری
- 80- آمر شفیع بلوچ
- 81- عاشق لوک سودائی عباد نبیل شاد
- 82- ظلم دا بوٹا منظور نیازی
- 83- اک روپ حیاتی دا ممتاز بلوچ
- 84- اطلاع وقار حیدر
- 85- بھٹل جانا ای چنگا اے عظمت اللہ خاں
- 86- سچا ہن تے واپس آ اصغر علی ناز

شماره 2- اپریل، مئی، جون 1991ء

- 87- کافی شارب
- 88- کیہ دساں تے کیہ نہ دساں خلیل آتش
- 89- تصویراں وانگر رفاقت حسین ممتاز
- 90- ہڑھ دا پانی ممتاز بلوچ
- 91- مرچاں دے پتر شوکار بٹالوی
- 92- کوتا تے کمپیوٹر اجمیر روڈے
- 93- انسان تے موت ایثور چندر
- 94- میگھل رت شاہد جمعفری
- 95- کالی پتی گلزار انجم گلزار
- 96- شیطان تے کنجری اکرم مشتاق چودھری

شماره 3- جولائی، اگست، ستمبر 1991ء

- 97- میٹامورفاسس ستی کمار
- 98- نظم اظہر حسن نجفی
- 99- پیل پروفیسر تیج پیر کیسل
- 100- ٹھنڈا چلھا خلیل احمد
- 101- لکن میٹی روینہ ناز
- 102- رکھیں میں مسکین دی لج مولا جے-ایم-عاصی
- 103- پرچھاویں ظفر اقبال ظفر
- 104- 14- اگست، جشنِ آزادی راول راٹھ

شماره 4- اکتوبر 91ء توں مارچ- 1992ء

- 105- سانجھ خلیل آتش
- 106- میل شوکار بٹالوی
- 107- دا بوسنگلاں تھلے نعمت احمد



- 108- نہ اڑیا توں ملیا نہ کر  
اقبال قیصر
- 109- نچنی چندے وارو وار  
ڈاکٹر اشرف زاہد
- 110- میرے روپ  
حمید اختر قاضی
- 111- مٹیاں روپ وٹایا  
محمد رؤف عابد
- 112- پتھر ہوئی اکھ دا نوحہ  
رفاقت حسین ممتاز
- 113- میں کونج و چاری کیہ کردی  
وقار حیدر
- شمارہ 5- جولائی، اگست، ستمبر 1992ء
- 114- ہفتہ فراق  
محمد امین حزیں
- 115- انا دی موت  
مشتاق احمد
- 116- کنکاں دی خشبو  
کنور امتیاز
- 117- ایہ وی تے ہوسکدا اے  
محسن رفیع جواز
- 118- مکپوں پرانہہ اجاڑ  
محسن رفیع جواز
- 119- لوڑاں  
راول راٹھ
- شمارہ 6- اپریل، مئی، جون 1993ء
- 120- گیت میرے  
اقبال قیصر
- 121- کم دی گل  
شوکت علی قمر
- 122- مزدور  
شوکت علی قمر
- 123- ضد  
امتیاز حسین امتیاز
- 124- مسافر ترکھا ہو  
امتیاز حسین امتیاز
- 125- وے جوگی تینوں جوگی جاناں  
شاہد جعفری
- شمارہ 7- جنوری، فروری، مارچ 1994ء
- 126- دیوالی گریننگ  
منجیت کورٹوانا
- 127- شکرا  
شوکار بٹالوی
- 128- چڑیاں موت گواراں ہاسا  
رفاقت حسین ممتاز

- 129- پنجمن ملائسس دے ناں اقبال قیصر
- 130- چپ نہ رہو (جرمن نظم) مارٹن ٹیونکر
- 131- ویلے دی منگ یعقوب پرواز
- 132- ردی دی ٹوکری یعقوب پرواز
- 133- گانی امرجیت کونکے
- 134- کوکاں سُن بے دردا راول راٹھ
- 135- ڈائل ٹون ظفر اقبال ظفر
- شماره 8- اکتوبر، نومبر، دسمبر 1994ء
- 136- لونا شوکار بٹالوی
- 137- تینوں کافر کافر آکھدے خلیل آتش
- 138- گیت افتخار وارث
- 139- بولیاں محمود ارشد

## غزلاں

- نمبر شمار پہلا مصرعہ
- شماره 1- جنوری، فروری، مارچ 1991ء
- 140- ستاروں سے آگے جہان اور بھی ہیں (علامہ اقبال) اسیر عابد (پنجابی ترجمہ)
- 141- یقین پختہ اساس رکھناں منظور وزیر آبادی
- 142- ہنجو آں نوں لکھ روکاں، پانی ٹھلاں بیسن قدرت
- 143- پیڑ بجر دی جردے رہے آں حاجی محمد شاہ ساجد
- 144- اڈوا پھریں غبارے وانگ یعقوب پرواز
- 145- کسے دی کیہ خطا اے اخلاق حیدر آبادی
- 146- بے معنی جے حرفاں وانگوں انور اداس

- 147- تینوں شرف کمال فی مائے سوز عباس
- 148- یاداں وچ رہیاں نیں اکھیاں اعجاز عادل
- 149- ہویاں چھڈ ہُن کچھلیاں گلاں، میں وی سوچاں توں وی سوچ رفیق آذر
- 150- پاپی بن نہ کپے لوکی ندیم وقار شاکی
- 151- تیرے شہر دی ہر اک چیز زالی اے صابر علی جاذب
- شمارہ 2- اپریل، مئی، جون 1991ء
- 152- نہر کنارے بوٹا سی جاوید ملک
- شمارہ 4- اکتوبر 91ء توں مارچ 1992ء
- 153- ہسنا سی نہ رونا سی وقار حیدر
- 154- بیڑی پھسی وچ گردا بے میں کاہنوں گھبراواں خاور راجا
- 155- لفظاں چوں تاثیراں گنیاں ارشد جبریل
- 156- سچائی دی ایس لئی گل ہوندی نہیں ارشد جبریل
- 157- نفرتاں خود غرضیاں تے خوف پلے رہ گئے ارشد جبریل
- 158- بے کراپنیاں خاہشاں نوں کچھ جھڑکیا جھڑکیا ہوندا ارشد جبریل
- 159- جیہڑے اثر قبول نہیں کردے انسانی تفریقاں دا ارشد جبریل
- شمارہ 5- جولائی، اگست، ستمبر 1992ء
- 160- موتی سپ دی نکلے رہ گئے نیں، غزل کہہ گئے نیں خلیل آتش
- 161- اسیں زمانے دی ہر شے تے حق جتالیندے منظور وزیر آبادی
- 162- تیری نگری سچ کیہ حادثہ ہو گیا اسلم ثاقب
- 163- ایڈی کیہ مجبوری نی سعید انور
- 164- رکن من ورھدیاں کنیاں ویکھاں روبینہ ناز
- 165- کیلے مڈھ کریروے عتیق الرحمان جلالی
- 166- اپنی منزل نہ کوئی ڈیرا دسد اے حسن عاجز
- 167- اکٹھے رہن دی دنیا تے اسیں اک مثال بناواں گے قربان علی ناصر

- 168- نفرتاں والیاں تیز ہواواں آگیاں  
نیازا احمد عازم
- شمارہ 6- اپریل، مئی، جون 1993ء
- 169- ٹٹے سانجھ تے بڑا سواد آندائے  
خلیل آتش
- 170- کلمہ پڑھدا پڑھدا آذر بن جاواں  
رفاقت حسین ممتاز
- 171- دُکھ سے داسہن دیوجی  
اسلم ثاقب
- 172- ویلے دی نہ اکھ چُجھا، پچھتاویں گا  
نذر حسین جانی
- 173- پھڑکی پینیاں یاداں مگروں لہندیاں نہیں  
امجد علی امجد
- 174- عشق دے کھڑکن ٹل داتا  
وقار حیدر
- 175- سُنک گئے پھل کتاباں چوں  
عتیق الرحمان جلالی
- شمارہ 7- جنوری، فروری، مارچ 1994ء
- 176- جہڑاویہر کھلوتا سی جگ اگے  
تجل کلیم
- 177- امبرول نوں چہماں تے سُنک جاواں  
تجل کلیم
- 178- اکھ کھولی تے دُکھاں دے جال دیکھے  
تجل کلیم
- 179- پتھر پاڑنگا ہواں لہندا پھرناواں  
تجل کلیم
- 180- ہتھیں یاداں دے شہر اُجاڑ دتے  
تجل کلیم
- 181- اگ یاداں دی ٹھار کے رویا  
تجل کلیم
- 182- اک مجبور گواچ گیا اے  
خلیل آتش
- 183- کس مشکل وچ تیرے پچھے جان فدا نہیں کیتی  
عبدالغفور سائیں
- 184- باہروں لوکی نوں نروے ہوندے نیں  
منظور نیازی
- 185- کاہدے رشتے، کاہدیاں سانجھاں رہ گئیاں  
انور اداس
- 186- جس بھیت نوں لکوندے رہے ہارواں گمراں  
ٹھا کر بھارتی
- 187- پھٹ دل دے کھڑپے آئیاں بہاراں دیکھ کے  
ذوالفقار شاہد
- 188- رنگ عنابی اکھاں دے  
عباد نبیل شاد

شماره 8- اکتوبر، نومبر، دسمبر 1994ء

- 189- میرے نالوں تیرے پیڑسوائی نہیں  
منظور نیازی
- 190- نیں رت بھنے ہنجواں والی مکھ تے وگدی رہندی اے
- 191- صدیاں لنگھی جان کھرل تے بلھے جم دے نہیں  
مشاق قمر
- 192- کیلتی عنایت اوس نے لکھ وار فیروی  
ارشاد جبریل
- 193- یاداں دین دعاواں مینوں سوچاں کرن جوان  
ظفر اقبال ظفر
- 194- ساڈے تے جو واپردی اے کیہ آکھاں  
یعقوب پرواز
- 195- کون تیرے نال دا  
خاور راجا
- 196- بھاویں جگ نوں وٹ لگے  
وقار حیدر
- 197- مشکلاں وچ زندگی نوں پالیا  
اصغر علی ناز
- 198- میں ساں کون تے کیہ سی ناں میرا  
فوزیہ انجم قصوری

## اشاریہ مصنف (Author Index)

35, 21, 19, 5- نثر:	امجد علی شاکر:	آ	
133- نظم:	امر جیت کونکے:	66- نثر:	آغا اشرف:
18- نظم:	امیر حمزہ ورک:	الف	
185, 146- نظم:	انور اداس:	77- نظم:	ابوالعجاز صدیقی:
93- نظم:	ایثار چندر:	92- نظم:	اجمیر روڈے:
17- نظم:	ایم حسین ظفر:	28- نثر:	احسان الہی ناوک:
ب		38,25- نثر:	احمد شہباز خاور:
52, 42, 29- نثر:	بخت کور:	15- نثر:	اختر حسین سندھو:
ت		145- نظم:	اخلاق حیدر آبادی:
41- نظم:	تبسم ملک:	نظم- 157, 156, 155:	ارشاد جبریل:
178, 177, 176- نظم:	تجمل کلیم:	159, 158	
181, 180, 179		171, 162- نظم:	اسلم ثاقب:
99- نظم:	تیج پیر کیسل:	109- نظم:	اشرف زاہد:
ٹ		86- نظم:	اصغر علی ناز:
186- نظم:	ٹھا کر بھارتی:	98- نظم:	اظہر حسن نجمی:
ج		148- نظم:	اعجاز عادل:
46- نثر:	جاوید اقبال قادری:	138- نظم:	افتخار وارث:
152- نظم:	جاوید ملک:	32- نثر:	اقبال ارپن:
102- نظم:	جے- ایم عاصی:	108,61, 60, 22- نثر:	اقبال قیصر:
ح		129, 120	
143- نظم:	حاجی محمد شاہ ساجد:	96, 70- نظم:	اکرم مشتاق چودھری:
166- نظم:	حسن عاجز:	53, 13- نثر:	الیاس گکمن:
110- نظم، نثر 11:	حمید ناصر:	124, 123- نظم:	انتیاز حسین انتیاز:
		173- نظم:	امجد علی امجد:

سعید انور: نظم - 163	<u>خ</u>	خاور راجا: نظم - 154
سوز عباس: نظم - 147		خلیل احمد: نظم - 100
<u>ش</u>		
شارب: نظم - 87		
شاہد جعفری: نظم - 125, 94	نثر - 12، نظم - 88، 105	خلیل آتش
شبیر حسین: نثر - 50		182, 169, 160, 137
شفقت تویر مرزا: نثر - 9	<u>د</u>	
شفقت حسین قاضی، ڈاکٹر: نظم - 39, 34, 27	دیدار سنگھ: نثر - 44	
51, 45	دیوندر ستھیارتھی: نثر - 10	
شفیع بلوچ: نظم - 80	دیوندر منڈ: نثر - 59	
شوکت علی قمر: نظم - 122, 121	<u>ذ</u>	
شوکار بٹالوی: نظم - 136, 127, 106, 91	ذوالفقار شاہد: نظم - 187	
<u>ص</u>	<u>ر</u>	
صابر ظفر: نظم - 78	راجیبر کور، پروفیسر: نثر - 55	
صابر علی جازب: نظم - 151	راشد جاوید احمد: نثر - 68	
صدیق بابر: نثر - 1	راول راٹھ: نظم - 134, 119, 104	
ظفر اقبال ظفر: نثر - 61	نثر - 24	
ظفر جمال: نظم - 135, 103, 69	رفاقت حسین ممتاز: نظم - 89, 75, 74, 73	
عبدالغفور سائیں: نظم - 183	170, 128, 112	
عبدالغفور قریشی: نثر - 65	رفیق آذر: نظم - 149	
عبیر ابو ذری: نظم - 76	روبینہ ناز: نظم - 164, 101	
عتیق الرحمان جلالی: نظم - 175, 165	<u>ز</u>	
عصمت اللہ زاہد، ڈاکٹر: نثر - 20	زاہد ہما: نثر - 58, 57	
	<u>س</u>	
	سبط الحسن ضیغم: نثر - 62, 8	
	ستی کمار: نظم - 97	

- عظمت اللہ خاں عظمت: نظم - 85
- غ
- غلام شبیر رانا: نثر - 49
- غلام مصطفیٰ بسمل: نثر - 31
- غلام مصطفیٰ کھوکھر: نثر - 16
- ف
- فرخندہ لودھی: نثر - 47, 67
- فردوس حیدر: نثر - 26
- ق
- قربان علی ناصر: نظم - 167
- ک
- کلیر سنگھ کانگ: نثر - 30
- کلونگ سنگھ ورک: نثر - 48
- کنورا امتیاز: نظم - 116
- گردیال سنگھ پھل، ڈاکٹر: نثر - 3
- گلزار انجم گلزار: نظم - 95
- ل
- لیلیٰ پروین سومرو: نثر - 56
- م
- مارٹن ٹیمونکر، سر: نظم - 130
- متین جعفری: نظم - 79
- محسن رفیع جواز: نظم - 117, 118
- محمد آصف خاں: نثر - 7
- محمد افتخار الحسن کوکب: نظم - 71
- محمد امین حزیں: نظم - 114
- محمد رؤف عابد: نظم - 111
- محمد ریاض شاہد: نثر - 14
- محمود ارشد: نظم - 139
- مسعود اقبال ساجد: نثر - 4
- مشتاق احمد: نظم - 115
- منظہر ترمذی: نثر - 2
- ممتاز بلوچ: نظم - 83, 90
- منجیت سنگھ رتو: نثر - 37
- منجیت کورٹوانا: نظم - 126
- منشایاد: نثر - 36
- منظور نیازی: نظم - 82, 184
- منظور وزیر آبادی: نظم - 141, 161
- مہیب سنگھ: نثر - 43
- ن
- ناصر رانا: نثر - 33
- ندیم وقار شاکی: نظم - 150
- نذر حسین جانی: نظم - 172
- نسرین بھٹی: نثر - 54
- نعت احمد: نظم - 107, نثر - 23
- نیاز احمد عازم: نظم - 168
- و
- وقار حیدر، سید: نظم - 84, 113, 153, 174
- ی/ے
- یلیں قدرت، سید: نظم - 142
- یعقوب پرواز: نظم - 131, 132, 144





Khoj  
Research Journal Deptt. of Punjabi  
Language & Literature  
Vol:31, Jul.-Dec. 2008, pp 85-98

کھوج  
تحقیقی مجلہ شعبہ پنجابی زبان و ادب  
جلد 31، جولائی دسمبر 2008ء شماره نمبر 1

## شائستہ حبیب..... حیاتی تے فن

☆ شاپہن کرامت

### Abstract

This comprehensive article is written by Shaheen Karamat. She has discussed different phases of the famous Punjabi authoress Shaista Habib's life and work in detail. The article comprised of the family life, professional achievements and the most important events from Shaista's life. In the end of the article, position of the authoress in Punjabi literature is being discussed through extracts from her poetic works. Besides, the views of popular cotemporary writers are also being made the part of this article.

شائستہ حبیب 18 نومبر 1948ء نوں لاہور وچ پیدا ہوئیاں۔<sup>(1)\*</sup> اوہناں دے والد حبیب کیفوی (مرحوم) جیہڑے ذات دے راجپوت سن۔ 1947ء وچ جموں کشمیر توں ہجرت کر کے سیالکوٹ آئے۔ اوہ اوہ اعلیٰ سیاسی عہدے تے فائز سن<sup>(2)</sup> اتے لکھاری، شاعر، ودوان دے طور تے جانے جاندے سن۔ پاکستان رائٹر گلڈ پنجاب دے آفس سیکرٹری وی رہے۔<sup>(3)</sup> ”کشمیر میں اردو“ تے ”آتش چنار“ اوہناں دیاں کتاباں نیں۔ اوہ آپ تے زیادہ تر لاہور ای

☆ لیکچرار پنجابی، گورنمنٹ کالج برائے خواتین سمن آباد، لاہور

رہندے پر لاہور وچ مستقل رہائش نہ ہون پاروں اوہناں اپنے بچیاں نوں سیالکوٹ ای رکھیا۔<sup>(4)</sup>

شائستہ حبیب 9 بھین بھرا سن۔ شائستہ نے بی اے تیکر سیالکوٹ توں ای تعلیم حاصل کیتی فیر ایم اے کرن لئی پنجاب یونیورسٹی اوری اینٹل کالج لاہور داخل ہوگئیاں۔ جتھوں اوہناں 1967ء وچ ایم اے اردو دا امتحان پاس کیتا۔<sup>(5)</sup>

شائستہ دے بھرا عثمان احمد نے سانوں دسیا کہ اوہدی پیدائش دے نال ای ساڈی ماں ایس جہانوں ٹرگئی تے ایس دُکھ نے شائستہ نوں ساری عمر ای ٹھی رکھیا۔ اوہ سمجھدیاں سن کہ میرا جنم ساڈی ماں لئی خورے منحوس سی۔ اوہ اپنا جنم دیہاڑوی کدی نہیں سی مناؤندی۔<sup>(6)</sup>

ایہدے وچ کوئی شک نہیں کہ بعض ویلے اجیہا کوئی دُکھ بندے دے اندر کوئی اجہی کسک پیدا کر دیندا اے کہ فیر اوہدے آل دوالے ای اوہدی ساری شخصیت دا تانا بانا بنیا جاندا اے۔ جس پاروں اوہ بندہ حیاتی بارے عملی تے حقیقت پسند سوچ دا مالک ہو جاندا اے اک خاص سنجیدگی اوہدی شخصیت دا بھرواں روپ بن جاندی اے۔ شائستہ نال وی خورے کوئی اجیہا ای معاملہ سی۔

عثمان احمد ہوراں شائستہ بارے گل کردیاں آکھیا کہ اوہنوں فضول گلاں کرنیاں پسند نہیں سی، ضرورت مند دے کم آؤنا، دو جیاں دا احساس کرنا، ہر گل نوں سمجھنا اوس دے وصف سن۔ اوہدیاں اجیہیاں عاداتاں پاروں ای مینوں اوس نال بہت محبت سی۔<sup>(7)</sup> ریڈیو پاکستان وچ بطور براڈ کاسٹر نوکری کیتی تے 23 ورھے ایسے شعبے نال وابستہ رہیاں تے ڈپٹی کنٹرولر کنٹریٹ افیئر دے منصب تائیں اپڑیاں۔<sup>(8)</sup>

شائستہ حبیب دا ویاہ فخر زمان نال ہویا۔ جیہڑے پاکستان پیپلز پارٹی دے سینیٹر، وزیر، چیئر مین اکادمی ادبیات پاکستان، نیشنل کمیشن آف ہسٹری اینڈ کلچر تے یونیسکو دی ثقافتی کمیٹی دے چیئر مین رہے۔ اج کل عالمی پنجابی کانگریس دے چیئر مین توں دکھ اکادمی ادبیات پاکستان دے چیئر مین (دوجی وار) نیں تے کئی بین الاقوامی پنجابی کانفرنساں منعقد کروا چکے نیں۔<sup>(9)</sup>

شائستہ حبیب دی حساسیت اردو تے پنجابی شاعری دے روپ وچ سامنے آئی۔ ”سورج پر دستک“ اردو شعری مجموعہ 1980ء دی دہائی وچ چھپیا جیہدی مکھ وکھالی تقریب دی

صدارت فیض احمد فیض ہوراں کیتی۔ ایسے کتاب دادو جا ایڈیشن 1995ء وچ چھپیا۔ پنجابی شاعری دا مجموعہ ”میں، کپاہ تے چاننی“ دے ناں نال ستمبر 2002ء وچ شائع ہويا۔ اوہناں دی ایہہ کتاب بھارتی پنجاب وچ گورکھی لپی وچ وی چھپی تے پنجابی یونیورسٹی پٹیالہ وچ ایم۔ اے وچ پڑھائی جاندی اے۔<sup>(10)</sup> ایہہ کتاب اوہناں نے اپنے پتر فرخ زمان دے ناں کیتی۔ جیہدے نال شائستہ نوں انتاں دی محبت سی، اوہ 19 مارچ 1982ء وچ پیدا ہويا تے اوہدی ماں (شائستہ) اپنی زندگی وچ اپنے پتر دیاں خوشیاں ویکھنا چاہندیاں سن پر ایہہ سدھر، سدھراں رہی حقیقت دا روپ نہ دھار سکی۔<sup>(11)</sup> شائستہ، فیض احمد فیض، منیر نیازی، امرتا پریتم تے شریف کجاہی ہوراں توں متاثر سن<sup>(12)</sup> تے اوہناں بڑے تھوڑے عرصے وچ ای اک شاعرہ تے لکھاری دے طور تے اپنا آپ منوا لیا۔ علمی ادبی حلقیاں وچ اپنی پچھان بنائی اوہ اک چنگی انسان بہترین دوست تے درد مند دل رکھن والی خاتون سی۔ انسانیت نال پیار کرن والی ایہہ خاتون غدوداں دے کینسر نال 10 جون 2004ء وچ اللہ نوں پیاری ہوئی۔<sup>(13)</sup> انج اردو تے پنجابی شاعری اک چنگی شاعرہ توں محروم ہوگئی۔ اوہناں دے اخیر لے ویلے بارے فخر زمان نے دسیا کہ:

”جدوں شائستہ نے آخری سفر دی تیاری کیتی ہوئی سی۔ اوس ویلے میں بھارتی وفد دے نال ورلڈ پنجابی کانفرنس وچ رلت لئی چندی گڑھ گیا ہويا ساں۔ میرے آن تیکر ساہ سانجھ سانجھ رکھے سن شائستہ نے۔ میں پاکستان پریتا تے شائستہ دے شعری مجموعے ”میں، کپاہ تے چاننی“ دا گورکھی ایڈیشن میرے ہتھ وچ سی پر اوس ویلے شائستہ کوئے وچ جا چکی سی۔ میں اوہناں دی گردن اُچی کر کے اوس نوں اوہ ایڈیشن دکھان دی بڑی کوشش کیتی پر اوہ ایہہ ویکھیوں بغیر ہی ایہہ دُنیا چھڈ گئی۔ (فخر زمان ایہہ سارا کجھ کہندے بڑے جذباتی ہو گئے)،<sup>(14)</sup>

شائستہ حبیب دے ٹر جان پچھوں اوہدے سنکیاں، ساتھیاں تے علمی ادبی حلقیاں نے اوس نوں رل کے یاد کیتا۔ اوہنوں خراج محبت دان کیتا جیہناں وچ چند اک دی رائے کجھ انج سی۔ پنجابی زبان دی مشہور کہانی کارفرخندہ لودھی اوہناں بارے آکھیا:

”شائستہ حبیب میرے بہت نیڑے کدی نہیں رہی پر اچ اوہ ایس بے وفا

حیاتی نوں چھڈ چلی اے تے مینوں اپنے بہت ای لاگے نظر آ رہی اے۔  
 بھاویں اوہ میرے نالوں عمر وچ نکلی سی پر ذہن دی پختگی، خیالاں دے اظہار  
 تے اوہدی بزرگانہ کیفیت نے مینوں اک خاص کمپلیکس وچ مبتلا رکھیا۔ اج  
 دل کہندا اے کہ جدوں اوہ صاف ستھرے لہجے وچ استدلال دے نال گل  
 کتھ کردی تے میں کیہ ہر بندہ جیہڑا میرے ورگا مزاج رکھدا اے اپنی کم  
 مائیگی نوں محسوس کردا ہووے گا۔“ (15)

پنجابی شاعرہ بشریٰ اعجاز نے اپنے جذبیاں دا اظہار انج کیتا:

”شائستہ درویشانہ مزاج رکھن والی سادہ تے صاف دل انسان اپنے تے  
 اپنے خاوند دے نامور عہدیاں تے سٹیٹس نوں اپنے آپ تے کدی نہ طاری  
 کرن والی، خوبصورت نظماں، زندہ مصرعیاں تے باقی رہ جان والے کول  
 خیالاں دی شاعرہ ہمیش کہندی رہی ”محبت گرامر نہیں اے، محبت شاعری  
 اے پر قافیہ تے ردیف دی پابند نہیں، محبت بحر بے کراں اے لہر لہر بھوندی  
 اے تے زندگی دے قطرے قطرے وچ نچدی اے۔“ اوہ واقعی انج دی ای  
 سی۔“ (16)

بقول افضل توصیف:

”شائستہ نوں جانا سی تے اوہ چلی گئی۔ عوامی ذہن دی عورت سی۔ بڈھاپے  
 دی عیاشی یاں بدحالی اوہنوں گوارا نہیں سی پر اوہ تکلیف جیہڑی اوہنے کینسر  
 دے درد دی صورت وچ برداشت کیتی، فطرت دی ستم ظریفی اے ناں۔  
 آخر کیوں؟“ (17)

ستند رنگھ نور لکھدے میں:

”شائستہ حبیب دا پاکستان دی پنجابی شاعری وچ چرچا رہیا اے۔ خاص  
 کر کے نویں شاعری وچ پاکستان وچ دو قسم دی پنجابی شاعری اے۔ اک  
 شاعری پر نیرا نال بہت ڈونگھی طرح جڑی ہوئی اے، پر گیت کتا اوس دا  
 سچیت انداز اے۔ ایس دی شبلی وی ودھیری ٹھیٹھ اے۔ اوس چیتنا وچوں

ہی اوہ کچھ نواں تلاشدی اے دوجی شاعری پرپرک انداز نال ودھیری  
سبندھت اے، پر ایس وچ دی اک سبھیا چارک پچھان قائم رکھدی  
اے۔“ (18)

لہندے پنجاب دی اک لکھاری ڈاکٹر ونیتا نے شائستہ دی شاعری بارے آکھیا:  
”شائستہ حبیب دی کوتا دی بھاشا ٹھیٹھ پنجابی اتے ات سرل ہے۔ پروشیتتا  
ایس گل وچ ہے کہ اوہ ات سادا ہون دے باوجود اپنا سبندھ نویں کوتا تے  
بودھکتا نال وی رکھدی ہے۔ شائستہ حبیب دیاں نظماں کیول اکھری پرت  
تے نہیں وچر دیاں سگوں اوس دیاں سطرانوں جیوں جیوں پڑھو، وچارو، اوہ  
اک عورت دی غلامی توں رہائی نوں لے کے دلش دی غلامی تے آزادی  
دے مسئلیاں نوں چھوہندی عورت دیاں سمسیاواں تے ملک دیاں منکھ  
دیاں سمسیاواں تک لے جاندی اے۔ شائستہ حبیب دیاں بہتیاں کوتاواں  
عورت دی سنویدنا نوں بڑی شدت نال پرگٹاندیاں اوس دے اتیت ول  
جھات پواندیاں پچھلے سمیاں وچ رہاڑ شاہی ویلے توں عورت تے ہوندے  
ظلم تے اوس دے دجیلے ستھان ولوں چیتن اپنی داستان کہندیاں نیں پر  
اوس وچ بھاوک ہون دی بجائے چیتن ہوکے چانے راہاں دیاں دھارنی  
ہن۔“ (19)

بقول اخلاق عاطف:

”شائستہ حیاتی دے سوچ سمندر وچ ہزار وار ڈبی تے لکھ واری تری، حیاتی  
نوں سمجھن دی گیانی ہوئی تے سب کچھ جان گئی۔ تاہیوں بھرویں اعتماد نال  
کہندی سی ”میں نری مٹی نہیں، جیہدے اُپر ہر کوئی پیر رکھ کے ٹر جاوے“  
شائستہ نے جھوٹھ نہیں آکھیا سچ کہیا سی، بالکل سچ۔ نہ اوہ نری مٹی سی، نہ ای  
بھلکھے رنگا سراب، نہ اوہ جھوٹھا خواب سی تے نہ ہی کسے دیاں اُنگلاں دی  
ورلاں وچوں ذرا ذرا کردی ریت، اوہ تے انبردا تاراسی، اجیہا تارا جیہڑا  
انبروں ٹٹ کے وی دھرتی اُتے نہیں ڈگدا۔“ (20)

شائستہ حبیب ورگی جیون ساتھی دے چلے جان دے صدے نے فخر زمان نوں نڈھال  
 کردتا اے۔ شائستہ واسطے فخر زمان ہوراں جیہڑی نظم لکھی اے اوہ کجھ انج اے:  
 میں اوہنوں مُٹھی وچ سنبھال کے رکھن دا  
 پورا پورا جتن کیتا  
 پر اوہ میریاں اُنگلاں دیاں ویرلاں وچوں  
 پل پل، چھن چھن  
 ذرا ذرا کر دی رہی  
 تے اج میں ہنجو کیر دے  
 اپنے خالی ہتھاں نوں  
 پچھنا ہاں کہ  
 اوہ کیہ سی؟  
 سراب؟  
 خواب؟  
 خوشبو؟  
 کہ  
 ریت (21)

کجھ شخصیتاں اہیاں ہوندیاں نیں جیہڑیاں میل ملاقات دے بغیر وی ان مٹ یاداں  
 چھڈ جاندیاں نیں۔ پنجابی تے اُردو دی معروف شاعرہ شائستہ حبیب وی ایہناں شخصیتاں وچ  
 شامل نیں جیہناں دیاں یاداں دے نہ مٹن والے نقشے میرے ذہن وچ تروتازہ نیں۔<sup>(22)</sup>  
 شائستہ نے عوامی لیڈر بے نظیر بھٹو ہوراں دی جلا وطنی تے پنجابی وچ اک نظم لکھی،  
 فخر زمان ہوراں ایس دا انگریزی ترجمہ کر کے بے نظیر بھٹو ہوراں نوں بھجواياتے بے نظیر ہوراں نے  
 اس نظم نوں سراہندیاں آکھیا:

”شائستہ نے بڑی سوتی تے معیاری نظم لکھی اے۔ جیہنوں میں بڑی دلچسپی  
 دے نال پڑھیا، شائستہ نے ایک جلا وطن دی واردات نوں ایس سوہنے

انداز نال بیانیا اے جویں ایہہ واردات آپ اوہدے اُتے ای ورتی ہووے  
 ایہہ نظم مینوں شادی دی سا لگرہ والے دن ملی اے میں ایہوں شائستہ تے  
 فخر زمان ولوں شادی دے تھے دے طور تے قبول کرنی آں،<sup>(23)</sup>  
 جلا وطن دی اوہ نظم کجھ انج اے:

جلا وطن لئی گھر دے بُو ہے بند نہیں  
 میں دشمنان دے چھتراں دی چھتر چھاویں  
 اک وی ساہ لینا حرام سمجھدی ہاں  
 مینوں اپنے گھر دیاں گرم ساہواں واپس کر دے  
 دیکھ میں بے گھر بے چھت نامہربان گلایاں وچ بنا کے  
 پوشاک دے سیالاں دے پہلے دناں دی خوراک بن رہی آں  
 مینوں میرے گھر دیاں مہربان کندھاں واپس دے دیو  
 ذرا سوچو تے

میں تھا ڈا ہی اک حصہ ہاں مینوں میرے حصے دی زمین  
 صرف پیراں پٹھ رکھن لئی دیو  
 میرے پیر خلا وچ لمک لمک کے خزاں دے پتیاں وانگ  
 ڈگ رہے نہیں

میرے ناں دی مٹی دے دیو..... میں اوس دے اندر  
 گلاب کھڑے دیکھنا چاہنی آں  
 میں چاننی راتاں وچ اپنے گھر دے کورے گھڑے دا  
 ٹھنڈا پانی پینا چاہنی آں  
 پردیش توں اپنے دلہن تک جتے کنڈے میں  
 میں اوہناں نول چنڈی آئی ہاں

مینوں میرے حصے دے بانہواں دے ہار دے دیو<sup>(24)</sup>

شائستہ نے مرن توں پنج مہینے پہلوں یکم جنوری 2004ء نوں اپنی آخری نظم ”موسم سرما



کی پہلی بارش سے ایک سوال، لکھی۔ ایہہ اوہناں دی اخیر لکھت سی اتے مینوں ایہہ نظم فخر زمان  
ہوراں دتی۔ نظم ایس طرح اے:

دل کبھی بوند بوند پانی کو کب ترسا تھا؟  
یہی موسم تھے، یہی ارمان تھے، اور سردیوں کی بارشیں تھیں  
گرم کوٹ پہن کر جیبوں میں مونگ پھلی اور اخروٹ ڈال کر  
ہاتھوں میں درختوں سے توڑی ہوئی ٹہنیوں کو  
نہر کنارے اٹھیلیاں کرتی ہوا میں ہم چلے جاتے تھے  
ایک لمحہ کو بھی کسی خوف نے کبھی دل میں جگہ نہ لی تھی  
صرف ہم تھے، سردیوں کی بارشیں تھیں اور خوشی سے  
دکتے لوگوں کے چہرے  
مگر اس سال بارش کی جگہ، دیز دھند نے ہمارے سروں پر چادر تان لی  
اس دُھند کے اندر بہت اسرار تھے، نہ حل ہونے والے مسئلوں کو.....  
بہت جرم تھے پوشیدہ اور ظاہر  
ہم نے نہر کنارے جانا چھوڑ دیا، جیسے لوگوں نے محبت کرنا چھوڑ دیا.....  
اب دشمن کے ہاتھ ہمارے بیچارے لوگوں کو قتل کر دیتے ہیں  
کبھی مسجدوں میں، کبھی راستہ چلتے ہوئے کسی نہر کے کنارے  
اس نفرت کی دھند کے اس پار یہ کون لوگ ہیں  
جو ہمارے دلوں کو نشانہ بنا رہے ہیں  
ہمارے ارمانوں کو قتل کر رہے ہیں  
ہمیں انسانوں سے نفرت سکھا رہے ہیں  
کیا آنے والی صدی میں ہماری خوشحالی کی جگہ غلامی اور بربادی کی داستانیں  
لکھی جائیں گی  
کیا شہر لاہور سے لوگ کہیں اور جانا پسند کریں گے  
موسم سرما کی پہلی بارش سے آج میرا یہی سوال ہے

کیا یہ بارش ہمیں پھر سے سچائی اور بہار کا راستہ دکھائے گی  
 کیا ہم پھر سے امن بھرے شہر میں  
 جیسوں میں مونگ پھلی اور اتروٹ بھر کر  
 من موجی لہر سے چل پھر سکیں گے؟  
 خوشی مناسکیں گے نئے سال کی؟ (25)

شائستہ حبیب ہوراں نے اپنی کتاب ”میں، کپاہ تے چاننی“ وچ نثری نظماں شامل  
 کیتیاں نیں۔

جدید نظم دے ایس طرح دے اسلوب دے حوالے نال ڈاکٹر نوید شہزاد نے لکھی سی کہ:  
 ”نظموں کو فنی حوالے سے دیکھا جائے تو آپ کو کہیں ردھم ٹوٹتا اور کہیں جڑوتا  
 دکھائی دے گا اور کہیں نثر میں سے نظم کا وجود ابھرتا محسوس ہوگا۔“ (26)

کچھ ایسے طرح دی صورت حال شائستہ دیاں نظماں دے باطن وچ دکھالی دیندی  
 اے۔ اوہناں نے نکلے نکلے احساسات خواب تے خیال نظماں وچ ڈھالے۔ کئی نظماں اوہناں  
 دے اندر دی کتھا بیان کر دیاں نیں۔ جد کہ کنیاں نظماں اُتے سفر نامے دا جھولا پیندا اے۔ کچھ  
 مناظر اوہناں جیویں ویکھے او سے طرح لفظاں وچ بیان کر چھڈے پر کنیاں نظماں وچ اوہناں  
 باہر دے منظر اں دے نال تخیل دار لا کر کے نظم دیاں پرتاں نوں ڈھیر ڈوہنگا کر چھڈیا اے۔ ایہو  
 جہیاں نظماں پہلے مطالعے وچ قاری نوں پھڑائی نہیں دیندیاں۔ جیویں:

میں ساریاں لگیاں ویکھیاں ..... میں

اولف پالے نوں ویکھیا ..... جیہڑا ننھے بچے وانگ

اپنی دھرتی تے اپنی ازادی وچ پھر داسی

بغیر محافظاں دے اپنے ہمسفر نال محبت دی حفاظت وچ

اولف پالے ..... امن داروشن مینار ..... وچ

اک ہسدا کھیڈ دا خوش باش خاص ہوندیاں ہویاں وی عام جیہہ آگو

میں اوس دی خوش نصیبی تے رشک کردی سی

ہن اوہدی بد نصیبی تے حیران آں  
 میں سٹاک ہوم دیاں ساریاں گلایاں دیکھیاں  
 محبت دے امن نال بھر پور..... میں اوس گلی نوں نہیں دیکھیا  
 جتھے محبت تے امن وچ مست  
 اولف پالے نفرت دی گولی دا شکار ہویا (27)

### میں تے دھرتی ماں

میں گدھے وچ کلیاں کنج نچاں گی  
 کون میرے آل دوالے بانہواں دا گھیرا پائے گا  
 کیہڑی گڑھی میرے لئی بول کہوے گی  
 میریاں سہیلیاں کدوں میرے نال تھال کھیڈن گیاں  
 کیہڑی میرے نال گرمی وچ تندور تے روٹیاں لاوے گی  
 کون مینوں پینگھ ہمارے دیوے گا  
 تے میں کیہڑے کھو ہواں دا پانی پیواں گی  
 کیہڑا چاچا مینوں دھی رانی آکھے گا  
 تے کیہڑے ویر لئی میں سرتے روٹی چک کے کھیتاں ول جاواں گی  
 سارا پنڈ تے سنجھا ہو گیا وے  
 سارے منڈے دوہی ٹر گئے نہیں  
 ساریاں گڑیاں شہر وچ سینما دیکھن گئیاں نہیں  
 سارے پنڈ وچ میں اگلی ہاں  
 تے میری دھرتی ماں  
 تے دونوں ترنجن اڈیکدیاں ہاں (28)

شائستہ حبیب ہوراں نے نچلے طبقے دی نمائندگی کردیاں ہویاں نہ صرف منفی سماجی  
 قوتوں دے چہرے توں نقاب اتاریا اے سگولوں محروم تے مفلس لوکاں دے مڈھلے مسئلایاں نوں

اپنی شاعری دا خاص کر کے موضوع بنایا اے۔ جیویں:

دس مرلے تے پنج مرلے دے پلاناں دی سکیم اُتے  
زمین دی قیمت دی ادائیگی قسطاں وچ کرو

بھاویں

جان دی صورت وچ

ایمان دی صورت وچ

غربت دی صورت وچ

ادائیگی ضروری اے

پر جے تئیں زمیناں دی ایس وٹڈنوں

انساناں دے خلاف سکیم سمجھدے او

تے فیر ایس زمین توں وی ہتھ دھولوو

تے رہو اپنے خیالاں دے ہوادار مکاناں وچ

ہرے بھرے میداناں وچ (29)

کئی تھاواں تے اوہ اکلاپے نوں اپنیاں نظماں داسرناواں متھدی اے۔ اوہدا اظہار کجھ

ایس طرح اے:

اکلاپا اک سوہنا رنگ اے

اکلاپے دا کیہ رونا اے؟

کلم کلے سارے لوک

اپنے اکلاپے توں ڈر کے

اک دو جے نال کھلونڈے

کول وی پھوک پھوک بہندے نیں

پر فیر وی کلے رہندے نیں

اوہناں نوں بھاویں

اکلاپا اک موت اے پر

اوہ وقتوں پہلاں مرنا کیوں چاہوں گے

لوکاں وانگوں سی کلی

میرے دھیان دی لو اے کلی

پر ایس لو وچ رنگ ہزار

سوہنے جوڑے رنگے تار

اکلاپے دا کیہ رونا اے

اکلاپے توں کیہ ڈرنا اے

اکلاپا اک نویں حیاتی دا پرچھاواں

اکلاپا اک سوہنا رنگ

سرناواں اے

(30) میریاں نظماں دا

شائستہ حبیب زندگی نوں اپنے ساویں ویکھدی سی، لوکائی جیہناں چیزاں نوں ڈھپ  
 آلی عینک نال ویکھدی اے، اوہدے لئی شائستہ کول اندر دی اکھ سی۔ جیہڑی اوہدے لوں لوں  
 تے پتھر کے تکلدی سی ایہہ اکھ اوہدے اندر ایوں جاگی جس نوں کدی نیند نہیں آندی اتے ایس گل  
 نال وی ایس نوں کوئی فرق نہیں پیندا سی کہ چائن اے یاں نہیرا، اوہدا اپنا چائن ای نہیرے وچ  
 لگے چائن تے چائن وچ لگے نہیرے نوں ویکھ لیندا سی۔ ایسے لئی شائستہ حبیب دیاں نظماں ابہام  
 تے ابہام دیاں گوڑھیاں رنگاں وچ وی رنگیاں نیں تے چائن دی چاننی جھیاں کھنڈیاں وی۔  
 اوہدی شاعری وچ پاتالاں جہی گہرائی اے تے دُنیا دیاں پرت پرت منظرناں وچوں کجھ منظر وی،  
 جیہڑے سارے حساس دلاں نوں دکھ دی تار وچ پرو دیندے نیں تے اوہناں دے احساس دا  
 تونبا وچ کے اپنے آل دوال نوں ایس دی لے وچ شامل کر لیندا اے۔



## حوالے

- \* امین خیال ہوراں نے ”ناراں تلے دیاں تاراں“ وچ پیدائش دا مہینہ دسمبر تے تھاں جموں (مقبوضہ کشمیر) لکھی اے۔
- 1- گل بات: عثمان احمد (بھرا شائستہ حبیب) 18 فروری 2006ء
- 2- ایضاً
- 3- ایضاً
- 4- ایضاً
- 5- ایضاً
- 6- ایضاً
- 7- ایضاً
- 8- ایضاً
- 9- گل بات: فخر زمان (خاوند شائستہ حبیب) 19 فروری 2006ء
- 10- ایضاً
- 11- ایضاً
- 12- ایضاً
- 13- ایضاً
- 14- ایضاً
- 15- کتاب لڑی ”کونج“ (شائستہ حبیب نمبر) تبصرہ نگار فرخندہ لودھی ص 6,7
- 16- کتاب لڑی کونج ”کونج“ (شائستہ حبیب نمبر) بشری اعجاز، ص 8,9
- 17- کتاب لڑی ”کونج“ (شائستہ حبیب نمبر) افضل توصیف، ص 10,11
- 18- کتاب لڑی ”کونج“ (شائستہ حبیب نمبر) ستندر سنگھ نور، ص 20 تا 22
- 19- کتاب لڑی ”کونج“ (شائستہ حبیب نمبر) ڈاکٹر نیتا، ص 23,24 - 25

- 20 کتاب لڑی ”کونج“ (شائستہ حبیب نمبر) اخلاق عاطف، ص 15
- 21 فخر زمان: توں کہ میں؛ کلاسیک 42 دی مال لاہور جنوری 2005ء ص 3
- 22 کتاب لڑی ”کونج“ (شائستہ حبیب نمبر) سعید آسی، ص 13
- 23 گل بات: فخر زمان (خاوند شائستہ) بتاریخ 15 جنوری 2007ء
- 24 شائستہ حبیب: میں کپاہ تے چاننی؛ پنجابی مرکز لاہور ستمبر 2002ء، ص 77,78
- 25 گل بات: فخر زمان تے شائستہ حبیب دا ہتھ لکھتی نمونہ (مملو کہ فخر زمان)
- 26 ڈاکٹر نوید شہزاد: تزلوک؛ مقصود پبلشرز لاہور 2004ء ص 110
- 27 میں کپاہ تے چاننی ص 62,63
- 28 شریف کنجاہی: پنجابی شاعری سے انتخاب؛ اکادمی ادبیات اسلام آباد 1983ء، ص 374
- 29 میں کپاہ تے چاننی ص 35
- 30 ایضاً ص 103-104



Khoj  
Research Journal Deptt. of Punjabi  
Language & Literature  
Vol:31, Jul.-Dec. 2008, pp 99-118

کھوج  
تحقیقی مجلہ شعبہ پنجابی زبان و ادب  
جلد 31، جولائی دسمبر 2008ء شماره نمبر 1

## مولانا محمد اشرف اصغرؒ

☆ زبیر احمد قاضی

### Abstract

This research article is composed by Qazi Zubair. In this article, he has discussed the "Sufiana Hayati" of Punjab with the reference of Maulana Mohammad Ashraf Asghar Sahib (1890 to 1979). Then, he has given information about Maulana's personality, primary education, Hifz-e-Quran, Bait-o-Khilafat, contacts with contemporary figures, 'Fatawa-naveesi' and decisions of cases, Preaching and spreading Islam, and his poetry etc. In the end of the article, subjective study of Maulana's poetry is being given which includes extracts from his poetry according to the subject.

برصغیر پاک و ہند وچ اسلام دی روشنی تے تبلیغ صوفیائے کرام دے وسیلے نال پہنچی۔  
جیہناں نے اپنے عمل تے حسن سلوک نال لوکاں دے دلاں وچ اسلام دی محبت پیدا کیتی۔ اسلام  
دی تبلیغ داکم برصغیر وچ حضرت عمرؓ دے دور وچ ای شروع ہو گیا سی۔ سارے فاتحین نال مصلحین  
تے مبلغین وی آؤندے رہے۔

☆ اسٹنٹ پروفیسر، گورنمنٹ کالج افضل پور، میرپور آزاد کشمیر



صوفیائے کرام نے مقامی لوکاں نوں اوہناں دی مقامی زبان وچ درس دتاتے اوس ویلے دے مطابق شاعری نوں اوہناں دی اصلاح تے تعلیم و تربیت واسطے بطور ہتھیار استعمال کیتا۔ اج وی بابا فرید ہونوں یا سلطان باہو سارے صوفیائے کرام دی شاعری وچ انسانیت دی اصلاح دا درس ملدا اے تے ایہناں ساریاں دا بنیادی مخاطب انسان ای اے۔ ایہہ کم سارے برصغیر وچ بڑی شد و مدناں جاری رہیا تے اج وی اس دا گہرا رنگ لوکاں دی زندگی نوں متاثر کردا نظر آؤندا اے۔

برصغیر دے باقی علاقیاں وانگوں کشمیر وچ وی صوفیائے کرام دا قیام رہیا اے تے شاید ای کوئی شخصیت ہووے جیہناں ریاست جموں و کشمیر وچ قیام یاں ایس علاقے دا سفر نہ کیتا ہووے۔ وڈے وڈے صوفیائے کرام تے اولیائے کرام دے ناں کشمیر نال جڑے ہوئے نظر آؤندے نیں۔

پنجابی دے عظیم صوفی شاعر حضرت میاں محمد بخش<sup>۱</sup> دا تعلق وی ریاست جموں و کشمیر نال سی۔ آپ دی مثنوی سفر العشق المعروف قصہ سیف الملوک وچ مختلف شاعراں دا تذکرہ اے جیہناں وچ اک امام بخش وی نے جیہناں دا تعلق آزاد کشمیر دے ضلع کوٹلی دے علاقے بناہ نال سی:

میاں ہک امام بخش سی رہندا وچ بناہے<sup>(۱)</sup>

شعر اودھا وی وانگ صبو نے میل دلاں دی لاہے

میاں امام بخش ہوراں دی تخلیق قصہ شاہ بہرام اے تے اوہناں دا مزار بناہ دی وادی دے اک پنڈ ڈھیری صاحبزادیاں وچ اے۔<sup>(۲)</sup> ڈھیری صاحبزادیاں وچ ای اک ہور عظیم صوفی شاعر نے وی جنم لیا، جیہناں دے حالات زندگی تے کلام عام لوکاں تک نہیں پہنچ سکیا۔

### جان پچھان

محمد اشرف اصغر ہوراں دا جنم علاقہ بناہ دے پنڈ ڈھیری صاحبزادیاں وچ میاں حسن شاہ ہوراں دے گھر 1890ء وچ ہويا۔<sup>(۳)</sup>

میاں حسن شاہ ہوریں اک روحانی شخصیت سن تے آپ بابا علی لشکر دے خانوادے وچوں سن جیہناں دیاں کرامتاں دا ذکر اراج وی عام لوکاں دیاں زباناں اُتے ملدا اے۔ بابا علی

لشکر نال آپ دا تعلق انج اے: محمد اشرف ولد حسن شاہ ولد احمد شاہ ولد علی لشکر۔ علی لشکر دے والد محترم میاں غلام غوث ہوراں دا مزار حجرہ شریف علاقہ بناہ وچ چھبھا پیر دے نال مشہور اے۔ نسبی لحاظ نال آپ دا تعلق قریش دی شاخ بنو ہاشم نال اے۔ میاں حسن شاہ ہوراں دے مریدین دی کثیر تعداد اجداد وی ضلع میرپور تے ضلع کوٹلی وچ موجود اے۔

### ابتدائی تعلیم

محمد اشرف اصغر ہوراں نے اپنی ابتدائی تعلیم اپنے والد ماجد میاں حسن شاہ کولوں حاصل کیتی۔ عربی تے فارسی دی تعلیم خصوصی طور تے آپ دے والد ماجد نے دتی تے سکندر نامہ آپ نے بچپن وچ ای پڑھ لیا سی۔ آپ فرماندے سن کہ والد ماجد نے سانوں اپنی چھوٹی عمر وچ نماز دا پابند بنا دتا سی کہ اسیں مٹی دے لوٹے نہیں سی چک سکدے۔ ساڈے واسطے مٹی دے چھوٹے لوٹے بنوائے گئے۔<sup>(4)</sup>

تعلیم حاصل کرن دی اپنے والد ماجد دی وصیت دے مطابق آپ نے کجھ عرصہ موضع بھیال دے مشہور عالم دین مولوی فتح دین ہوراں کولوں تعلیم حاصل کیتی۔ گھر دے کول ہون دے سبب آپ تعلیم ول توجہ نہیں دے سکدے سن، تے گھرتوں دور جا کے علم دے حاصل کرن دا آپ نوں شوق وی سی۔ اپنی اس خواہش دی تکمیل واسطے آپ میرپور دے موضع کوٹ تندو خان وچ مولوی نظام دین ہوراں دی درسگاہ وچ داخل ہو گئے۔<sup>(5)</sup>

مولوی نظام دین ہوراں دے فرزند مفتی عبدالکریم دیوبندتوں فارغ التحصیل سن۔ آپ دی شاگردی وچ محمد اشرف اصغر ہوراں نے علمی منزلوں طے کیتیاں۔ مفتی عبدالکریم کجھ عرصہ لئی واپس دیوبند چلے گئے تے آپ نوں مولانا محمد ابراہیم سیاکھوی ہوراں دی نگرانی وچ چھڈ گئے، جیہڑے اک نیک خصلت متقی تے روحانی شخصیت سن۔ اک رات محمد اشرف اصغر اپنے استاد دے پیرد باندے پئے سن کہ استاد ہوریں سوں گئے، جدوں اکھ کھلی تے ویکھیا کہ شاگرد پیرد باندے پئے سن۔ ایہہ استاد دی دعا دا نتیجہ سی کہ سویرے کتاب پڑھن دی بجائے زبانی سنان دا حکم ہویا۔<sup>(6)</sup>

محمد اشرف اصغر ہوراں دا حافظہ کمال داسی۔ اک واری پڑھی ہوئی یاں سنی ہوئی چیز آپ

نوں زبانی یاد ہو جاندی سی۔ آپ نے مولانا عبداللہ سیاکھوی تے مولانا عبداللہ پگھلیوی ہوراں کولوں وی اکتساب علم کیتا۔

### حفظ قرآن

تخصیص علم توں بعد اپنے علاقے وچ واپس تشریف لیائے تے اپنے پنڈ دی مسجد دی تعمیر دا کم شروع کیتا۔ دوران تعمیر مستری نوں تلاوت قرآن پاک کردیاں سنیا تے دل وچ حفظ قرآن دا شوق پیدا ہويا۔ آپ نے قرآن پاک حفظ کر لیا تے اکثر سفر دے دوران تلاوت کردے رہندے سن۔ اکثر تہا سفر کرن دی کوشش کردے سن۔<sup>(7)</sup>

### بیعت و خلافت

1978 بکرمی وچ علاقہ میرپور تے راجوری وچ بارشاں نہ ہون دی وجہ نال شدید قحط پے گیا تے اناج غلے دی قلت پیدا ہوگئی۔<sup>(8)</sup> گجرات دے سفر دے دوران خواجہ سید ملک علی شاہ ہوراں نال شکر یلہ شریف ملاقات ہوئی۔ خواجہ صاحب جاہ و جلال تے حسن و جمال دے مالک سن۔ آپ دی تواضع تے حسن اخلاق توں متاثر ہو کے محمد اشرف اصغر ہوراں نے آپ دے ہتھ تے بیعت ہون دا ارادہ کر لیا۔ پیر صاحب نے آپ دی ظاہری شکل و صورت تے علمی حیثیت ویکھ کے نال مٹول توں کم لیا تے کسے اہل مرشد دی تلاش دا مشورہ دتا۔ فیر آپ دا اصرار ویکھ کے آپ نوں بیعت کر لیا۔ خواجہ سید ملک علی شاہ آپ دی دعوت تے ہر سال ڈھیری صاحبز دیاں تشریف لیاندے تے 15 جیٹھ نوں حضرت بابا لشکر علی دی خانقاہ تے عرس دی محفل وچ شرکت کردے سن۔<sup>(9)</sup> مولانا محمد اشرف اصغر نے اپنے مرشد دیاں کرامتاں دا ذکر اپنے کلام ”حیات قلندر“ وچ کیتا اے۔ آپ دی اپنے پیر خانے تے مرشد نال محبت دا ذکر آپ دیاں منظوم چٹھیاں وچ ملدا اے۔

### ہم عصر شخصیات نال رابطہ

آپ دا اپنے پیر و مرشد تے اساتذہ توں علاوہ اپنے زمانے دیاں علمی تے ادبی شخصیات نال مکمل رابطہ سی۔ دینی اجتماعات وچ باقاعدگی نال شرکت کردے سن۔ اپنے گھر وچ وی

دینی محفلاں دا انعقاد کردے سن، جتھے علمی شخصیات نوں بلاندے سن۔<sup>(10)</sup> مولوی قمر زمان کرنوٹ، مولوی رکن عالم چوکی موگ، مولوی فیض اللہ کوٹلی، مولوی محمد اسماعیل کوٹلی، پیر حاکم شاہ کوٹلی، مولوی عبداللہ لاڑوی، مفتی عبدالکلیم میر پور، مولوی حیات علی کلیم رٹ، مولانا محمد یوسف، مولوی مطیع اللہ براہنہ، مولوی نظام دین دھمال، راجہ محمد اکبر خان، شیخ عبدالعزیز علانی، ذیلدار امان اللہ خان، مقدم عبداللہ بٹ، سائیں حضوری تے میاں محمد بخش آپ دے ہم عصران تے قریبی دوستان وچ شامل سن۔ ایہناں ساریاں نال آپ دی خط و کتابت وی سی۔

### فتاویٰ نویسی تے مقدمات دے فیصلے

آپ وادی بناہ دے مستند عالم دین تے مرکز کھوئی رٹ دے خطیب سن۔ آپ کول بہت سارے مقدمات پیش ہوندے سن۔ آپ شرعی ضابطیاں دے مطابق چھان بین کردے تے کسے لالچ یا دباؤ توں بغیر غیر جانبداری نال عدل تے انصاف کردے سن۔ قرآن سنت تے اقوال صحابہ کرام توں استدلال دیندے سن۔ آپ دی تحریر انتہائی جامع تے مربوط ہوندی سی۔ آپ دے کیتے گئے فیصلیاں دا احترام کیتا جاندا سی۔ آپ شرعی احکامات دی روشنی وچ فتویٰ جاری کردے سن۔<sup>(11)</sup>

### تبلیغ اسلام تے اشاعت علم

1920ء وچ تحصیل علم توں بعد اپنے علاقے وچ تشریف لیائے تے تبلیغ تے تعلیمی سرگرمیاں دا آغاز کیتا۔ آپ نے جہالت دی تاریکی وچ علم دی شمع روشن کیتی۔ آپ نے اپنے پنڈ دی تعمیر نو کیتی تے اک درس تعمیر کیتا، جتھے نیڑے دور توں آکے لوکی علم دی پیاس بھاندے سن۔<sup>(12)</sup> اوہناں دے سارے قیام و طعام دا ذمہ محمد اشرف اصغر ہوراں دے ذمہ ہوندا سی۔ آپ نے تبلیغ تے اشاعت علم دا جہاد 27 سال تک بلا معاوضہ جاری رکھیا۔ آپ اک شفیق استاد تے معتبر علمی شخصیت سن۔ تحمل تے بردباری آپ دی طبیعت دا خاصہ سی۔ لوکاں دی حیثیت دے مطابق اوہناں نال گفتگو کردے سن۔ علاقہ بناہ وچ اکثر علمی تے ادبی خاندان آپ توں فیضیاب ہوندے سن۔

## شعر و شاعری

مولانا محمد اشرف اصغراک نابغہ روزگار شخصیت سن۔ آپ ظاہری تے باطنی علوم دے نال نال عربی، فارسی، اردو تے پنجابی زبانوں تے مکمل دسترس رکھدے سن تے اک قادر الکلام شاعر سن۔<sup>(13)</sup>

آپ بچپن توں ای شعر کہندے سن۔ آپ نے اپنی شاعری نوں تبلیغ دین تے اصلاح معاشرہ واسطے استعمال کیتا۔ قرآن و سنت تے دین دا گہرا مطالعہ ہون دی وجہ نال آپ دی شاعری تے ایہہ رنگ گہرا نظر آؤندا اے۔ علم الشعر توں واقف سن، صنائع و بدائع توں علاوہ بحر تے میزان توں واقف سن۔ اپنے طالب علماں نوں وی سمجھاندے تے پڑھاندے سن۔ آپ دی شاعری وچ عربی، فارسی لفظ تے ترکیباں دا استعمال عام اے۔ بعض اوقات مصرعیاں وچ قرآنی آیات تے احادیث مبارکہ دا ایس مہارت نال استعمال کیتا گیا اے کہ گل وزنی پر فیروہی ہلکی پھلکی لگدی اے۔ آپ عربی، فارسی، اردو، پنجابی تے پہاڑی زبانوں وچ شعر کہندے سن۔<sup>(14)</sup>

پروفیسر انوار حسین چشتی ہوراں نے آپ دا منظور کلام جس وچ حمد و مناجات، نعت، منقبت، سی حرفیاں، باراں ماہ، منظوم چٹھیاں تے سفر نامے شامل نیں، اک کتاب ”پنچلاں بھری چنگیر“ دے عنوان نال فروری 1999ء وچ ڈھیری صاحبزادیاں ضلع کوٹلی آزاد کشمیر توں شائع کیتا اے۔ ایس کتاب دے کل 176 صفحات نیں تے ایہداسائز "9.4"x7.4" اے۔

## شاعری دے موضوعات

### حمد و مناجات

آپ دی شاعری وچ مذہبی رنگ خصوصی طور تے نظر آؤندا اے۔ آپ نوں زیارت بیت اللہ شریف تے روضہ رسول اللہ ﷺ تے حاضری دا شرف وی حاصل سی۔ آپ نے پنجابی اردو تے فارسی زبانوں وچ حمد تے نعت لکھی اے۔ آپ دے کلام وچ سوز گداز اے۔ آپ نے اپنی عاجزی تے انکساری دا اظہار کردیاں ہویاں نبی پاک ﷺ دے وسیلے نال اُمت واسطے دُعا کیتی اے۔ نمونہ کلام:

تیرا نام رحمان رحیم سوہنا بے پرواہ ستار غفار اللہ  
 جاری بحر کرم دا لہر مارے فیض پاؤندا کل سنسار اللہ  
 تیریاں بخششاں وچ حساب ناہیں نالے نعمتاں بے شمار اللہ  
 تیرا حکم تدبیر تاثیر رکھے ساڈی کل تدبیر بے کار اللہ  
 اٹھنا بیٹھنا اسماں دے وس ناہیں نیکی بدی دا توں مختار اللہ  
 جیکر کریں نگاہ فناہ ہووے دشمن نفسی شیطان شرار اللہ  
 سدیں آپ بے موڑسی کون دوجا بھلاکس نوں ہے اختیار اللہ  
 کراں کیہ بدکاریاں پیش تیرے جیوں جیوں گزریا لیل ونہار اللہ  
 میں تھیں ودھ حساب کتاب جانے میرا کیہ اتھے انکار اللہ  
 دیکھیں بے کروت تے خاص دوزخ، ناہیں کچھنے حاجت دار اللہ  
 ہووے کرم دی بے نگاہ اصغر، کرے شوہ وچوں بیڑا پار اللہ<sup>(15)</sup>

میری التجا وچ درگاہ ایہو تیرے باجھ نہ کوئی درد خواہ ربّا  
 اکو فضل احسان دی آس مینوں کوئی ہور نہ اوٹ پناہ ربّا  
 تیرے علم اگے نہ کوئی چیز مخفی ناہیں حاجت انتہا ربّا  
 میرے دل دے راز توں آپ جانے طاہر کراں کی خواجواہ ربّا  
 تیرا حکم نافذ فی الفور ہوندا لگے دیر نہ گھڑی اک ساہ ربّا  
 قدرت وچ کمال ہر حال تینوں لا شریک تے نہ انتہا ربّا  
 دخت پیاں نوں تخت بٹھا دیویں تخت بیٹھیاں نوں سٹیں لاہ ربّا  
 چاہویں دیویں ایمان بہرام تائیں چاہویں کریں بہرام گمراہ ربّا  
 میں تھیں ودھ عاجز کوئی ہور ناہیں پُر تقصیر تے رو سیاہ ربّا  
 بے پر مسکین حقیر ہاں میں ہونیاں شینیاں سب سواہ ربّا  
 آکھے لگ کے نفس شیطان دے میں پیاراہ نوں چھوڑ گمراہ ربّا  
 اصغر فضل تے مہر دے نال پاویں او جڑ راہ تھیں مڑ راہ ربّا<sup>(16)</sup>

مولانا محمد اشرف اصغر ہوراں دے حمدیہ کلام وچ سانوں حضرت میاں بخشؒ دے حمدیہ کلام دا رنگ نظر آؤندا اے۔ محمد اشرف اصغر ہوراں کمال مہارت دا اظہار کردیاں ہویاں اللہ دی حمد و ثنا بیان کرن دے نال نال اپنی عاجزی، بے کسی تے انکساری دا اظہار وی کیتا اے تے کجھ تاریخی واقعات وی حمد راہیں بیان کردیاں ہویاں اللہ تعالیٰ دی قدرت تے مہربانی دا ذکر کیتا اے۔ آپ دے نعتیہ کلام وچ نبی کریم ﷺ نال عقیدت تے محبت دا اظہار تے آل بیت دی محبت نوں اپنی بخشش دا ذریعہ وی سمجھدے نیں۔ آپ نے نعت شریف بیان کردیاں ہویاں بڑے خوبصورت تے مناسب الفاظ دا استعمال کیتا اے کہ ایہہ ساری کائنات دی تخلیق ای نبی آخر الزمان حضرت محمد مصطفیٰ ﷺ دی خاطر ہوئی اے۔ نمونہ کلام:

میںوں اک بار قدماں وچ بلانا یا رسول اللہ  
 اوہ روضہ جنت عالی دکھانا یا رسول اللہ  
 ہے دل وچ سخت بے تابی اے بھی حسرت ہے باقی  
 خدا دے واسطے زیارت کرانا یا رسول اللہ  
 طفیل حسنین تے مائی فاطمہ میںوں چھڑانا یا رسول اللہ  
 سموم نار دوزخ تھیں بچانا یا رسول اللہ  
 ہے اُمت ہونے دا دعویٰ دلیل اس پر نہیں کوئی  
 صرف کلمہ ہے پڑھنا اور پڑھانا یا رسول اللہ  
 شفاعت گنہگاراں دی تُساں فرمایا میں کرنی  
 بڑا بدکار اصغر بخشوانا یا رسول اللہ (17)

.....

لوح قلم تے عرش منارے خاطر پاک محمدؐ دی  
 جنت حوراں خوش رخسارے خاطر پاک محمدؐ دی  
 زمین آسمان تے دیہنہ چن تارے خاطر پاک محمدؐ دی  
 نوری ناری خاکی سارے خاطر پاک محمدؐ دی  
 بحر سمندر لہراں مارے خاطر پاک محمدؐ دی

شبنم باراں ابر بہار خاطر پاک محمد دی  
ریگ پہاڑ تے لیل نہارے خاطر پاک محمد دی  
موت حیات تے حشر دیہاڑے خاطر پاک محمد دی  
غم خوشی سب نفع خسارے خاطر پاک محمد دی  
رعد کڑک بجلی لشکارے خاطر پاک محمد دی  
پل صراط میزان تلارے خاطر پاک محمد دی  
جیا جون ہے بے شمارے خاطر پاک محمد دی<sup>(18)</sup>

مولانا محمد اشرف اصغر ہوراں نوں عربی، فارسی، اردو تے پنجابی زبان وچ اظہار خیال تے مکمل دسترس حاصل سی۔ آپ نے عربی زبان وچ قصیدہ لکھیا تے فارسی زبان وچ وی طبع آزمائی کیتی۔ اردو وچ نعت شریف توں علاوہ قصیدہ بردہ شریف دا منظوم پنجابی ترجمہ وی کیتا اے۔ ایس سارے کلام وچ اوہناں دی نبی پاک حضرت محمد مصطفیٰ علیہ السلام دی ذات مبارک نال محبت تے عقیدت دا اظہار اے۔ ایہہ احساس ہوندا اے کہ اوہناں نے اظہار خیال وچ زبان توں ودھ دل توں کم لیا اے۔ ایس توں بعد اوہناں نے صحابہ کرام، خلفائے راشدین، حضرت غوث اعظم، خواجہ معین الدین چشتی اجیری، اولیائے کرام تے اپنے پیرومرشد دی مدح سرائی کیتی اے۔ آپ دا انداز بیان بڑا سادہ اے تے زبان وی بڑی مناسب تے سادہ استعمال کیتی اے۔ آپ دا کلام پڑھن والیاں دے دل و دماغ تے نقش ہو جاندا اے۔

### سی حرفیاں، دوہڑے / باراں ماہ

پنجابی زبان دے باقی شاعراں وانگوں محمد اشرف اصغر ہوراں وی پنجابی شاعری دی مقبول صنف سی حرفی نوں اپنے خیالات دے اظہار دا ذریعہ بنایا اے۔ آپ دے کلام وچ چار سی حرفیاں تے کجھ دوہڑے شامل نیں۔ سی حرفیاں وچ مدحت رسول اللہ ﷺ، شان صحابہ کرام تے علاوہ اہل بیت توں علاوہ اپنے پیرومرشد دی مدح سرائی کیتی گئی اے۔ پنجابی شاعری دی مقبول صنف باراں وچ وی طبع آزمائی کیتی گئی اے۔ ہجر و فراق دے بیان توں علاوہ دنیاوی بے ثباتی تے موت دا ذکر ملدا اے۔ نمونہ کلام:



الف۔ آقلمے ادبوں کریں سجدہ آیا نام سوہنا سوہنے یار والا  
اس نام تھیں نام ظہور ہوئے کوئی نام نہیں انکار والا  
اس نام تھیں نام جو ہووے منکر بنے دوزخاں نوں بالن نار والا  
میم ح تے دال سرکار عالی اصغر نام احمد مختار والا<sup>(19)</sup>

.....

الف۔ اسم ذاتی وسے وچ چھاتی ویکھیں مار جھاتی بغل یار تیرا  
غیراں دوڑ نہ چھوڑ قیاس سارے اندر اپنے لوڑ غم خوار تیرا  
کیتی نظر اغیار خوار تیری شیشہ قلب دا نال زنگار تیرا  
سنگ پارساں دالیں سنگ اصغر ہووے سنگ تھیں کرنگ تیار تیرا<sup>(20)</sup>

مولانا محمد اشرف اصغر ہوراں دے ایس شعر نوں پڑھن لکیاں اوہناں دی الفاظ دے استعمال وچ مہارت تے لفظاں دے تکرار راہیں شاعری وچ میوزک پیدا کرن دی صلاحیت دا بخوبی اندازہ ہوندا اے۔ ملاحظہ ہون لفظ جھاتی، جھاتی، دوڑ، چھوڑ، لوڑ، اغیار، خوار، زنگار تے سنگ، صرف ایہہ ای نہیں بلکہ اوہناں دے سارے کلام وچ ایہہ صفت موجود اے جیہڑی پڑھن والیاں دی توجہ دا مرکز بن جاندی اے۔

### باراں ماہ

چیت: چیترا ماہ وساہ نہ ساہ دا سر پر موت ڈراندی، پتی ستاندی  
کیوں چت لائیویں زندگی اتے ہتھوں نکلی جاندی، دیر نہ لاندی  
نہیں مقام خوشی دا اے سر پر موت غماں دی چاتی، نہ جاندی  
پیس مول نہ ختم ایہہ ہوسی اصغررات دکھاندی، ورھیاں دی<sup>(21)</sup>

بساکھ: آیا ماہ بساکھ بہار پھلاں خوش آواز بلبل وارووار کردی  
جہان سارا روزگار کردا میں تے یار کچھے زاروزار کردی  
لگا غم صنم تے چم سکا دم دم دعا ہزار ہزار کردی  
ربا میل محبوب مرغوب تائیں شوقوں ہو مجذوب پکار کردی

ہور فکر چھڑے اکو ذکر ماہی رہیا صبر نہ جگر فگار کردی  
 دیکھاں یار انور ہووے صبح اکبر ملاں اٹھ اصغر چند وار کردی<sup>(22)</sup>

مولانا محمد اشرف اصغر ہوراں نے اظہار خیال کردیاں ہویاں جتھے اک پیغام دتا اے  
 او تھے ای اپنے جذبات دے اظہار نال نال زبان دے استعمال وچ وی احتیاط تے لفظاں دے  
 استعمال وچ مہارت دا اظہار کیتا اے، بڑی خوبصورتی تے لفظاں دے تکرار نال اپنے کلام وچ  
 جاذبیت پیدا کیتی اے، جیہڑی اوہناں دے اک قادر الکلام شاعر ہون دا ثبوت اے۔

### تحریک پاکستان وچ حصہ تے آزادی کشمیر واسطے تڑپ

مولانا محمد اشرف اصغر اک باعمل شخص سن۔ جدوں ڈوگرہ حکمراناں دے خلاف مسلم  
 کانفرنس دے پلیٹ فارم توں آواز اٹھنی شروع ہوئی تے علمائے حق وی ڈوگرے دے خلاف  
 میدان عمل وچ آگئے۔ تحریک آزادی دے دوران جلسیاں وچ مولانا محمد اشرف اصغر ہوراں دیاں  
 نظماں پڑھیاں جاندیاں سن۔ عام لوکی وی تقریراں دے دوران آپ دے شعر پڑھ کے سامعین  
 دے جذبات اُبھاردے تے اوہناں دے دلاں نوں گرماندے سن۔ آپ کمانڈر امام غوری ہوراں  
 نال جلسیاں وچ شرکت کردے تے شعراں راہیں مسلمان فوجیاں دی حوصلہ افزائی کردے۔ لوک  
 آپ نوں اپنیاں نظماں سنان دی فرمائش کردے سن۔ آپ دے خلاف تن چار واری بغاوت دا  
 مقدمہ وی قائم کیتا گیا تے آپ نے قید و بند دیاں صعوبتاں وی برداشت کیتیاں۔<sup>(23)</sup> تحریک  
 پاکستان تے تحریک آزادی کشمیر دے تناظر وچ لکھے گئے کلام وچوں نمونہ کلام ملاحظہ ہووے:

یا رب فضل کرم اپنے تھیں ماریں ہندوستانییاں  
 جیہڑے کردے نال اساڈے ہر دم بے ایمانییاں  
 ساڈی مدد ٹوریں جلدی ترکیاں تے ایرانیاں  
 میں قربان اوہناں توں جاواں کردے جو قربانیاں  
 جیہڑے لوک بہشتی ہوون ایہو خاص نشانیاں  
 دیکھو سونخ عمری پڑھ کے شاہ علی کردار دی  
 کافر اگے جھکنا کدھرے ناہیں قرآن سکھایا

کرن جنگ مقابل ہو کے حکم خدا فرمایا  
 جی جی مرنا پھر کی ڈرنا ٹلدا وقت نہ آیا  
 ہوسی شمع اسلامی روشن جے رب چان لایا  
 اٹھو جلدی ہتھ نہ آسی ویلا وقت وہایا  
 نام اسلام مبارک کچھے دنیا ہے جند واردی<sup>(24)</sup>

.....

حال حسینؑ دا سب جان کیتی بیعت یزید تسلیم ناہیں  
 کیتی جان اولاد قربان ساری آیا ترس شمر رجیم ناہیں  
 پاکستان چھڈ کے ہندوستان مناں دی ایہہ قرآن سکیم ناہیں  
 کرنا کفر داسا تھہ حرام اصغر رضی اللہ رسول کریم ناہیں<sup>(25)</sup>

یادِ خدا دی یاد ہر دم یاد والیاں نوں اللہ یاد کرسی  
 کافر بُت پرست ایہہ پست ہون اللہ دشمنان تائیں برباد کرسی  
 ہوسی باغِ محمدؐ پھر تازہ گلشن کل شاداب آباد کرسی  
 جاسی ٹٹ زنجیر ایہہ قید والا، اصغراک دن ملک آزاد ہوسی<sup>(26)</sup>

.....

ماگھ مہینے تانگھ اساڈی یا رب کرم کماویں  
 اپنے فضل کرم تھیں ربا پاکستان بناویں  
 عاجز بے ہتھیاراں تائیں غیبی مدد پونچاویں  
 ہک پل دے وچ بے دیناں نوں اندر خاک رلاویں  
 رحم تیرے دا قطرہ کافی نظر رحم دی پاویں  
 پائی بہت سزا عملوں دی ہُن کوئی دیر نہ لاویں  
 اسیں ناں لائق آزمائش دے نہ سانوں ازماویں  
 ہکدم دور ہو جاوے دشمن جے رحمت وچ آویں

ڈگے آ درگاہ تیری تے درتھیں نہ ہٹاویں  
 برکت نام محمدؐ پچھے عیش آرام دکھاویں  
 توہیں مددگار اساڈا مشکل حل کراویں  
 بخشیں اسماں غریباں تائیں نہ اتنا ترساویں<sup>(27)</sup>

مولانا محمد اشرف اصغر مجاہدین دے حوصلے بلند کرن واسطے شعر لکھے تے اوہناں نوں کفار دے مقابلے وچ ڈٹ جان دا درس دتا۔ شہادت دی موت دی عظمت بیان کرن دے نال نال فتح دی خوشخبری وی دتی پرائیں سب دے نال نال اللہ کولوں عاجزی تے انکساری نال نصرت و کامیابی واسطے دعا وی منگدے رہے۔ کدی وی افرادی قوت تے اسلحہ بارود تے فخر وغرور کرن دا نہ سوچیا بلکہ اللہ کولوں مدد طلب کیتی۔

### اصلاح معاشرہ

کوئی وی شاعر یا ادیب اپنے مخاطب نوں اپنے جذبیاں دے اظہار دے نال نال اوہناں دی تفریح توں ودھ اپنے پڑھن والیاں دے کردار دی تعمیر تے اوہناں دی اصلاح دا وی خیال رکھدا اے۔ دنیا وچ ادب کسے معاشرے دی رسماں ریتاں تے تاریخ دی گواہی دے نال نال معاشرتی قدراں دی تعمیر وی کردا اے۔ سارے شاعراں تے ادیبیاں نے انساناں دی اصلاح واسطے اپنے اظہار نوں بطور ہتھیار استعمال کیتا اے۔ مولانا محمد اشرف اصغر ہوراں نے وی اپنی شاعری نوں معاشرتی اصلاح دا ذریعہ بنایا اے تے اوہ وی اک مثالی معاشرہ دیکھن دے خواہشمند نظر آؤندے نیں۔ اوہناں دے دور وچ سارا علاقہ بناہ جہالت دے ہنھیرے وچ ڈُبیا ہو یا سی تے مسلماناں دے ویاہ شادیاں تے موت مرگ تے ہندووانہ رسماں دا گہرا رنگ سی۔<sup>(28)</sup> مسلمان شریعت توں نا آشنا سن۔ محمد اشرف اصغر ہوراں نے جھوٹ، رشوت، دھوکہ دہی تے ظلم و استحصال دے خلاف اپنی شاعری راہیں اظہار کیتا جیہڑا آپ دے کلام نوں پڑھن ویلے صاف نظر آؤندا اے۔ مثال دے طور تے ملاحظہ ہون چند شعر:

رہیا دین اسلام دا نام ناہیں کرن نال اسلام مخول جاہل  
 مسلمان دی شکل نوں ویکھ مورکھ پڑھن غیبتاں پڑھن لاجول جاہل

روزہ حج زکوٰۃ نماز تارک آون نہ میّت دے کول جاہل  
 سُن کے بانگ نے بانگی نوں ساگ لاون پیٹ وچ بیون ترسول جاہل  
 رشوت کھانی کھلانی حلال جان لیندے ودھ دیندے گھٹ تول جاہل  
 مجلس وچ قرآن دی جان ناہیں جاندے کھاڑیاں دے دیکھن گھول جاہل<sup>(29)</sup>

ایہناں شعراں وچ مولانا محمد اشرف اصغر ہوراں وی دانائی تے وسیع مطالعے دا احساس  
 ہوندا اے۔ دین و دنیا وچ کامیابی دے سنہری اصول دسدے نیں تے جیویں علامہ اقبالؒ نے  
 فرمایا سی کہ:

نگہ بلند سخن دل نواز جان پُر سوز  
 یہی ہے رخت سفر میر کارواں کے لیے

اپنے ایہناں شعراں وچ سانوں مولانا محمد اشرف ہوریں حضرت علامہ اقبالؒ دے کلام دی  
 طرح سبق دیندے نظر آؤندے نیں تے اوہناں دے کلام وچ علامہ اقبالؒ دارنگ نظر آؤندا اے۔

### چٹھیاں

پنجابی ادب وچ چٹھیاں دی روایت بڑی پرانی اے تے بڑی اہمیت دی حامل اے۔  
 مولانا محمد اشرف اصغر ہوراں دی شاعری وچ چٹھیاں دی بڑی مضبوط روایت ملدی اے۔ آپ  
 اپنے دوستاں نوں منظوم پنجابی زبان وچ خط لکھدے سن تے لوکی آپ کولوں اپنے عزیزاں، رشتہ  
 داراں نوں پنجابی وچ منظوم خط لکھواندے سن۔ آپ دے خط محض منظوم خط ای نہیں بلکہ اوس سے  
 دے حالات دی مکمل تاریخ نیں۔ آپ دے خط بڑے معنی خیز نیں۔ آپ اپنے خطاں وچ اوس  
 ویلے وقوع پذیر ہون والے سیاسی تے معاشرتی معاملات دا وی ذکر کردے سن۔ آپ اپنے  
 ہمعصراں نال عربی، فارسی نثر وچ علمی تے شرعی معاملات بارے خط و کتابت وی کردے سن  
 تے شعری ذوق رکھن والیاں نال منظوم زبان وچ خط و کتابت کردے سن۔ ایہناں خطاں وچ حمد و  
 ثنا، نعت تے منقبت دے مضموناں نوں بڑی خوبصورتی نال بیان کیتا گیا اے۔ اپنے پیرومرشد  
 نوں لکھے اک خط دے چند شعر نمونے دے طور تے پیش نیں:

آ۔ قلمے کر سجدہ ادبوں پیش حضور گرامی

خدمت اندر قبلہ عالم ہوویں جلد سلامی  
 تسلیمان تعظیماں کر کے ادبوں عرض سناویں  
 چیونکر حالا درداں والا کر تفصیل دکھاویں  
 آکھیں ہے اک عاجز بندہ وچ بناہ دے رہندا  
 ڈھیری صاحبزادیاں والی دُکھ مصیبت سہندا  
 اصغر نام غریب نماںاں ہے گُتا سرکاری  
 سخت مصیبت اندر پھڑیا دُکھ درد بیماری  
 لت سچی نوں اُچن چیتی سوچ گئے تھیں چلیا  
 گوڈے توڑیں ساری پنڈلی سوچ نے گھیرا ملیا  
 ہتھ لایاں نہ کھبے پوٹا پس تراٹاں مارے  
 اک گھڑی آرام نہ آوے روندیاں وقت گزارے  
 اس حالت اندر قبلہ گزرے روز اٹھاراں  
 منتر ٹونے دارو درمل کیتے لکھ ہزاراں  
 کسے علاجوں نفع نہ ہويا دن دن درد سوایا  
 جڑیاں بوٹیاں کم نہ آئیاں روندیاں وقت وہایا  
 آخر دانش منداں بندیاں اے تجویز نکالی  
 لے گئے چک شفا خانے فوراً کر کے ہمت عالی  
 ڈاکٹر صاحب اس جگہ وچ دتا چیر ڈنگیرا  
 جو اس ویلے حالت گزری واقف ہے رب میرا  
 میں آکھاں اج وقت نزع داسر میرے پر آیا  
 عزرائیلے جان میری نوں ہتھ غضب دا پایا  
 جد اس نشتر باہر کڈھیا چلی پس بہتیری  
 پڑھیا شکر عذابوں شاید ہن چھٹی جان میری  
 پھیر پریشن دو تن واری اوتھے جا کرایا

اپر درد زیادہ ہو یا امن کوئی نہ آیا  
 یا قبلہ ہُن دو مہینے ہو گئے میرے تائیں  
 منجی پر رات دیہاڑی اٹھن ہووے تائیں  
 نال اشارے پڑھاں نمازاں پاسا مول نہ ہلے  
 ساعت سال برابر گزرے حیلہ کوئی نہ چلے  
 کدے سراندی کدے پواندی جاوے رات دکھاں دی  
 تارے گندیاں رات گزاراں لمبی ساعت غماں دی  
 یا قبلہ جے درداں والا لکھاں پورا حالا  
 کافی وقت لکھن دا چاہیے دفتر ہوندا کالا  
 ہتھ بن صرف اک عرض گزاری جے ہووے منظوری  
 رب دے نام غریب خانے تک آؤ تئیں ضروری  
 زور نہ میرا چلے کوئی محض عرض سناواں  
 ہو جاوون سب خیراں مینوں جیکر زیارت پاواں  
 بچیاں دا سر صدقہ حضرت نظر کرم دی پاؤ  
 میں دکھیاں درداں مارا سب تکلیف و نجاؤ  
 السلام علیکم میرا صاحبزادیاں تائیں  
 میرے حق وچ نال کرم دے سارے کرن دعائیں  
 مان گمان پورا دل میرے وچ درگاہ الہی  
 کرے قبول دعایا پھیرے جیوں اس مرضی آہی  
 دامن آل رسول اللہ دا دیسی سچ گواہی  
 حرمت حضرت قبلہ عالم بخشے رب خطائی  
 صدقے حضرت سرور عالم کی مدنی ماہی  
 حضرت حسن حسین تے جنت خاتون مائی  
 رحم کرو کجھ حال میرے تے ہووے دور تباہی

ہر اک مطلب حاضر تھیوے دو جگ دی پھاہی  
 ٹھوٹھا ہتھ گدائی والا ، درتے آیا سوالی  
 خیر پنڈاریوں پاؤ حضرت پرت نہ ٹورو خالی  
 پچیاں دا سر صدقہ کر کے بخشو منصب عالی  
 بخشش دے دریاؤں پاؤ قطرہ آب زلالی  
 عرس شریف اُتے میں خدمت اندر ہوندا حاضر  
 خادم حسین بیمار ہے میرا تاں میں رہیا قاصر  
 ہر ویلے اندیشہ رہندا رنج پریشاں خاطر  
 کرو دعا جے صحت بخشے اللہ حافظ ناصر  
 السلام علیکم اتے خاتمہ عرضی ناماں  
 صاحبزادیاں دی خدمت اندر واروار تماناں  
 حاضر مجلس سبھناں تائیں کیا خاصاں کیا عاماں  
 بخشو حضرت اصغر تائیں بے جا غلط کلاماں<sup>(31)</sup>

## سفر نامے

مولانا محمد اشرف اصغر ہوراں نے منظوم پنجابی وچ دو سفر نامے وی لکھے نیں۔ اک سفر نامہ اپنے پیر خانے دے سجادہ نشین نال کہتے گئے اک سفر دی روداد اے۔ 1975ء وچ آپ نوں حج بیت اللہ شریف تے زیارت روضہ رسول ﷺ دی سعادت وی نصیب ہوئی۔ آپ نے حج دے سفر دے حالات تے واقعات اک سی حرفی تے کچھ شعراں وچ قلمبند کیتے نیں۔<sup>(32)</sup>

## وصال

محمد اشرف اصغر ہوراں نے ساری حیاتی لوکاں دے دلاں تے حکومت کیتی۔ آپ اک باعمل روحانی شخصیت سن۔ عقیدت منداں نوں شریعت دی تعلیم نال روشناس کراندے سن تے نماز روزہ تے فرائض دی بجا آوری دا درس دیندے سن۔ قناعت پسندی تے صبر و شکر دا پیکر سن۔



دنیاوی محبت تے جاہ و جلال توں بے نیاز سن۔ اپنے ہتھ نال کم کردے سن۔<sup>(33)</sup> دنیا دی بے ثباتی تے مکمل یقین رکھدے سن۔ جدوں اپنا مکان تعمیر کرایا تے دروازے تے ایہہ شعر لکھوایا:

دنیا کوڑ بے سود ہے بود اس دی ہونا کل موجود نابود آخر  
خوش رخسار تے گرد غبار پوسی کھانا کیڑیاں ایہہ وجود آخر  
کوئی سنگ نہ ساتھ تہا چھڈ کے ساتھی آو سن پڑھ درود آخر  
لینا کسے نہیں فیر نام اصغر گم ہووسی نام نمود آخر

اُمت مسلمہ دا درد اپنے دل وچ رکھن، لوکاں دے دلاں وچ محبتاں تقسیم کرن تے معاشرے دی اصلاح نے برصغیر دے مسلماناں نوں شریعت دا پابند، مکمل آزاد تے خود مختار قوم دی حیثیت نال ویکھن دی خواہشمند ایہہ شخصیت 5 مئی 1979ء نوں اپنے خالق حقیقی نال جا ملی۔ آپ نوں وادی بناہ وچ خانقاہ علی لشکر دے احاطے وچ سپرد خاک کر دتا گیا۔ جتھے آپ دا عرس ہر سال 5 مئی نوں منعقد کیتا جاندا اے۔ دور تے نزدیک توں آپ دے عقیدت منداں دی اک کثیر تعداد شرکت کردی اے۔<sup>(34)</sup>

## حوالے

- 1- میاں محمد بخش: سیف الملوک؛ محکمہ اوقاف آزاد کشمیر 1999ء ص 488
- 2- حاجی محمد چتر کھوئی رٹہ آزاد کشمیر (گل بات)
- 3- مقبول حسین قریشی (بھتیجے محمد اشرف اصغر) ڈھیری صاحبزادیاں کھوئی رٹہ آزاد کشمیر (گل بات)
- 4- ڈاکٹر محمد حسین (بھتیجے محمد اشرف اصغر) کھوئی رٹہ آزاد کشمیر (گل بات)
- 5- مولانا محمد شفیع جوش (سابق ممبر قانون ساز اسمبلی) کھوئی رٹہ آزاد کشمیر (گل بات)
- 6- صوفی محمد ادریس کھوئی رٹہ آزاد کشمیر (گل بات)
- 7- قاضی محمد شریف باغ دیہاڑی کھوئی رٹہ آزاد کشمیر (گل بات)
- 8- صوفی باغ حسین کھوئی رٹہ آزاد کشمیر (گل بات)
- 9- حکیم شیخ عبدالرزاق کھوئی رٹہ آزاد کشمیر (گل بات)
- 10- میاں محمد طارق سہیو رکھوئی رٹہ آزاد کشمیر (گل بات)
- 11- مولانا محمد حسین ریٹائرڈ مدرس گڑھا بلیال کھوئی رٹہ آزاد کشمیر (گل بات)
- 12- مولانا منظور عالم بھیل کھوئی رٹہ آزاد کشمیر (گل بات)
- 13- پروفیسر ذوالفقار زاہد کھوئی رٹہ آزاد کشمیر (گل بات)
- 14- ماسٹر فقیر محمد گیلانی گجراں کھوئی رٹہ آزاد کشمیر (گل بات)
- 15- پھلاں بھری چنگیر؛ مرتب پروفیسر انوار حسین چشتی 1999ء ص 22
- 16- ایضاً ص 28
- 17- ایضاً ص 39
- 18- ایضاً ص 42
- 19- ایضاً ص 76
- 20- ایضاً ص 80
- 21- ایضاً ص 94
- 22- ایضاً ص 96

- 23 عارف الحق عارف روزنامہ جنگ کراچی (گل بات)
- 24 پھلاں بھری چنگیر ص 108
- 25 ایضاً ص 109
- 26 ایضاً ص 112
- 27 ایضاً ص 118
- 28 حاجی محمد عالم ڈھیری صاحبزادیاں کھوئی رٹہ آزاد کشمیر (گل بات)
- 29 پھلاں بھری چنگیر ص 140
- 30 ایضاً ص 141
- 31 ایضاً ص 152
- 32 سید تعبیر حسین شاہ قمری ضلع کوٹلی آزاد کشمیر (گل بات)
- 33 پروفیسر انوار حسین چشتی پوترے مولانا محمد اشرف اصغر چراغ حسین حسرت کالج کھوئی رٹہ  
آزاد کشمیر (گل بات)
- 34 ایضاً



Khoj

Research Journal Deptt. of Punjabi  
Language & Literature  
Vol:31, Jul.-Dec. 2008, pp 119-128

کھوج  
تحقیقی مجلہ شعبہ پنجابی زبان و ادب  
جلد 31، جولائی دسمبر 2008ء شماره نمبر 1

## کشف المحجوب دا پنجابی ترجمہ شریف صابر دا علمی ادبی کارنامہ

☆ پروفیسر ڈاکٹر عصمت اللہ زاہد

### Abstract

Kashaf-ul-Mahjoob is not only the first but the most important book on religious studies and tasawaf matters. Due to its importance, the book has always been included in the different academic courses of religious studies. Even today this wonderful writing of Hazrat Data Ganj Baksh enjoys the same importance. Being the primary book of the Islamic tasawaf, this Persian piece of literature has been translated in different languages of the world. Sharif Sabir is the author of one of its most prominent translations in the Punjabi language. No doubt this work of Sharif Sabir can be regarded as considerable addition in the Punjabi Prose.

In the present scholarly written article, Dr. Ismatullah Zahid has critically analysed the writer of

☆ چیئرمین شعبہ پنجابی، پنجاب یونیورسٹی اور یونیورسٹی آف ایٹل کالج، لاہور

Kashaf-ul-Mahjoob as well as its Punjabi translation by Sharif Sabir. The essayist has also presented some introduction of chapters in the work of Sharif Sabir, and thus highlighted its importance. This well-knitted article gives us a very thought provoking discussion on the topic.

پنجاب دی دھرتی ایس لحاظ نال بڑی خوش قسمت اے کہ شروع توں ای ایٹھوں دے وسنیکاں دی سوچ نوں سدھیاں رکھن تے ایس سدھی تے پاک پوتر سوچ راہیں اوہناں دے جیون نوں سوکھالا کرن لئی درویشاں، صوفیاں، بھگتاں تے اللہ والیاں دے ڈیرے اتھے لگدے رہے نیں۔ ایہناں وچ اوہ اللہ والے وی نیں جیہڑے ایسے دھرتی دے پنجاں پانیاں دے جم پل سن تے ان گنت اوہ صوفی سنت وی نیں جیہڑے اپنی تبلیغی تے روحانی ذمے داری پوری کرن لئی اپنے بزرگاں دا فرمان لے کے ایدھر آئے۔ اللہ والیاں دی نظر وچ جغرافیائی حدواں دی کوئی اہمیت نہیں ہوندی۔ اوہ ایس گل تے پکا یقین رکھدے نیں کہ روئے زمین دا مالک اگو اللہ اے تے اوہناں دی نظر وچ انسان اوہدا خلیفہ۔<sup>(1)</sup> اوہناں دی نظر وچ اللہ تے اوہدے بندے دارشتہ ایساں پکاتے سچا اے کہ اوہدے اگے کسے وی طرح دی جغرافیائی حد بندی ممکن نہیں۔ سچی گل وی ایہہ ای اے کہ جدوں اک کامل درویش دے سامنے دنیا اک رائی دے دانے دے برابر ہووے تے اوہدی کیہڑی جغرافیائی ونڈ کیتی جاسکدی اے تے نالے رائی دے دانے دا کیہڑا مشرق مغرب تے جنوب شمال ہوندا اے۔ اوس دانے نوں جدھروں وی تلو کو جیہا ای دکھالی دیندا اے۔ صوفی سنتاں تے اللہ والیاں دی سوچ وی چڑھدے لہندے تے دکھن پورب دی قید توں آزاد ہوندی اے۔ اوہ تے اپنی ذات وچوں وی گزر جاندے نیں۔ اوہ جتھے قدم رکھن اوہوای اوہناں دا وطن تے جتھے نفی اثبات دا عرفان حاصل ہو جاوے اوہو اوہناں دی ذات دی معراج۔ ایسے ای عرفانی نکتے ول اشارہ کردیاں ہویاں سید وارث شاہ ہوراں آکھیا سی:

وطن دماں دے نال تے ذات جوگی سانوں ساک قبیلہ دا خویش کیہا<sup>(2)</sup>  
 جیہڑا وطن تے ذات ول دھیان رکھے دنیا دار ہے اوہ درویش کیہا  
 دنیا نال پیوند ہے اسماں کیہا، پتھر جوڑنا نال سریش کیہا

جدوں ایہو عرفانی نکتہ علامہ اقبال اُتے کھلیا سی تے اوہناں نوں ”ہندی ہیں ہم وطن ہے ہندوستان ہمارا“ دی تھان کہنا پے گیا سی ”مسلم ہیں ہم وطن ہے سارا جہاں ہمارا“۔  
 مطلب ایہہ اے کہ اللہ والیاں دی نظر رنگ روپ ذات پات، قبیلہ خاندان، وطن تے علاقے اُتے نہیں ہوندی تے نہ ای اوہ جغرافیائی حدوں دے نال نال لسانی تعصب دا شکار ہوندے نیں۔ اوہناں دی ذات صرف تے صرف ”انسان“ تے اوہناں دا منصب ”انسانیت“ تے ذمے داری، انسانیت دی خدمت ہوندی اے۔ ایہو وجہ اے کہ اوہناں نوں اپنی ذمے داری پوری کرن لئی ہزاراں میلاں دا سفر وی کرنا پوے تے اوہ کردے نیں۔ اوہناں دا ایہہ سفر وی اوہناں دی ذاتی خواہش یا چاہ نہیں ہوندا سگوں اللہ رب العزت دے حکم ”سیرو فی الارض“ دی تعمیل تے عملی تفسیر آکھیا جاسکدا اے۔ ایسے پاروں اللہ والیاں دے من وچ انسانیت دی خدمت تے رب دے بندیاں نال پیار دی دولت سمائی ہوندی اے تے اوہ ایہہ دولت ہر آؤن والے نوں بغیر کسے امتیاز توں پورے خلوص نال ونددے نیں۔ ایہو وجہ اے کہ صوفیاں تے اللہ والیاں دے ڈیریاں اُتے ہر رنگ، ہر نسل ہر قبیلے، ہر خاندان، ہر علاقے توں آیا ہو یا نیک تے بد اکوصف اُتے بیٹھا دکھالی دیندا اے تے ”صاحب نظر“ دی نظر وچ اوہ سب اکو جیسے ہوندے نیں کیوں جے ”سب اٹورنگ کپا ہیں دا“،<sup>(3)</sup> اوہ ہر آؤن والے اُتے کرم تے لطف دی اکو جیہی بارش کردا اے پر سیراب ہر کوئی اپنے اپنے طرف دے مطابق ہوندا اے۔ پروفیسر شریف کنجاہی ہوراں بالکل سچ آکھیا سی:

ہر کوئی اوس شرابوں جیہڑی صاحب نظر پلاوے

اپنے اپنے طرف مطابق کھیوا ہوندا جاوے

ایس شعر وچ بیان کیتی گئی سچائی تے شریف کنجاہی ہوراں دے ات خلوص دا ای نتیجہ اے کہ اج اوہناں دا ایہہ شعر سلطان الاولیاء حضرت سید علی ہجویری المعروف داتا گنج بخش (ؒ) دی بارگاہ اقدس وچ نہ صرف قبولیت دی سند حاصل کر چکیا اے سگوں سرکار دے سرہانے پاسے برآمدے اُتے بڑے سوہنے انداز وچ لکھیا ہو یا وی نظر آؤندا اے۔ ایس شعرتوں اک گل صاف سمجھ آؤندی اے کہ ایس شعر وچ ”صاحب نظر“ دا ذکر کیتا گیا اے۔ اوہدی نظر اوج وی ہر آؤن والے نوں علم عرفان، معرفت، سچائی، خلوص، امن سکون تے محبت دی شراب مسلسل عطا کیتی جا

رہی اے تے کسے وی لمحے اوہدے وچ ذرہ بھر کمی نہیں ہوندی۔ حقیقت تے عرفان دا ایہہ میخانہ یقیناً داتا گنج بخش دا آستانہ اے۔ جیہڑا اہج توں کوئی ساڈے نو سو ورھے پہلاں لاہور وچ قائم ہویا۔ کتے خوش قسمت ہون گے اوہ لوک جیہناں ایس ساقی دیاں نظراں توں براہ راست فیض اٹھایا تے ظاہر باطن نوں اک کرن تے اپنی ذات دی حد وچوں نکل کے اوس بے حد تے بے حساب ذات وچ غرق ہو کے ہمیشہ دی زندگی پالین دا طریقہ تے سلیقہ سکھ کے اپنے آپ نوں امر کر گئے تے اہج اگوں اوہناں دے آستانیاں توں وی لوک فیض یاب ہو رہے نیں۔

حضرت داتا گنج بخشؒ نے اپنی حیاتی مبارک وچ فیض دا جیہڑا سلسلہ جاری کیتا اوہ کسے نہ کسے روپ وچ اہج وی تصوف دے ہر سلسلے وچ جاری اے۔

صوفیاء دا فیض ہمیشہ دو طریقیاں نال جاری رہندا اے۔ اک ظاہری طریقے نال تے دو جا باطنی طریقے نال۔ باطنی طریقے نال فیض تے کوئی قسمت والا ای اٹھاندا اے جدوں کہ ظاہری طریقے نال عام بندہ وی منزل ول اپنا سفر شروع کر سکدا اے۔ داتا صاحبؒ اوہ عظیم ہستی نیں جیہناں دا فیض دوہاں طریقیاں نال جاری اے۔ آپ نوں ایس گل دا علم سی کہ اوہناں دے وصال توں بعد لوکائی اوہناں نوں ظاہری طور تے اوس طرح نہیں مل سکے گی جس طرح اوہناں دی حیاتی وچ لوک اوہناں نوں ملدے نیں ایس لئی آپ نے عام لوکائی دی ہدایت تے راہنمائی لئی اپنے آپ نوں اپنی عظیم تصنیف کشف المحجوب دے روپ وچ ہمیشہ لئی محفوظ کر کے لوکائی دے سامنے رکھ دتا اے۔ ایس کتاب دی بنیاد اوس علم و عرفان اُتے رکھی گئی اے جیہڑا حضرت داتا گنج بخشؒ (وفات 465ھ)<sup>(4)</sup> ورگی عظیم ہستی دی پہچان سی۔ آپ نے جتھے باطنی تعلیم لئی حضرت شیخ ابو الفضل محمد بن حسن نخلی<sup>(5)</sup> دا بوہا ملیا او تھے ظاہری علماں لئی شام، عراق، بغداد، مدائن، فارس، کہستان، آذربائیجان، طبرستان، خوزستان، خراسان تے ماورالنہر دے اسلامی صوبیاں دا لہاں چوڑا سفر وی کیتا۔ انج لگدا اے جیویں آپ نے اپنی علمی پیاس بجھان لئی اسلامی دنیا دے چپے چپے دی سیر کیتی اے۔ ایس گل دا ثبوت ایہہ اے کہ آپ نے صرف خراسان وچ رہندیاں ہو یاں گھٹو گھٹ تن سو پیراں فقیراں تے علماء دیاں مجلساں توں فیض حاصل کیتا۔ ایس توں علاوہ آپ نے کشف المحجوب وچ جس عقیدت تے احترام نال اوہناں بزرگاں دا ذکر کیتا اے جیہناں دی صحبت وچ آپ بیٹھے تے ظاہری باطنی علم حاصل کیتا۔ اوس توں بخوبی اندازہ کیتا جاسکدا اے کہ آپ دے

ظاہری تے باطنی علم اگے دنیا دے وڈے وڈے سمندر وی عاجز نیں، پراہیہ کڈی وڈی گل اے کہ آپ نے اپنا ایہہ علمی تے روحانی سرمایہ کشفِ الحُجُوب وچ انج بند کر دتا اے کہ ”کوزے وچ دریا، نہیں بلکہ ”کوزے وچ سمندر“ لگدا اے۔

آپ دے ایس علمی تے روحانی فیض دے سوے نہ کدے خشک ہوئے نیں تے نہ ای ہوسکدے نیں۔ ایس لئی ہر دور دے لوکاں لئی ایہہ کتاب قرآن پاک تے حدیث شریف توں بعد بہترین راہنما داکم دیندی آئی اے۔ جے حضرت خواجہ معین الدین چشتی اجیرئی نے داتا صاحب دے جاری روحانی فیض توں فائدہ اٹھاندیاں ہویاں آپ دے حضور انج گہائے عقیدت پیش کیئے کہ:

گنج بخشِ فیضِ عالم مظہرِ نورِ خدا

ناقصاں را پیرِ کامل کاملاں را رہنما

تے ایسے ای لڑی دے اک جلیل القدر بزرگ حضرت خواجہ نظام الدین اولیاء نے آپ دی ایس عظیم تصنیف دا مقام تے مرتبہ انج گواہ کیا کہ ”میں نے کشفِ الحُجُوب کا تمام وکمال مطالعہ کیا ہے۔ یہ ایسی کتاب ہے کہ اگر کسی کو مرشد نہ ملے تو اسے پڑھنے سے مل جائے گا۔“<sup>(6)</sup>

ایہہ تے رائے سی اک مکمل درویش دی۔ ہُن ذرا اک دنیا دار درویش دی رائے وی ویکھو۔ شہزادہ دارالشکوہ لکھدا اے کہ ”ایہہ کامل ہدایت دی کتاب اے۔ تصوف دیاں انملیاں کتاباں وچوں فارسی وچ ایہو جیہی کتاب کدے نہیں لکھی گئی۔“<sup>(7)</sup>

دو مختلف طبقیوں دے نمائندہ افراد دی رائے توں صاف ایہہ نتیجہ نکلد اے کہ کشفِ الحُجُوب ہر طبقے تے ہر مکتبہ فکر دے لوکاں لئی سائھی محبوب ترین راہنما کتاب اے جیہڑی ظاہر دے نال نال باطن دی اکھ اگوں ہر قسم دے جالے لاه سُدی اے۔ کیوں جے ایہدی بنیاد اصل وچ قرآن مجید دیاں آیتاں، رسول پاک دیاں حدیثاں، علم الکلام، علم البلاغۃ، علم تصوف تے علم تفسیر اُتے رکھی گئی اے۔ فیر ایس کتاب دا اسلوب اینا کومن کچھواں اے کہ اسلامی فکر تے فلسفے نال دلچسپی رکھن والے بندے دے اندروں اُبھرن والے ہر سوال دا جواب تسلی بخش طریقے نال اودھنوں مل جاندا اے۔ اسلامی دنیا دے حوالے نال ویکھیا جائے تے برصغیر وچ تصوف اُتے لکھی جان والی پہلی باقاعدہ تے بھرویں کتاب اے جیہدے ٹل دی کوئی کتاب شاید اج تک نہیں لکھی



جاسکی۔ ایہوجہ اے ہر دور وچ ایس کتاب نوں اک خاص احترام تے مقام ملدا رہیا اے تے دنیا دیاں مختلف زباناں وچ ایس دے ترجمے وی ہوندے رہے نیں۔ داتا صاحب نے ایہہ کتاب اوس فارسی وچ تحریر فرمائی اے جیہڑی اوہناں دے اپنے علاقے دی زبان سی۔ بلاشبہ ایہہ کتاب لاہور وچ بیٹھ کے لکھی گئی اے تے ایہہ وی حقیقت نہیں جھٹلائی جاسکدی کہ ایہہ کتاب دناں یا مہینیاں وچ مکمل نہیں ہوئی، سگوں کئی ورھے لگے نیں تے ایس دوران آپ نے کجھ ہور کتاباں وی لکھیاں تے لوکاں نوں وعظ نصیحت وی جاری رکھیا۔ لوکاں نال میل ملاقات تے اوہناں نوں وعظ تبلیغ راہیں حق دی سدھی راہ دکھائی تے ان گنت لوک مسلمان ہو کے آپ دے عقیدت منداں دے حلقے وچ شامل ہوئے۔ سوال ایہہ اے کہ کیہ ایہہ ساری گل بات فارسی وچ ہوندی سی جدوں کہ اوس ویلے عوام دی زبان فارسی نہیں سی۔ ظاہری گل اے کہ داتا صاحب لاہور دی عوامی زبان وچ ای لوکاں نال گل بات کردے سن تے اوہناں دیاں دینی دنیاوی مشکلاں حل کردے سن۔ لاہور آکے ایہتوں دی مقامی زبان (پنجابی) سکھ لینا داتا صاحب لئی کوئی مشکل نہیں سی۔ انج وی ایہوجیہے روشن باطن رکھن والے ہر قسم دے لسانی تعصب توں پاک ہوندے نیں۔ اوہ صرف لوکاں دی بھلائی سوچدے نیں۔ کوئی وی زبان اوہناں دے راہ دا روڑا نہیں بندی، نالے تاریخ ایس گل دی گواہ اے کہ کابل قندھار تیکر دے لوک اوس دور تک لاہور یا پنجاب دی زبان توں واقف سن ایس لئی وی داتا صاحب نوں ایہتوں دی زبان سکھن تے بولن وچ دشواری نہیں ہوئی ہووے گی۔ البتہ کشف المحجوب فارسی وچ لکھن دا اک وڈا سبب تے ایہہ لگدا اے کہ داتا صاحب داسارا علمی پس منظر فارسی تے عربی زبان وچ پروان چڑھیا سی۔ دوجی ایہہ گل وی ہوسکدی اے کہ اوس ویلے فارسی مسلماناں دی علمی تے تہذیبی زبان دا درجہ اختیار کر چکی سی۔ تیجی گل ایہہ کہ علمی کتاباں عام طور تے ایسے زبان وچ لکھیاں جاندیاں سن تے ایہہ روایت انھویں صدی عیسوی دے اخیر تک ساڈے اتھے جاری رہی اے تے ان گنت ساڈے مقامی صوفی، شاعراں تے ادیبان نے ایس روایت نوں توڑ چڑھایا اے، حتیٰ کہ پنجابی شعری اٹکلاں یا رومانوی داستاناں دیاں سرخیاں فارسی وچ لکھیاں جاندیاں سن، پر انگریز سہ توں حالات دے بدلے ہوئے تقاضیاں دی مجبوری ہتھوں ایہہ روایت کمزور ہوندی گئی۔ جیہدا نتیجہ ایہہ نکلیا کہ ایس عظیم علمی تے روحانی سرمائے توں فائدہ اٹھان دی سک نے کشف المحجوب تے ہور کئی کتاباں

دے مختلف زبانوں وچ ترجمیاں دی روایت نوں جنم دتا، پر عجیب گل اے کہ ویہویں صدی دے شروع تک وی کشف الحجب دا کوئی پنجابی ترجمہ سامنے نہ آسکیا۔ حالانکہ مختلف مدرسیاں وچ ایہہ کتاب اج وی پڑھائی جاندی اے تے استاد پنجابی وچ ای ایہدا ترجمہ تے تشریح شاگرداں نوں سمجھاندے نیں۔ ایہناں درسوں وچوں تعلیم حاصل کرن توں بعد ایہو عالم لوکاں نال داتا صاحب بارے ساریاں گلاں اوہناں دی زبان وچ ای کردے نیں تے انج کیوں جے بہت ساریاں معلومات لوکاں تیکر اپڑ ای جانیاں نیں شاید ایس لئی وی پنجابی ترجمے ول زیادہ توجہ نہیں دتی گئی تے ایہہ وی ہوسکدا اے کہ کسے جنے ایہہ معرکہ ماریا ہووے پر اودھی محنت منظر عام اُتے نہ آسکی ہووے تے اوہ کیڑیاں دارزق بن کے رہ گئی ہووے۔ البتہ آجاکے پٹیالہ یونیورسٹی توں ڈاکٹر کالاسنگھ بیدی ہوراں دی اک کوشش نظر آؤندی اے کہ اوہناں نے گورومکھی پنجابی وچ ایہدا ترجمہ کیتا، پر سچی گل تے ایہہ اے کہ ایہہ ترجمہ ہندی بوہتا تے پنجابی گھٹ اے۔ کیوں جے ایس دی اک وڈی وجہ سرکار دا عمل دخل اے۔ سرکاری دخل اندازی پاروں ہندوستان دے تناں پنجابی صوبیاں دی تعلیمی تے سرکاری پنجابی اُتے ہندی دا بہت زیادہ اثر ہو چکیا اے تے ایہہ سب کجھ شاید اک سوچی سمجھی سکیم دے تحت ہو رہیا اے۔ ایس لئی ڈاکٹر کالاسنگھ بیدی ہوراں دے ترجمے نالوں اصل فارسی پڑھ لینا زیادہ آسان اے۔ ایس بنیا اُتے اوہناں دے ترجمے نوں معیاری پنجابی ترجمہ نہیں آکھیا جاسکدا۔ ایس لئی کسے سہل، رواں تے معیاری ترجمے دی لوڑ اپنی جگہ موجود سی جیہوں شریف صابر ہوراں پورا کیتا اے۔

نقاد، ترجمہ کار تے محقق ایس گل توں چنگی طرح واقف نیں کہ بنیاں بنائیاں لیہاں اُتے کم کرنا کتنا آسان تے خود نویاں راہواں کڈھنا کتنا اوکھا کم اے۔ شریف صابر ہوراں دی ہمت دی داد دینی پیندی اے کہ اوہناں نے کم وی کیتا تے راہواں وی آپ ای بنائیاں نیں۔ کسے عام ادبی کتاب دا ترجمہ کرنا ہو گل اے تے تصوف دی اوس کتاب دا ترجمہ جیہڑی پہلی مستند تے کلم کلی کتاب ہووے خاص طور تے مشکل ترین مرحلہ اے۔ ایہہ کم ربی توفیق، بزرگاں دی دعا، صاحب نظر لوکاں دی ہلا شیری تے پُر خلوص دوستاں دے تعاون توں بغیر ہو ای نہیں سکدا، جدوں کہ ایہدے نال تحقیق تے تنقید دا لمبا چوڑا تجربہ وی ہونا ضروری اے۔ شریف صابر ہوراں ( ) دی ایہہ خوش بختی اے کہ اوہناں نوں تصوف دی گڑھتی حضرت دیوان محمد مست عمر چندی

قادری<sup>(8)</sup> ہوراں کولوں ملی، حافظ افضل فقیر ورگے صاحب علم و نظر دی بہنی بیٹھے، مفتی ضیا الحیب صابری، مولانا رب نواز (لابریرین جامعہ نظامیہ رضویہ لوہاری گیٹ لاہور)، صوفی عبدالعزیز ڈسکوی، سید جمیل احمد رضوی (سابق چیف لائبریرین پنجاب یونیورسٹی)، پروفیسر ظہیر صدیقی، پروفیسر محمد رفیق، پروفیسر ڈاکٹر خواجہ عبدالحمید یزدانی، پروفیسر محمد اسلم مرحوم (سابق صدر شعبہ تاریخ پنجاب یونیورسٹی)، صاحبزادہ سید راشد سعید کاظمی، محمد ابدال حسین، سید ظفر حیدر سمنی، محمد ناظر بھویری (مرید کے)، رانا عتیق الرحمان (سب انسپکٹر پولیس لاہور) فقیر بدرالدین جنیدی قادری (مرید کے) حاجی ظہور اللہ، چوہدری محمد صادق (صدر جہاں وارث)، حاجی غلام محمد نقشبندی (خطیب جوئیاں والا موڑ شینو پورہ) صاحبزادہ سید محمد حسین شاہ (کاہنہ)، چوہدری سردار محمد (نارنگ منڈی)، اقبال احمد فاروقی، پروفیسر مرزا غلام احمد بیگ، سید محمود شاہ (ایمن آباد) شیخ محمد امیر حجازی (شاہ عالمی لاہور)، ڈاکٹر عمران افضل، حافظ منور علی (بصیر پور)، ڈاکٹر خورشید رضوی (گورنمنٹ کالج لاہور)، پروفیسر خان محمد تے غلام علی (قاضی پبلیکیشنز) ورگے پُر خلوص دوستاں دا تعاون حاصل رہیا۔

شریف صابر پنجابی علمی ادبی حلقیاں وچ اپنے تحقیقی تے تنقیدی کم پاروں اچھی خاصی جان پچھان رکھدے نیں۔ خاص طور تے ہیر وارث شاہ مرتب کر کے اوہناں مشہوری کھٹی اے۔ ایہناں دی ایس محنت نوں سلاہندیاں ہوئیاں حکومت نے ایہناں نوں پنجاہ ہزار روے نقد انعام دتا اے۔ ایسے طرح کافیاں بلھے شاہ، ابیات باہو دے متن تے فرہنگ دے سلسلے وچ اوہناں نوں تحقیق دا جیہڑا وسیع تجربہ اے اوہدی بنیاد اُتے اوہناں تصوف دے گہرے سمندر وچ پورے خلوص نال غوطے لا کے تصوف دیاں اصطلاحات تے رمزاں نوں معنوی تے اصلاحی طور تے سمجھن دا جیہڑا لائبھ اُٹھایا اے اوس تجربے نے کشف المحجوب دے مشکل مقامات نوں سمجھن تے اوہنوں آسان پنجابی لفظاں وچ ڈھالن وچ ایہناں دی بڑی مدد تے راہنمائی کیتی اے۔ تصوف تے علم دے میدان وچ ایڈا وڈا معرکہ مارن دے باوجود شریف صابر ہوراں دی طبیعت تے تحریر وچ جیہڑی عاجزی تے انکساری دکھالی دیندی اے اوہ اصل وچ کشف المحجوب دی دین اے۔

ترجمہ نگاری باقاعدہ اک فن اے تے ایہدے وچ اوہو ای بندہ کامیاب ہو سکدا اے۔ جیہنوں مختلف زباناں اُتے عبور ہووے۔ ہور کچھ نہیں تے کم از کم اوہناں دوہاں زباناں اُتے عبور ہووے جیہناں اُتے اوہ کم کر رہیا ہووے۔ فیر اوہنوں علم بیان تے علم کلام اُتے وی کچھ

دسترس ہووے۔ اوہ لکھتے لوکاں دے مزاج توں وی واقف ہووے تے نال نال پوری صحت نال اپنے دچاراں دے اظہار دا سلیقہ وی جان دا ہووے۔

ساڈے اتھے عام طور تے عربی، فارسی کتاباں توں مقامی زباناں وچ ترجمہ کرن دا اک آسان کلیہ ایہہ لہتا گیا اے کہ اردو یا انگریزی ترجمہ سامنے رکھیا تے اوسنوں سدھاسا نوں اپنی زبان وچ ڈھال دتا۔ ایہدے لئی مترجم اصل کتاب یا متن نوں دیکھن دی زحمت ای گوارا نہیں کردے۔ پنجابی وچ وی ایہو جیسے بے شمار ترجمے مل جانداں نیں پر ایہیے ترجمیاں دی نہ تے کوئی علمی حیثیت ہوندی اے تے نہ ای ادبی۔

شریف صابر ہوراں دے ایس ترجمے دی وڈی خوبی ایہہ اے اوہناں نے کسے اک فارسی نسخے اُتے مکمل بھروسہ نہیں کیتا۔ سگوں بہت سارے نسخے سامنے رکھ کے پہلوں اصل متن نوں سمجھن دی کوشش کیتی اے تے فیرواں نوں اپنی زبان وچ ڈھالیا اے۔ قرآنی آیتاں تے حدیثاں دے حوالیاں دی چھان پھٹک پوری محنت خلوص تے دیانتداری نال کیتی اے۔

شریف صابر ہوراں دے ایس ترجمے دی اک اہم خوبی ایہہ اے کہ اوہناں تصوف دیاں مروجہ اصطلاحواں دا خواہ مخواہ غیر مانوس لفظاں وچ ترجمہ کرن دی کوشش نہیں کیتی سگوں اوہناں نوں اوسے طرح رہن دتا اے جس طرح اوہ صوفیاں دے حلقیاں وچ لکھیاں بولیاں تے سمجھیاں جاندیاں نیں۔ اوہناں نے تصوف دے مشکل مقامات توں دامن بچا کے لکھن دی بجائے اوس نوں دکھو دکھ اولیاء دیاں کتاباں، علماء دیاں لُغتیاں تے صوفی محمد افضل فقیر ورگے صاحب نظر بزرگاں دی صحبت وچ بہہ کے سمجھن دا جتن کیتا اے تے جنی دیر تک گل واضح طریقے نال اوہناں دے پلے نہیں پئی اونی دیر تک اوہناں اودھا ترجمہ نہیں کیتا۔

ترجمے دی اک وڈی خوبی ایہہ گنی جاندی اے کہ پڑھن والے نوں انج لگے جیویں اوہ ترجمہ نہیں پڑھ رہیا سگوں اصل تحریر دا ای لطف لے رہیا اے تے ایہہ خوبی اوس ویلے پیدا ہو سکدی اے جدوں ترجمہ کار دی سوچ کسے الجھاؤ دا شکار نہ ہووے تے اوہنوں زبان و بیان دا سچ سچ آؤندا ہووے۔ اللہ تعالیٰ نے شریف صابر ہوراں نوں ایہناں ساریاں خوبیاں نال خوب خوب نوازا اے۔ گل دی تہہ تیکر اپڑنا تے اوہدی تہہ وچوں اصلی سچ کڈھ لینا کسے کسے داکم اے۔ شریف صابر ہوراں دا ترجمہ ایہناں خوبیاں دامنہ بولدا ثبوت اے۔ ضیاء الحیب صابری ہوراں

بالکل سچ آکھیا اے کہ:

ایہناں دے ترجمے وچ تخلیقی عنصر، پنجابی کلچر تے ماں بولی دارس موجود اے  
تے ترجمے دی فضا توں انج جا پدا اے جویں حضور داتا صاحب نے اپنی  
اصل کتاب پنجابی وچ ای لکھی ہووے۔“  
کشتگانِ خنجرِ تسلیم را  
ہر زماں از غیب جانے دیگرست



### حوالے/حواشی

- 1- نظرث الیٰ بلادِ اللہ جمعاً کَنَحْرُ دَلَّةٍ عَلٰی حُكْمِ اِتِّصَالِ  
قصیدہ غوثیہ از حضرت شیخ عبدالقادر جیلانیؒ
- 2- ہیر وارث شاہ مرتبہ عبدالعزیز بار ایٹ لا، پنجابی ادبی اکیڈمی لاہور 1960ء ص 188
- 3- کلام بلھے شاہ مرتبہ ڈاکٹر نذیر احمد، پیکیجز لاہور، ص
- 4- داراشکوہ وفات 465ھ - مولوی محمد شفیع نے کشف الحجب داسال تصنیف 481ھ تا 500ھ  
دے درمیان لکھیا اے۔ جبہدے توں پتہ چلدا اے کہ آپ دا وصال 500ھ دے آخر وچ  
ہویا ہووے گا۔ (مقالات مولوی محمد شفیع، 1960ء ص 193)
- 5- دریائے جیجوں دے اُتلے علاقے نٹھلان دے رہن والے سن۔ ہر جبل لگام دے پنڈ بیت  
الجن وچ جا بسیرا کیتا، جبہڑا دمشق دے جنوب مغرب وچ اے۔ عمر دا بوہتا حصہ تنہائی وچ  
گزاریا۔ فقیر دا استقلال دا حال ایہہ سی کہ اک لے عرصے تک اکولباس پائی رکھیا۔ اوہدے وچ  
ای ٹاکیاں لالیندے سن۔ فرماندے دنیا اک دن دی اے تے ایہدے وچ ساڈا روزہ  
اے۔ (انسائیکلو پیڈیا ص 95)
- 6- عبدالماجد دریابادی: تصوف اسلام؛ اعظم گڑھ 1343ھ ص 37
- 7- سفینۃ الاولیاء ص 65
- 8- ایضاً

Khoj

Research Journal Deptt. of Punjabi  
Language & Literature  
Vol:31, Jul.-Dec. 2008, pp 129-136

کھوج

تحقیقی مجلہ شعبہ پنجابی زبان و ادب  
جلد 31، جولائی دسمبر 2008ء شماره نمبر 1

## پنجابی گیتاں وچ قومی تے ملی جذبہ

☆ ڈاکٹر نوید شہزاد

### Abstract

This article is being composed by Dr. Naveed Shahzad. In the beginning, the writer has presented a complete and comprehensive definition of "Qaum" with some opinions of different social and religious scholars. After that, the form and boundaries of "Qaumi/Milli" poetry is being discussed. And finally, the writer has presented different colors of the national enthusiasm of Punjabi nation through examples from some Punjabi national songs, and thus endeavored to figure the national attitude of Punjabi nation.

لفظ ”قوم“ بارے عالماں دیاں مختلف راواں نیں۔ لفظ ”قوم“ عام کر کے کسے اک سانجھ پاروں انساناں دے اکٹھ، گروہ یا جماعت نوں آکھیا جاندا اے۔ ایہہ ای اسلامی نکتہ نظر اے۔ جیہڑے لوکاں ول رب سائیں نے جو رسول یا پیغمبر گھلایا اوہ اوہدی قوم اکھوائی۔ کسے چنگے یا بھیڑے وصف دی سانجھ رکھن والے ایس سانجھ دی بنیاد تے اک قوم اکھوائے جیویں قرآن پاک وچ آندا اے کہ فاسق قوم، ظالم قوم، مجرم قوم، ڈرپوک قوم، مومن قوم، عاقل قوم، ایمان

☆ استاد شعبہ پنجابی، پنجاب یونیورسٹی اوری اینٹل کالج، لاہور

والی قوم، جانن والی قوم، عابد قوم، ڈرن والی قوم تے مفکر قوم وغیرہ وغیرہ۔ ایس حوالے نال سورۃ النحل دی آیت 65، 69، سورۃ یوسف دی آیت 9، سورۃ یونس دی آیت 6، سورۃ التوبہ دی آیت 14، سورۃ الانعام دی آیت 126، 98، سورۃ البقرہ دی آیت 67، سورۃ الانبیاء دی آیت 52، سورۃ الذاریٰ دی آیت 46، سورۃ مؤمن دی آیت 31، سورۃ ص دی آیت 12-13، سورۃ ابراہیم دی آیت 9، سورۃ النمل دی آیت 46 تے سورۃ الزحرف دی آیت 51 خاص طور تے دیکھی جاسکدی اے۔ ایہہ تے سی اسلامی حوالے نال گل بات جد کہ لغتاں لفظ ”قوم“ دے معنی ایس طرح دسدیاں نیں۔ مہذب لکھنوی مطابق:

- ”قوم: 1- (بالفتح) آدمیوں کا گروہ۔ عربی، مؤنث، فصیح، رائج  
 2- کسی ملک کے لوگ مجموعی حیثیت کے اعتبار سے، عربی، مؤنث، فصیح، رائج  
 3- خاندان، فرقہ، فارسی، مؤنث، فصیح، رائج  
 4- ذات، نسل، فارسی، مؤنث، فصیح، رائج<sup>(1)</sup>

بہر اُتے بیانے گئے وصفیاں یا مرکز و محور پاروں جدوں بندے اک تھاں اکٹھے ہو جاندے نیں تاں اوہناں وچ آپ مہارے اجتماعیت پنر آؤندی اے۔ جیہدا اک انگ قومی یا ملی جذبہ اے۔

”لفظ قوم سے میری مراد ہندو اور مسلمان دونوں سے ہے۔ یہی وہ معنی ہیں

جن میں میں لفظ نیشن کی تعبیر کرتا ہوں۔“ (سر سید احمد خان)

فیر جدوں سرحدیں بدلیاں تاں لفظ قوم دی تعریف وی دوہاں ملکاں یعنی ہندوستان تے پاکستان وچ بدل گئی۔ جدوں پاکستان دو حصیاں وچ ونڈیا گیا تاں اک وار فیر لفظ ”قوم“ وی ونڈیا گیا۔ جتھوں تیکر 1947ء کمروں ساڈے قومی یا ملی ادب دا تعلق اے تاں ایس وگن وچ اوہ سارا ادب آ جاوے گا جیہدا قومی تشخص دا آئینہ دار ہووے گا تے جیس وچ کسے پکھوں پاکستان نال محبت دا اظہار ہووے گا۔ ایہہ سلسلہ تحریک پاکستان دامدھ بچھن دے نال ای بچھ جاندا اے۔ ایس طرح ملی تے قومی شاعری دا گھیرا ڈھیر کھلا ہو جاندا اے، جیویں قومی ہیرو آں دے جس، جنگی ترانے، اخلاقی تے اصلاحی شاعری، دیہات سدھار شاعری، مدافعتی شاعری، مزاحمتی شاعری، ملی

ترانے، شہراں گراواں دے ترانے، صوبائی ترانے، دھرتی نال بھوئیاں زبانوں دی محبت وچ لکھے گئے گیت، واہر آں تے ویریاں دے خلاف لکھیاں گئیاں لکاراں، قومی تہواراں تے دیہاڑاں لئی لکھے گئے گیت وغیرہ وغیرہ۔ پراسیں استھے صرف اوہناں گیتاں دا ذکر چھوہواں گے جیہناں وچ قومی یا ملی جذبے دا واضح تے نکھر ویاں مہاندرا وکھالی دیندا اے۔ ساڈی جاچے ایہو قومی تے ملی جذبہ کسے دی جغرافیائی سرحد وچ وسدے لوکاں دے اکٹھ نوں قوم داروپ دان کردا اے۔ قومی ادب دے حوالے نال پروفیسر ڈاکٹر انعام الحق جاوید دا آکھن اے کہ:

”ایہہ اوہ ادب اے جیہنوں پڑھ کے پاکستان دا دشمن پسندیدگی دا اظہار نہ کر سکے۔“ (2)

یعنی پاکستانی ادب نوں پرکھن دا ایہہ وی اک پیمانہ اے۔ بہر حال قومی یا ملی جذبہ قوماں نوں اک مُٹھ رکھدا اے۔ ایہ آپسی اتفاق و اتحاد لئی ڈھیر ضروری اے، جیہڑا کسے وی قوم یا ملت نوں ویریاں دیاں سازشاں دا شکار ہون تے افراتفری آتے وڈا مار توں بچائی رکھدا اے۔ دیس دی ترقی تے دفاع دوہاں لئی قومی یا ملی جذبہ ودھیرا لوڑی دا ہوندا اے۔ اس جذبے توں خالی قوم یا ملت کدی وی اک مُٹھ نہیں رہ سکدی تے چھیتی ای کھیروں کھیروں ہو جاندی اے۔ کسے وی قوم نوں اک مُٹھ رکھن وچ کوئی نہ کوئی سانجھ ہوندی اے۔ سانوں اک مُٹھ کھیڑی شے نے کیتا تے کیتی رکھے گی اس گاؤں راہیں تکو:

ساڈا سندھ بلوچستان وی ہک  
سرحد، پنجاب ذیشان وی ہک  
ساڈا رب تے رسول، قرآن وی ہک  
ساری وسوں دین ایمان وی ہک (3)

مذہبی سانجھ اوہ سانجھ اے جیہڑی ساریاں سانجھاں توں تکلڑی اے۔ تاریخ دسدی اے کہ دکھ دکھ مذہب رکھیندے اک زبان بولن والیاں ہراوس سے اکد و بے نوں وڈیا ماریا تے عزتاں لٹیاں جدوں وی مذہبی افراتفری مچی یا کسے ہور آزادی دی تحریک وغیرہ نے ہر چکلیا۔ ایہو مذہبی سانجھ پاکستانی قوم دی آپسی سانجھ، اتفاق تے اتحاد دا وڈا کارن اے۔ جیہدا اظہار گاؤں راہیں اس طرح ملدا اے:



”مسلم ہیں قرآنی ہیں، سارے پاکستانی ہیں

اک مک ہیں آواز وی پک۔۔۔ سوچن دا انداز وی پک

سچے ہیں ایمانی ہیں، سارے پاکستانی ہیں،“ (4)

دیس پیاریاں نوں ایس گل اُتے مان اے کہ اوہناں ساریاں دا اگودین ایمان اے،

اکو صلاح، اکو گل، اک آواز تے اک ہتھ اُتے جین مرن دی بیعت:

”چتے چتے کونے کونے اک مسلم دی شان

اکو دین ایمان اساڈا اکو جنت تے جان

اکو ساڈا جذبہ سجنو اکو ساڈی گل

حق دی خاطر آؤندا سانوں جین مرن دا ول

اکو ساڈا کلمہ سوہنا اکو پاک قرآن (5)

دھرتی اوہ ویہڑا اے جیہدے وچ رل کے وسیا جاوے تے ایہ جنت بن جاندی

اے۔ ایہ نعمتاں دیندی اے، خوشیاں ونڈ دی اے، دکھیاں دے اتھرو پونجھدی اے، صدقے

واری جاندی اے تے ایہ سارا کجھ سانجھ دے ہتھ وں اے:

سانجھا رب، رسول وی سانجھا سانجھے چن ستارے وے

دھرتی دے اس ویہڑے اندر سانجھی آں اسیں سارے وے

بانہواں دیوچ بانہواں پا کے رل کے قدم اٹھاؤنے آں

سوہنے پاکستان دی خاطر سوہنے عمل کماؤنے آں (6)

دیس پیاریاں نوں ایس گل دا احساس اے کہ ساڈی سانجھ دی نیہہ اک اللہ، اک رسول

تے اک قرآن اُتے کھلوتی اے تے ایہ ودھیری مضبوط بنیاد اے جیہوں کوئی ہور کارن ہلانہیں

سکدا چاہے اوہ زبان ہووے یا حیاتی دا کوئی ہور کجھ:

پاکستان اے دیس اساڈا اسیں ایہدے شیدائی

اک دھرتی تے وسن والے اسیں آں بھائی بھائی

اک اللہ تے اک رسول اے اک ساڈا قرآن (7)

گیتاں وچ اپنی قوم نال محبت دا ات اظہار کیتا گیا اے، اوہدے سکھ چین تے اوہدی

ترقی لئی دعاواں منگیاں گئیاں نیں۔ بالکل او سے طرح جیویں کوئی بند اپنی ذات لئی رب سائیں  
کولوں رورو کسے شے دی منگ کردا اے:

”رات دے میں سوہنیا ربّا ایہو کراں دعاواں  
وطن مرے وچ لوکیں مانن شالا ٹھنڈیاں چھانواں<sup>(8)</sup>

(رفیق پڈا)

اوہ اپنے بھراواں دی خیر منگدا اے، گھریاں وانگر جڑیاں ہونیاں بانہواں دی خیر منگدا  
اے۔ اوہ مانواں دے مان رکھن والے ہراں لئی حیاتی منگدا اے۔ آکھدا اے:

شالا ون جوڑ بھراواں دے  
جیہڑے مان ودھاون مانواں دے<sup>(9)</sup>

گیتاں وچ اپنی قوم دی بہادری دے قصے وی چھوہے گئے نیں۔ دسیا گیا اے کہ ایہ  
عزماں، ہمتاں تے طاقتاں والی قوم اے۔ جیہڑے گھبر واپنی دھرتی، اپنے دیس تے اپنی قوم  
دامان تران نیں:

رُردے جان دے ٹوراں تیکھیاں۔۔۔ پیر و دھاندے منزل لاں پاندے  
مختناں کردے موجد اُتدے۔۔۔ خوشیاں مان دے، ہسدے گاندے  
ہمتاں والے، زوراں والے۔۔۔ غیرتاں والے، شیرا نکھیلے<sup>(10)</sup>

اس گاؤں وچ ویکھو اپنی قوم دے گن کیویں گائے جارہے نیں کہ اسیں امن دے حامی  
ہاں تے کسے نوں نہیں چھیڑدے، اسیں کسے نال ظلم زیادتی نہیں کردے، کسے نال دھرو نہیں کردے  
پر اسیں بزدل نہیں۔ اسیں ہر ویلے اپنی قوم لئی جاناں وارن تے تیار رہندے ہاں۔ اوہدا کارن  
ایہ دسد اے کہ ساڈے دل وچ شہادت دا جذبہ ہر ویلے ٹھاٹھاں ماردا رہندا اے:

اَسیں امن دے سچے حامی آں  
اَسیں ظلم کسے تے کردے نہیں  
ساڈے دل وچ شوق شہادت دا  
اَسیں ظالم کولوں ڈردے نہیں  
ساتھوں موت وی ڈر کے لنگھدی اے<sup>(11)</sup>

ایس قوم دا جوش تے جذبہ وی دیدنی اے۔ ایہ جدوں کڑکدے نیں تاں ایہناں دی  
ہیت نال پہاڑاں دے دل وی کمب کمب جانے نیں۔ ہاراں نے ایہناں دیاں بھاگاں وچ  
اُچیاں سُچیاں جتاں لکھ چھڈیاں نیں:

ایہدے واسی جدوں جوش وچ کڑکدے  
خوف پاروں پہاڑاں دے دل دھڑکدے  
ایہدے ہر اک جیالے دا پختہ عزم  
ایہدی تقدیر وچ لکھی فتح میں (12)

کدھرے شاعر اپنے ہمتیلے، اُدھی تے انکھاں، شرماں والے ویراں بھراواں  
، پُتراں تے وڈیریاں دی گل اس طرح سناندا اے:

غیرے مند انکھیلے لوک  
اُدھی تے ہمتیلے لوک  
سُچا جیون، اُچی شان (13)

گاناں وچ اپنی قوم دے سچے سچے اخلاق تے رویاں دی دس وی پائی گئی اے۔ ایس  
گل نوں وڈیا گیا اے کہ ایہ قوم ڈھیر درد رکھن والی اے۔ جیہڑی ماڑیاں دا ہتھ وٹاندی اے۔  
دُکھیاں دے درد وٹاندی اے، ہر کسے نوں ہسدے متھے ملدی اے تے ایہو ایہناں دا ایمان  
تے ایہناں دے مذہب دا حصہ اے:

کمزوراں دے ہتھ وٹاؤنے، دُکھیاں دی غمخواری کرنا  
ہر اک نال خوش ہو کے ملنا، ہر اک دی دلداری کرنا  
اپنا ہے ایمان (14)

تے کدھرے انج دے پیار پرپے گاؤں کنیں پیندے نیں جیہناں وچ سانجھ تے سانجھیاں دی  
گل کیتی گئی اے:

اکدو بے توں صدقے جاییں اِکدو بے توں وارے وے  
دھرتی دے اس ویہڑے اندر سانجھی آں اسیں سارے وے (15)

ایہ گاؤں ویکھو جس وچ مٹیاں اپنے ماہی نوں آکھ رہی اے کہ مینوں تُونباں دی اَبے لوڑ

نہیں تے تُوں میرے لئی اپنی قوم یا دیس نال کوئی دھرو نہ کریں۔ تُوں پہلاں اپنی قوم دا گہنا بن، کیوں جے میری قوم نوں تیری ودھیری لوڑ اے، ڈاھڈی ضرورت اے تے ایہ اک وڈی قربانی اے، اک آفاقی سوچ اے، ہمیش جیوندی رہن والی:

تُوں بناں میرے واسطے نہ اَجے تُوں گھڑائیں وے  
 پہلے گہنا قوم دا تُوں آپ بن جائیں وے  
 صدقے ہزار واری میریاں ضرورتاں  
 میتھوں ودھ قوم نوں نیں تیریاں ضرورتاں (16)

آخر وچ اپنی گل مکاون توں پہلاں اپنی قوم دے ہر نکلے، وڈھے نوں ایہ آکھاں گا کہ  
 آواہیں سنیہے نوں گھٹ کے حیاتی دے پلے پنھ لئیے:  
 ”کچھ کر کے دکھا دیئے“

دل جان، حیاتی نوں، ناں قوم دے لادیئے (17)

ایہہ سی لیکھ دے سرناویں مطابق صرف پنجابی گائناں دے حوالے نال گل بات۔ ایس توں وکھ ہور  
 پنجابی شعری تے نثری صفاں وچ ایس جذبے دے ڈھیر مہاندرے سبجے ای مل جانداں نیں۔

## حوالے

- 1- مہذب لکھنوی۔ مہذب الغات، جلد نہم (محافظ اردو بکڈ پبلکیشنز۔ سن) ص 156
- 2- ڈاکٹر انعام الحق جاوید۔ پنجابی ادب دا ارتقاء (اکادمی ادبیات پاکستان اسلام آباد۔ دسمبر 1990ء) ص 590
- 3- شاعر۔ بہار النساء بہار، گلوکار۔ اعجاز راہی، ٹیپ نمبر۔ 1755، ریڈیو پاکستان ملتان سنٹر۔
- 4- شاعر۔ حیدر گریزی، گلوکارہ۔ شمشاد بانو تے ساتھی، ٹیپ نمبر 4-1003، ریڈیو پاکستان ملتان سنٹر
- 5- سائیں عبدالغفور۔ اتارا (اعتماد پبلی کیشنز: چھانگا مانگا 1993ء) ص 123
- 6- تنویر بخاری۔ جیوے پاکستان (پنجابی کلچرل سنٹر کڑیال کلاں 1980ء) ص 62
- 7- شاعر۔ بشیر منذر، گلوکار۔ غلام عباس، ٹیپ نمبر 2554، ریڈیو پاکستان لاہور سنٹر
- 8- مہینہ وار ”لہراں“ لاہور۔ فروری 1995ء ص 42
- 9- شاعر۔ بہار النساء بہار، گلوکار۔ اعجاز راہی، ٹیپ نمبر 1755، ریڈیو پاکستان ملتان سنٹر
- 10- اسماعیل متوالا۔ سورج تے سمندر (پاکستان پنجابی ادبی پریہیا لاہور۔ ستمبر 1980ء) ص 112
- 11- فلم۔ زمیندار، موسیقار۔ جی اے چشتی۔
- 12- اقبال راحت۔ بحر اچن (کنوشنل پیپر پرنٹ اینڈ پبلشرز لاہور۔ جون 1995ء) ص 99
- 13- تنویر بخاری۔ جیوے پاکستان (پنجابی کلچرل سنٹر کڑیال کلاں۔ 1980ء) ص 60
- 14- صوفی تبسم۔ نظراں کردیاں گلاں (پاکستان پنجابی ادبی بورڈ لاہور۔ جنوری 1988ء) ص 141
- 15- تنویر بخاری۔ جیوے پاکستان (پنجابی کلچرل سنٹر کڑیال کلاں 1980ء) ص 62
- 16- ایضاً ص 128
- 17- ایضاً ص 117